

DIŽA' GÜEN DAN' BZOJ SAN MATEO

*Ẅozxtao' Jesucriston'
(Lc. 3:23-38)*

¹ Nga nyoj la beṇe' gosac Ẅozxtao' Jesucriston' chzolaon len da' Ẅozxta'ocho Abraham. Le Jesúsēn' goque' xi'in diaža che da' David, na' da' Davin' goque' xi'in diaža che da' Abrahanna'.

² Abrahanna' goque' Ẅa Isaac, na' Isaaquen' goque' Ẅa Jacob, na' Jacobēn' goque' Ẅa Judá len yezica'chle beṇe' biše' ca'.

³ Judán' na' Tamar gosaque' Ẅaxṇa' Fares na' Zara. Na' Faresēn' goque' Ẅa Esrom, na' Esronṇa' goque' Ẅa Aram.

⁴ Na' Aranna' goque' Ẅa Aminadab, na' Aminadaben' goque' Ẅa Naasón, na' Naasónṇa' goque' Ẅa Salmón.

⁵ Salmónṇa' na' Rahab gosaque' Ẅaxṇa' Booz. Na' Boozēn' na' Rut gosaque' Ẅaxṇa' Obed. Na' Obedēn' goque' Ẅa Isai.

⁶ Na' Isai'n' goque' Ẅa rey David, na' rey Davin' goque' Ẅa Salomón. Na' xṇa' Salomónṇa' goque' xo'ol da' Urías cate' za' yeca'a rey Davin' le' par gaque' xo'ole'.

⁷ Na' Salomónṇa' goque' Ẅa Roboam, na' Roboanna' goque' Ẅa Abías, na' Abíasēn' goque' Ẅa Asa.

⁸ Na' Asan' goque' Ẅa Josafat, na' Josafaten' goque' Ẅa Joram, na' Joranna' goque' Ẅa Uzías.

⁹ Uzíasen' goque' x̄a Jotam, na' Jotanna' goque' x̄a Acaz, na' Acazen' goque' x̄a Ezequías.

¹⁰ Na' Ezequíasen' goque' x̄a Manasés, na' Manasésen' goque' x̄a Amón, na' Amónna' goque' x̄a Josías.

¹¹ Josíasen' goque' x̄a Jeconías len yezica'chle biše' ca' gosenita' ca' tiemp caten' beṇe' Babilonia ca' gosezene' beṇe' Israel ca' na' goseche'x̄oxje' legaque' Babilonian'.

¹² Gwde goc ca', golje Salatiel xi'in Jeconíasen'. Na' Salatielen' goque' x̄a Zorobabel.

¹³ Na' Zorobabelen' goque' x̄a Abiud, na' Abiuden' goque' x̄a Eliaquim. Na' Eliaquinna' goque' x̄a Azor.

¹⁴ Na' Azoren' goque' x̄a Sadoc, na' Sadoquen' goque' x̄a Aquim. Aquinna' goque' x̄a Eliud.

¹⁵ Na' Eliuden' goque' x̄a Eleazar, na' Eleazaren' goque' x̄a Matán. Na' Matánna' goque' x̄a Jacob.

¹⁶ Nach Jacoben' goque' x̄a José ben' goc beṇe' che María. Na' Marían' goque' x̄na' Jesús ben' nzi' Cristo, zeje diža' ben' gwlej Diosen' cont yedenabi'e.

¹⁷ Na' gwzolaon tiemp che da' Abraham bžinte tiemp che da' David gosac žta' diaža chen', na' ca tiemp che da' David bžinte ca tiemp caten' gosezene' beṇe' Israel ca' goseche'x̄oxje' legaque' Babilonia, lecze gosac yežta' diaža chen', na' ca tiempen' bžinten ca žan' golje Criston' ben' gwlej Diosen' cont yedenabi'e, gosac yežta' diaža chen'.

*Can' goc cate' golje Jesucriston'
(Lc. 2:1-7)*

18 Na' quingan' goc cate' golje Jesucriston'. Ba naquen gwšagna' Marían' len José, na' za' ca'a Josén' le' par gaque' xo'ole' cate' gocbe'ede' ba noa' Marían' bdao'. Goc ca' dan' ben Spiritw che Diosen' cont bhendao' bdao'na' lo' le'e.

19 Na' Joséna' ben' ba naquen si'e Marían' par gaque' xo'ole', goque' to bene' ben da' güen lao Diosen'. Na' bene' xbab cuejyichje' Marían' šižize cont nono gacbe'e na' cont bi gwsie le' zto'.

20 Šlac chone' xbab gone' ca' gwtase' na' to angl bene' gwseła' Xancho Diosen' blo'elagüe' le' lo bišgal. Na' gože' le':

—José, le' goljo' lo diaža che da' rey David. Bitw žebo' si'o Marían' par gaque' xo'olo'. Spiritw che Diosen' benen cont no'e bdao'na'.

21 Na' sane' to bi' byo dao' na' gwsio labe' Jesús, le len' yeque'e xtoła' bene' gualaž che' ca' bene' yesejnilaže'ne'.

22 Goc yogo' da' ca' cont goc can' gwna Diosen' dan' bzoj to ben' be'e xtižen' cani', gwne':

23 To no'ol güego' no'ole ne' napši'ichgua cuine' güe'e to bi' byo dao' na' sane'be'.

Na' si' labe' Emanuel.

Na' Emanuel zeje diža': Diosen' zoacze' len chio'.

24 Na' cate' beban Josén' beyož gwñede' yelen', bene' can' gož angl che Xancho Diosen' le', jaxi'e Marían' liže' par goque' xo'ole'.

25 Perw bi gwzoalene' le' ca xo'ole' san gwzoacze' le' respetw bžinte ža gwthane' to bi' byo dao', xi'ine' nechw. Na' gwxi' labe' Jesús.

2

Magos ca' jaseñe'e Jesúsen'

¹ Ca tiempen' cate' gwnabia' rey Herodes, golje Jesúsen' Belén, to yež gan' mbane distritw Judea. Na' besežin to chope magos Jerusalén, za'aque' to naci6n zito' dan' chi' do ga chla' gwbiž.

² Na' gosenabde' bene' lo ciudan' gose'ene':

—¿Gan' rey che bene' Israel, ben' ba golje? Nezeto' ba golje', le ba ble'eto' beljw chen' cate' blan' lažto' dan' zoa gan' chla' gwbiž. Na' za'to' gonxento'ne'.

³ Cate' gwneze rey Herodesen' can' gosenen', gocchgüe' tole, na' lecze ca' yogo'lol bene' lo ciuda Jerusalénna'.

⁴ Nach reyna' btobe' yogo'lol bxoz gwnabia' che chio' bene' Israel na' lecze yogo' bene' ca' chososed chosolo'e dan' bzoj da' Moisésen'. Na' gwnabde' legaque' gan' naquen galje Criston' ben' gwlej Diosen' cont yedenabi'e.

⁵ Nach gose' bene' ca' Herodesen':

—Galje' Belén, gan' mbane distritw Judea, le can' ža dan' bzoj to bene' be' xtiža' Diosen' cani'. Quinga žan:

⁶ Ca nac yež Belén gan' že' diaža che da' Judá, nacczen yež da' zaca'chgua lao yež gwnabia' ca' zjachi' Judean'.

Le to bene' Belén gaque' bene' gwnabia', na' le' güia ne'e naci6n Israel chian'.

⁷ Nach Herodesen' goxe' magos ca' багаše'ze cont ja'aque' lagüen' na' gwnabde' legaque' batyanen' besele'ede' bla' beljon'.

⁸ Nach gwsele' legaque' Belénna', gože' legaque':

—Le šja'ac na' le šjaydiljw bidao'na' tcho'a. Na' cate' yeželebe' le yeda yedyedixjue'ele neda' cont lecze ša'a šjexena'be'.

9 Beyož bosozenag magos ca' can' gož reyna' legaque', nach gosa'aque'. Na' beljon' dan' be-sele'ede' do gan' chla' gwbižen' cate' biņa' yesa'ac lažgaquen', zejen le'e yaban' žialaon laogaque' bžinten yo'o gan' zoa bidao'na', na' gwlezen.

10 Na' magos ca' besyebede' juisyw cate' be-sele'ede' beljon' da' yoble.

11 Nach cate' besežine' yo'o gan' zoa bidaon', goso'e lo' yo'ona' na' besele'ede' bidao'na' len xna'be' Marían'. Nach bosozoa xibgaque' gosonx-ene'be'. Na' gosesaljo caj čhegaquen' gosebeje' oro, yal na' to nechw da' chla' zix da' nzi' mirra na' gosoen' chebe'.

12 Na' šlac ne' nita' magos ca' Belénna', Diosen' gwduxjue'ede' legaque' lo' bišgal bich yesyedie' gan' zoa rey Herodesen'. Da'nan' besyequ'e yeto nez yoble jaya'ac laže'.

Bosoxonje' ja'aque' Egipto

13 Na' cate' ba besyeya'ac magos ca', to angl čhe Xancho Diosen' blo'elagüe' Josén' lo' bišgal, na' gože'ne':

—Gwyas, gwče' bidaon' na' xna'ben' le šja'ac nación Egipto na' soale na'ze, na' cate'ch nia' le'e, cana' guaque yeza'le, le Herodesen' ba nžie' bia' yeyiljue' bidao'na' cont gote'be'.

14 Nach ne' ze bxin gwyas Josén', gwče'e bida'ona' len xna'ben' zja'aque' Egipton'.

15 Nach gosonite' Egipto na'ze šlac bžin ža got Herodesen'. Na' dan' gosone' ca' goc can' gwna Diosen' dan' bzoj to bene' be' xtiže'na' cani', gwne': “Čhixjue'eda' Xi'inan' yeze'e Egipton'.”

Herodesen' gwsele' soldadw cont gosote' yogo' bi' byo dao'

16 Na' rey Herodesen', cate' gocbe'ede' gasonle magos ca' le' dan' bich besyedie' gan' zoe'na', leca bže'e. Na' bsaque' con can' gwyejni'ide' cate' gwnabde' legaque' batcan' bla' beljon', na' gwsele' soldadw che' ca' par jasete' yogo'lol bi' byo che'en dao' zelao bi' chop ize, bi' ca' gosalje Belénna' na' yezica'chle yež ca' zjanyechj zjambi'i Belénna'.

17 Na' lagüe dan' gosote' bi' byo dao' ca', goc can' bzoj da' Jeremías ben' be' xtiža' Diosen' cani', žan:

18 Nente ši'i bene' Ramá,
chesebežchgüe' nita'chgüe' yela' güine'.

No'ole ca' zjanaque' xi'in diaža che da'
Raquel chesyeyaše' chesyegüine'de' che
xi'inda'ogaque' ca',
na' bitw chesaclaže' no yeyoexenlaže' legaque', le
ba gosatben'.

19 Cate' got Herodesen', Josén' ne' zoe' Egipton'.
Nach to angl che Xancho Diosen' blo'elagüe' Josén'
lo bišgal, na' gože'ne':

20 —Gwyas, beche' bidaon' len xna'be'na' na'
le šjaya'ac Israel. Ba gosat bene' ca' besyeyiljw
bidao'na' cont yesote'be'.

21 Nach gwyas Josén' beche'e bidaon' len xna'ben'
jaya'ac lažgaque' Israel.

22 Perw Josén', cate' bende' Arquelao bezoe'
chnabi'e latje che da' xe' Herodesen', bžebe'
yeyeje' gan' mbane distritw Judean'. Na' Diosen'
gwdixjue'ede' le' lo bišgalen' bi cheyala' šjaya'aque'
distritw Judean', san šjaya'aque' gan' mbane
distritw Galilean'.

²³ Da'nan' besyežine' ciuda Nazaret na' jasenite'. Na' dan' jasenite' Nazareten' goc can' bosozoj da' beṇe' goso'e xtiža' Diosen' canī', gosene': "Yososi'e Jesúsēn' beṇe' Nazaret."

3

Juan ben' bzoa beṇe' nis gwdixjue'ede' diža' güen che Diosen'

(Mr. 1:1-8; Lc. 3:1-9, 15-17; Jn. 1:19-28)

¹ Na' gwde zan iz, Juan ben' bzoa beṇe' nis gwyeje' latje daš gan' mbane distritw Judean'.

² Na' gwdixjue'ede' beṇe', gože' legaque':

—Le yetinje xtolā'le ca', le ba bžin ža cate' Diosen' ben' zoa yaban' nabi'e yichjlaždao' beṇe' yosozenague' che'.

³ Che Juanna' bzoj da' Isaíasēn' caten' bzoje' Xtiža' Diosen' canī', gwne':

Bena' chṇe' zižje latje dašen', že':

“Le gonšagüe' yichjlažda'olen' cont soale lez gwzenagle che Xanchon' cate' yide'.

Le cuejyichj da' malen' chonle cont yichjlažda'olen' gaquen ca to nez da' ba gosonšagüe'.”

⁴ Na' Juanna', xalane' goquen de yiša' xa camello. Na' da' bchej ḷsinen' goquen de yid, na' gwdagüe' biše'zo len šina' beser yixe'.

⁵ Beṇe' že' ciuda Jerusalénna' na' beṇe' že' yogo' yež ca' gan' mbane distritw Judean', na' lecze beṇe' že' yež ca' nyečhj mbi'i yegw Jordánna' gosa'aque' ja'aque' gan' zoa Juanna' cont bosozenague' xtiže'na'.

⁶ Na' cate' gosexoadole' bi da' xinj zjanone', Juanna' bzoe' legaque' nis lo yegw Jordánna'.

⁷ Na' lecze ja'ac zan be_{ne}' Israel be_{ne}' ca' zjanzi' fariseo na' be_{ne}' ca' zjanzi' saduseo. Ja'aque' cont bzoa Juanna' lega_{que}' nis. Nach Juanna' cate' ble'ede' lega_{que}' gože'ne':

—iLe'e nac_{hg}uale be_{ne}' zgot na' be_{ne}' gwxiye'!
¿Cha_{que}le guac yelale lao castigw dan' se_{la}' Diosen' caten' gone' ye_{la}' justis che be_nachen'?

⁸ Še da' li ba beti_njele xto_{la}'len', cheya_{la}' gon_{le} da' nac güen cont yesacbe'e be_{ne}' ba boša' yich_{la}žda'olen'.

⁹ Na' bitw gon_{le} xbab ga_{que}le Diosen' bitw gone' le'e castigw che xto_{la}'len' lagüe dan' nacle xi'in diaža che da' Abrahanna'. Bitw nacho leca chyažje Diosen' le'e. Guac gone' cont yej quinga yesyeya_{quen} xi'in diaža che da' Abrahanna'.

¹⁰ Ca nac le'e, še bi chon_{le} can' chazlaže' Diosen', zaca'leble ca to yag frut da' bibi chbia. Na' yogo'te yag frut da' bibi chbia, chog xan yaga' len na' gwzeyen'.

¹¹ Neda' da' li chzoa' le'e nis ne_{che} ba beti_nje xto_{la}'le, perw coža'na' za' yid ben' gon cont soa Spiritw che Diosen' lo' yich_{la}žda'olen' nabian' le'e. Na' be_{ne}' ca' bi yeson can' chazlaže' Diosen', se_{le}' lega_{que}' lo' yi' gabi_{len}'. Na' ben' za' za' coža'na' zaca'che' ca neda' na' da' nac_{hg}üe' be_{ne}' zaca', bi zaca' gona' xmandadoe' le_{ch}ja' no xe_{le}'.

¹² Benan' gone' len be_nachen' can' choncho cate' chdecho trigon' lo' rner. Chotobcho trigon' chgo'ošagüe'chon na' chzeycho yix beben'. Na' be_{ne}' bi chesejni_{la}že' Diosen', se_{le}' lega_{que}' lo' yi' gabi_{len}' dan' cbi cheyol chenit.

*Cate' gwzoo Jesúsen' nis**(Mr. 1:9-11; Lc. 3:21-22)*

¹³ Na' gwza' Jesúsen' gan' mbane Galilea na' gwyeye' gan' zoa Juanna' cho'a yegw Jordánna' cont Juanna' bzoe' le' nis.

¹⁴ Na' Juanna' ben cho'alagüe' gague goclaže' gwzoe' Jesúsen' nis, gože'ne':

—Chyažjda' gwzo' neda' nisen' na' le' zedenabo' gwzoo' le' nis.

¹⁵ Nach Jesúsen' gože' Juanna':

—Bzoa neda' nisen'. Cheyala' goncho ca' cont gac yogo'lol dan' non Diosen' mandadw gac.

Nach gwčheb Juanna' bzoe'ne' nis.

¹⁶ Na' cate' beyož gwzoo Jesúsen' nisen', bechoje' lo' nisen', na' la' byaljwte yaban' gan' zoa Diosen'. Na' ble'ede' Spiritw che Diosen' betjen ca to ngolbex na' bžinen gwzoan len le'.

¹⁷ Na' gosende' gwne Dios ben' zoa yaban', gwne':

—Bengan' Xi'ina' bene' chacda' na' chebe chezaquelaže'chgüeda' che'.

4*Goclaže' gwxiyen' co'oyelan' Jesúsen' gone' da' mal**(Mr. 1:12-13; Lc. 4:1-13)*

¹ Na' Spiritw che Diosen' benen cont gwyey Jesúsen' latje dašen' gan' Satanás dan' chnabia' da' xigüe' ca' goclažen' co'oyelan' le' cont gone' da' mal.

² Na' bitwbi gwdagw Jesúsen' lao čhoa ža čhoa yel, na' cate' gwde da' čhoa žana' gwdone'.

³ Na' Satanásen' gwbigan' gan' zoa Jesúsen', gožen le':

—Še le' naco' dogualje Xi'in Diosen', gož yej quinga yesyeyaquen yetextil.

⁴ Nach gož Jesúsen' len:

—Nyojczte Xtiža' Diosen' žan: “Gague yela' guagw na'zen' chyažje chio' beñač cont gac bancho, san lecze chyažjecho yogo'lol diža' dan' ža Diosen'.”

⁵ Nach gwčhe' Satanásen' le' ciuda Jerusalén dan' nac ciuda che Dios. Na' bcuen le' yichjo' yodao' blao gan' nac la'zelagüe sibe,

⁶ na' gožen le':

—Še len' naco' dogualje Xi'in Diosen', nga boslažo' cuino', le nyojczten le'e Xtiža' Diosen', žan:

Sela' Diosen' beñe' ca' zjanac angl che' yesaclene' le',

na' yesoxe' le' cont bi chego' no yej.

⁷ Na' gož Jesúsen' gwxiye'na':

—Lecze can' nyojen Xtiža' Diosen', žan: “Bitw goncho Xancho Diosen' prueba še lede' can' že'na'.”

⁸ Da' yoble gwxiye'na' gozche'en le' to lo ya'a da' nacchgua sibe, na' blo'en le' yogo' nación dan' zjachi' doxen yežlion' len yela' zaca' yela' xdan chegaquen.

⁹ Nach gožen le':

—Yogo' da' quinga chle'edo' nga gonan' lo nao' še gwzoa xibo' lagua' nga gonxeno' neda'.

¹⁰ Nach gož Jesúsen' len:

—Beyej ca'ale Satanás. Nyojczten le'e Xtiža' Diosen' žan: “Cheyala' šejnilaže'cho Xancho Diosen' na' toze le' gonxencho.”

¹¹ Na' becuase Satanásen' cuite'na' beyejen ga yoble nach besežin to chope angl che Diosen' jasac-lene' le'.

Jesúsen' gwzolaküe' chyixjue'ede' diža' güen che Diosen' distritw Galilea

(Mr. 1:14-15; Lc. 4:14-15)

¹² Na' Jesúsen' beze'e distritw Judean' na' beyeje' distritw Galilea cate' bende' ba de Juanna' ližya.

¹³ Na' gwze'e yež Nazareten' jasoe' ciuda Capernaum dan' chi' cho'a nesdaon' do gan' zjachi' distritw dan' zjanzi' Zabulón na' Neftalí.

¹⁴ Na' dan' jayzoe' ciudan' goc can' gwna da' Isaías ben' be' xtiža' Diosen' cani' caten' bzoje' dan' ža:

¹⁵ Ca nac distritw Galilea gan' že' zan bene' cbi zjanaque' bene' Israel, gan' nita' distritw Zabulón na' distritw Neftalí dan' zjambane yešla'ale nesdaon' na' yegw Jordán,

¹⁶ nchol yichjlaždao' bene' ca' že' na'.

Perw Diosen' gwsele' to bene' gwlo'o to be'ni' xen lo' yichjlažda'ogaquen'.

Gosaque' ca bene' guat len yichjlažda'ogüen' le gosone' da' malen',

perw bena' gwseła' Diosen' ba bocobe' yichjlažda'ogaquen'.

¹⁷ Cana' gwzolaküe' Jesúsen' gwdixjue'ede' gwne':

—Le yetinje xtoła'len', le ba bžin ža cate' Diosen' ben' zoa yaban' nabi'e yichjlaždao' bene' yosozenague' che'.

Jesúsen' gwleje' tap bene' gwxen bel cont gosaque' txen len le'

(Mr. 1:16-20; Lc. 5:1-11)

¹⁸ Na' zej Jesúsen' cho'a nesdaon' che Galilea cate' ble'ede' chope bene' gwxen bel, Simón Pedro na'

be_{ne}' biše' Andrés, na' zjanite' chosozalē' yixjw dan' chesezende' belēn' lo' nisa'.

¹⁹ Nach gože' legaque':

—Le šo'o len neda'. Nacle be_{ne}' gw_wxen bel, na' chbejle bel lo' nis, perw na'a gona' cont gaxle be_{ne}' yesyechoje' lo da' malen'.

²⁰ Na' la' gosebejyichjte' yixjw chen' nach ja'aclene' Jesúsen'.

²¹ Na' Jesúsen' gwze'e yelate' na' ble'ede' Jacobon' xi'in Zebedeo na' len be_{ne}' biše' Juan, zjajo'e to lo' barcw len xagaque', chesyeyonšagüe' yixjw chegaquen'. Na' lecze gox Jesúsen' legaque' šja'aclene' le'.

²² Na' la' gosontie' barcon' lo na' xagaque' Zebedeon' na' ja'aclene' Jesúsen'.

Jesúsen' bsd blo'ede' be_{ne}' zan

(Lc. 6:17-19)

²³ Na' Jesúsen' gwyeje' yogo' yež ca' zjachi' gan' mbane Galilea, bsd blo'ede' be_{ne}' ca' zjaže' to to yodao' che chio' be_{ne}' Israel. Na' gw_wdixjue'ede' diža' güen can' nabia' Diosen' yichjlaždao' be_{ne}' yosozenag che'. Na' Jesúsen' beyone' be_{ne}' ca' chese'e bite'teze yižgüe'.

²⁴ Na' doxen nación Siria gw_wxoa diža' yogo' da' güen da' ben Jesúsen'. Nach be_{ne}' Siria ca' jasesane' yogo' be_{ne}' chesacšene lagüe'na', be_{ne}' chese'e zan yižgüe', be_{ne}' chesey chesela, be_{ne}' zjajo'o zjanyaz da' xigüe' yichjlažda'ogaque' len be_{ne}' chesaz šon na' be_{ne}' natsí' cuerp chegaquen'. Na' beyone' legaque'.

²⁵ Na' zan be_{ne}' gosao' le', be_{ne}' za'ac distritw Galilea na' distritw Decápolis, na' be_{ne}' za'ac ciuda

Jerusalén, na' bene' za'ac yezica'chle yež da' zjachi' distritw Judea, na' bene' za'ac yešla'a yegw Jordán.

5

Diža' dan' bsed blo'e Jesúsen' to lo ya'a
(Lc. 6:20-23)

¹ Na' Jesúsen' cate' ble'ede' bene' zan zjanžag, na' gwloe' gwchi'e to lo ya'a. Na' bene' ca' zjanaque' le' txen gosebigue' gan' chi'ena'.

² Nach gwzolao bsed blo'ede' legaque', gwne':

³ —Mbalaz zoa le'e chacbe'ele chyažjele gaclen Diosen' le'e, le ba chzenagle che Diosen' cont chnabi'e yichjlažda'olen'.

⁴ 'Mbalaz soa le'e chacyaše'laže'le, le Diosen' yeyoe'xenlaže' le'e.

⁵ 'Mbalaz zoa le'e chzexjwlaže'le len Diosen' na' len beñachen', le gon Diosen' cont gac lo na'le doxen yežlion' can' gwne'.

⁶ 'Mbalaz zoa le'e chzelaže'chgualē gacle bene' güen len Diosen', le ba cheyon Diosen' le'e bene' güen lagüen'.

⁷ 'Mbalaz zoa le'e cheyaše'le bene' yoble, le lecze ca' Diosen' yeyaše' yeži'ilaže'de' le'e.

⁸ 'Mbalaz zoa le'e ba nacle bene' laždao' xilaže', le šjayzoale txen len Diosen'.

⁹ 'Mbalaz zoa le'e chego'ole yela' chxenlaže' che bene' chesedile, le Diosen' ne' nacle xi'ine'.

¹⁰ 'Mbalaz zoa le'e chosoči chososaca' bene' le'e lagüe dan' chonle dan' nac güen lao Diosen', le chzenagle che Diosen' cont chnabi'e yichjlažda'olen'.

11 'Na' mbalaz soale še dan' chejnilaže'le neda' chesezi'diža' beṇe' le'e na' chososaca'zi'e le'e na' chosoṁie' diža' güenlaže' chele.

12 Le yebechgüe na' le soa mbalaz, le Diosen' gone' cont gacchgua da' güen chele cate' yežinle gan' zoe'na'. Can' chesonde' le'e, ca'czen' goson da' xoxxta'ocho len da' beṇe' ca' goso'e xtiža' Diosen' cani'.

Naccho ca zede' na' ca be'ni' len beṇe' že' yežlio nga

(Mr. 9:50; Lc. 14:34-35)

13 'Le'e nacle ca zede', le zede' chaclenen cont bi cuiayi' no yid bela', na' le'e chonle cont beṇachen' cbi chesonteque' da' mal. Perw še zeden' bich bi zxi' naquen, ḡnacxe goncho cont yeyaquen zxi' da' yoble? Na' bich bi zacan', lete cho'onchon na' gwlej gwšošj beṇe' len. Na' le'e še cbich gonle can' chazlaže' Diosen', nacle ca zede' dan' bich bi zxi' naquen.

14 'Na' le'e nacle ca be'ni' dan' chaclenle beṇe' cont cheseṇzede' nac chaclaže' Diosen' yesone'. Na' dan' chonle can', nacle ca to ciuda da' chi' to lo ya'a, le yogo'ze beṇe' chesele'eden'.

15 Notno gwguala' to yi' na' gw dosen' to caj, san chde'en le'e ze'e cont chseṇin' len yogo' beṇe' že' lo' yo'ona'.

16 Na' ca nac le'e, cheyala' soateze soale gonle da' güenna' cont yesele'e beṇe' na' yesonxene' Xacho Dios ben' zoa yaban'.

Jesúsen' bsed blo'ede' can' ža ley dan' bzoj da' Moisés

17 'Bitw gaquele še neda' za'a zedeyena' cont ley dan' bzoj da' Moisésen' na' dan' bosozoj yezica'chle

be_{ne}' ca' goso'e xtiža' Diosen' cani' bich yesonen žin. Za'a cont gac can' ža yogo'lo_l Xtiža' Diosen' dan' bosozoj be_{ne}' ca'.

18 Da' li žia' le'e, te che yežlio nga len da' ca' chle'echo le'e yaban', perw ne to letr dao' ne to punt dao' dan' nyoj le'e leyna' bi gac yexin, san gac yogo'lo_l dan' nžia' bia' Diosen' gac.

19 Da'nan' note'tezle še bi gon_{le} can' žanna', la'czla' še naquen la'zelagüe to da' dao', na' še lecze gwlo'ele be_{ne}' yoble bi yosozenague' chen, Dios ben' zoa yaba chnabi'e ne' bi nacle be_{ne}' blao len le'. Na' note'tezle še gon_{le} can' žanna', na' še lecze gwlo'ele be_{ne}' yoble yesone' ca', Diosen' ben' zoa yaba chnabi'e ne' nacle be_{ne}' blao len le'.

20 Chnia' le'e, be_{ne}' fariseo ca' na' bene' ca' chososed chosolo'e dan' bzoj da' Moisés bitw zjanac yichjlažda'ogaquen' güen lao Diosen'. Na' še yichjlažda'olen' bi gacchen güen lao Diosen' clel ca' che be_{ne}' ca', bitw yežin_{le} yaban' gan' zoa Diosen' chnabi'e.

*Da' malen' choncho še chža'a lježcho
(Lc. 12:57-59)*

21 Na' lecze bsd blo'e Jesúsen' legaque' gože'ne':

—Ba nezele can' bzejni'i Moisésen' be_{ne}' ca' gosenita' cani', gwne': “Nono gotle. Na' še no got ljež be_{na}che', justis ca' yesechoglagüe' che' cheya_{la}' gate'.”

22 Na' neda' žia' le'e, note'tezle še chža'a ljež be_{na}chle, zacan' yesechoglagüe' gata' castigw chele. Na' note'tezle še chzi'diža' lježle, zacan' yeson be_{ne}' blao ca' chesenabia' nación Israel chechon' castigw chele. Na' note'tezle še

chado'diža' lježle, zaca'czen' yesela' Diosen' le'e lo yi' gabil.

²³ Cheyała' soacho binlo len ljež benachcho. Na' la'czla' cate' ba zoale lo' yodao' cont gwnežjwle bi dan' gwnežjwle gonxenle Diosen', še šjasa'laže'le ba benle da' mal contr to bene' lježle,

²⁴ na'ze cheyała' gwcua'anle šlož dan' noxe'len' na' šjenle cont yezoale binlo len bene' lježlen'. Yeyoža' guaque šjasanle dan' ba gwlejele cont gonxenle Diosen'.

²⁵ 'Cate' to bene' gagüe' xya chele na' che'e le'e lao justis, šlac ngo'ole nezen' le yeyiljwlaže' nac gonle cont yezoale binlo len le' cont bi che'e le'e lao justisen'. Še bitw gonle ca', cate' žinle lao justisen', nach gone' le'e lo na' bene' ca' yososeyjue' le'e ližya.

²⁶ Da' li žia' le'e, bitw yebeje' le'e še biṇa' chixjwle doxen dan' chała'le.

Da' malen' choncho še chzoa xtocho

²⁷ 'Ba nezele ley dan' bzoj da' Moisésen' žan: "Bitw gata'lenle no'ole bi nac no'ol chele o bene' byo bi nac bene' chele."

²⁸ Na' neda' žia' le'e, note'tezle še chṇa'le to no'ole na' chzelaže'lene', ba napple doła'. Le tozeczce ca malen' ba chonle lo' lažda'olen' len dan' chon bene' chzoa xtoe'.

²⁹ 'Na' še yejlaolen' chonen cont gonle da' xinj, cheyała' cuejyichjle da' malen' chonle. Yejni'a cuiayi' yejlaolen' clcl ca cuiayi'le lo yi' gabilen' neche len.

³⁰ Na' še na'le chonen cont gonle da' xinj, cheyała' cuejyichjle da' malen' chonle. Yejni'a cuiayi' na'le clcl ca cuiayi'le lo yi' gabil neche len.

*Beṇe' ca' zjanšagna' bitw cheyala' yesyele'e
(Mt. 19:9; Mr. 10:11-12; Lc. 16:18)*

³¹ 'Lecze nezele ley dan' bzoj da' Moisésen' žan: "Note'teze beṇe' yele'e len no'ol che', cheyala' chas to yiš ga güen' diža' le besyele'ena'."

³² Na' neda' žia' le'e note'teze beṇe' chele'e len no'ol che', len neztede' no'ole chen' bitw naque' to no'ole chzoa xtoe', chone' cont gague' ca to no'ole beṇe' chzoa xto. Na' note'teze yošagna'lene' to no'ole beṇe' bela'a len beṇe' che', lecze tozcze ca da' xinj gone' len dan' chon beṇe' chata'lene' no'ol che beṇe' yoble.

Jesúsen' bzejni'ide' cheyala' güe'cho diža' li

³³ 'Na' lecze ba nezele can' bzejni'i da' Moisésen' da' xozxta'ocho ca': "Cate' gwzoale testigw Xancho Diosen', cheyala' gonle con can' ba gwnalen'."

³⁴ Perw neda' žia' le'e gwbat nale quinga che bite'teze: "Yabana' zoan testigw chia' cho'a diža' li". Bi nale ca' le yaba nan' zoa Diosen' chnabi'e.

³⁵ Na' neca nale: "Yežlion' zoan testigw chia' cho'a diža' li", le yežlion' den xni'a Dios. Neca nale: "Ciuda Jerusalénna' zoan testigw chia' cho'a diža' li", le naquen ciuda che Dios ben' naque' la'zelagüe beṇe' chnabia'.

³⁶ Na' neca nale: "Yichja' zoan testigw chia' cho'a diža' li", le bitw gac gonle cont yiša' yichjlen' yesyeyaquen da' šiš o yesyeyaquen da' gasj.

³⁷ Še žale guaquen, gacczen; še žale bi gac, bi gacczen. Le bichle diža' da' nale cont yesejle'e chele, zan' che Satanás dan' chnabia' da' xigüe' ca'.

*Bitw co'olaže'cho beṇe' chesegue'ede' chio'
(Lc. 6:29-30)*

38 'Nezele ley dan' bzoj da' Moisésen' žan: "Še to be_{ne}' gone' zi' yejlaolen', guac gon_{le} zi' yejlagüen', na' še to be_{ne}' xope' to la_{yle}, guac xople to la_{yen}'."

39 Perw neda' žia' le'e, bitw gwžon_{le} gwsaca'zi' be_{ne}' le'e. Še to be_{ne}' cape' šla'a xaga'le, le güe' dan' yešla'a.

40 Še to be_{ne}' chagüe' xya na' che'nde' que'e xcamisle, le güe' latje que'e len xado_n chelen'.

41 Na' še to be_{ne}' blao gone' byen šejlenlene' gua'le yoa' chen' do gašj hor, le šejlene' le guan' chop ca'te'le.

42 Na' še bi dan' ch_nabe be_{ne}' le'e, le güen'. Na' le cuej še bi da' ch_nabe' cuejlene'.

Cheya_{la}' gaquecho be_{ne}' chgue'e chio'

(Lc. 6:27-28, 32-36)

43 'Na' lecze ba nezele ley chelen' žan: "Cheya_{la}' gaquele be_{ne}' migw chele na' gue'ele be_{ne}' chgue'ede' le'e."

44 Perw neda' žia' le'e, cheya_{la}' gaquele be_{ne}' chgue'ede' le'e, na' cheya_{la}' nabele Diosen' gac güen che be_{ne}' chesezi'diže' le'e. Le gon bin_{lo} len be_{ne}' chesegue'ede' le'e, na' le yol güiž Diosen' cont gac güen che be_{ne}' ca' chososacazi'e le'e.

45 Še gon_{le} ca', gwlo'ele nacle xi'in Diosen' ben' zoa yaban'. Len' chone' chla' gwbižen' cont chsenin' che be_{ne}' zjanaque' be_{ne}' güen lente che be_{ne}' zjanaque' be_{ne}' mal. Na' lecze chone' yejw par be_{ne}' zjanaque' be_{ne}' güen len be_{ne}' zjanaque' be_{ne}' mal.

46 Še chaquele šinze be_{ne}' chacde' le'e na' bi chaquele be_{ne}' yoble žbixchen' chbezle gon Diosen' da' güen chele? Con can' cheson be_{ne}'

güechixjw ca' chonle, bene' ca' žale zjanaque' bene' xi'achgua.

47 Na' še con chguaple tiox bene' biše' lježle ca'ze ¿chaquele güenna' chonle da' chonle ca'? Bitw chonle güen, le ca'czen' cheson bene' ca' bi zjanombi'e Diosen'.

48 Cheyala' gacle bene' šagüe' bene' güen len note'teze bene' con can' nac Xacho Diosen' ben' zoa yaban' bene' šagüe' bene' güen.

6

Jesúsen' blo'ede' naquen' cheyala' goncho da' chazlaže' Diosen'

1 'Cate' gonle to da' güen, bitw gonlen cont yesele'e bene' can' chonlen' na' yesonxene' le'e, le še chonle ca', Xacho Dios ben' zoa yaba bitw gone' ga gac güen chele.

2 Da'nan' cate' gwnežjwle to bene' da' chyažjde', bitw gwnežjwlen par yeseneze bene' ca' dan' chonlen'. Bene' gwxiye' ca' chosonežjue' bi da' chosonežjue' do lo' yodao' na' do chanez par yeseneze bene' na' yesene' güen chegaque'. Da' li žia' le'e, ba gosacxencze' lagüe da' chesone' ca', perw Diosen' bitw gone' ga gac güen chegaque' še ca'.

3 San le'e, še bi da' gwnežjwle to bene', le gwnežjon šižize.

4 Gonlen ga cbi yesacbe'e bene' na' cbi yesonxene' le'e, nach Xacho Diosen' ben' chle'ede' yogo' dan' choncho gone' ga gac güen chele ga yesele'e yogo' bene'.

*Bsed blo'e Jesúsen' nac cheya_la' yol_l güižcho Dios
(Lc. 11:2-4)*

⁵ 'Cate' yol_l güižle Diosen', bitw gon_le can' cheson be_ne' gwxiye' ca'. Legaque' chesyebede' chesezeche' chosol_l güiže'ne' lo' yodao' c_hegaque', na' do squin chanez. Chesone' ca' cont yesele'e be_ne' can' chesone'na'. Da' li žia' le'e, ba gosacxenczen' lagüe da' chesone' ca', perw Diosen' bitw gone' ga gac güen c_hegaque' še ca'.

⁶ Na' cate' yol_l güižle Diosen', le yeyo'o lo' yo'o c_hele na' gwseyjwle puerten' na' güe'le diža' len Diosen' ben' cbi chle'echo la'czla' zoe' len chio'. Na' Xacho Diosen' ben' chle'ede' yogo' dan' chon_le gone' ga gac güen c_hele.

⁷ 'Na' cate' yol_l güižle Diosen' bi güe'le diža' zan can' cheson be_ne' ca' bi zjanombia' Diosen'. Legaque' chesacde' lagüe' dan' cheso'e diža' zan Diosen' gwzenague' c_hegaque'.

⁸ Bitw gon_le can' chesone'na'. Ca nac Xacho Diosen', cate' za' nabelenen' ba nezczedede' bi dan' chyažjele.

⁹ Quinga yol_l güižlene':

Xato' be_ne' zoa yaba, chn_labto' yogo'lo_l be_ne' yesonxene' le'.

¹⁰ Zelaže'to' nabi'o yichjlaždao' yogo' neto' be_nach. Gacšca can' chazlažo' yežlio nga can' chac yabana'.

¹¹ Ca nac dan' che'ej chagwto' tža tža, be_nšcan na'a.

¹² Na' bezi'xenšca c_heto', le lencze neto' chezi'xento' c_he ljež be_nachto' bite'teze da' chesonde' neto'.

¹³ Na' bitw go'o latje soa da' gwžigan' neto' gonto' da' mal, san bcuas bcue'ejšca neto' len da' mala'.

Le'na' chnabi'o na' napo' yela' guac na' naco' bene'
zaca' juisyw toli tocaṇe.

Ca'czen' gacšca.

¹⁴ Na' še chezi'xenle che ljež benachlen' bite'teze
da' chesonde' le'e, lecze Xacho Diosen' ben' zoa
yaban' yezi'xene' xtolala'len'.

¹⁵ Perw na' še le'e bi chezi'xenle che ljež
benachle, lecze ca' Xacho Diosen' bitw yezi'xene'
chelen'.

Jesúsen' bzejni'ide' nac goncho gwbas

¹⁶ 'Cate' le'e gonle gwbas cont gonxenle Diosen',
bitw gon cho'alaolen' ca che bene' chegüine'chgüe',
can' cheson bene' gwxiye' ca'. Legaque' chesone'
ca' contze chesele'e bene' le chesone' gwbas na'
yesonxene' legaque'. Da' li žia' le'e, ba gosacxencze'
lagüe da' chesone' ca', perw Diosen' bitw gone' ga
gac güen chegaque' še ca'.

¹⁷ San le'e cate' gonle gwbas, le gwpa'a yichjle na'
le chib cho'alaole.

¹⁸ Le gon ca' cont bi yesache'e bene' chonle gw-
bas, san gache'e toz Xacho Dios ben' zoa len chio'
la'czla' bi chle'echone'. Na' Xacho Diosen' ben'
chle'e yogo' da' choncho gone' cont gacxenle.

Da' ca' zjazaca'chgua yaba gan' zoa Diosen'
(Lc. 12:33-34)

¹⁹ 'Bitw co'ošagüe'le da' zcha'o da' zjanac da'
zaca' da' zjade yežlio nga, le yesebiayin'. Bal da'
zjade yežlio nga chesaljen be dao' chesagwban',
na' yebalen chesezen xche'en, na' lecze chaš bene'
gwban na' yeseque'en.

²⁰ San le gaque Diosen' cont gone' da' šagüe' da'
güen chele da' bi te chen cate' yežinle yaban' gan'

zoe'na', da' bi šo'ba', na' n̄eca sen x̄che'en, na' n̄eca gac šo'bene' gwban yeseque'en.

²¹ Le gan' de dan' chaquelen' na' zoa yichjlažda'olen'.

Žia yejlaochō cont chle'echo

(Lc. 11:34-36)

²² Žia yejlaole cont chle'ele. Še bitw bi chaquen, chle'eczele bin̄lo.

²³ Perw še yejlaolen' bi naquen bin̄lo, bitw chle'ele. Ca'czen' naquen len yichjlažda'olen'. Da' licze leca n̄chol yichjlažda'ole še bi chzenagle che Diosen'.

Bitw gac gaquecho Diosen' na' gaquetecho mechw

(Lc. 16:13)

²⁴ Notno gac gon žin len čhope x̄ane' to ši'ize, le še gone' ca', gue'ede' to x̄an žin̄na' na' gacde' yetoe'; o gone' žin che toe' do yichj do laže' na' che ben' yeto gonen' to chža'alaže'ze. Lecze ca' le'e bitw gac gonle x̄šin Diosen' do yichj do laže'le na' gonte x̄šinle cont gacle bene' gw̄ni'a.

Diosen' chapši'e xi'ine' ca'

(Lc. 12:22-31)

²⁵ Da'n̄an' žia' le'e, bi gacžejlaže'le bi da' ye'ej gagwle šlac mbanle, na' lecze ca' bi gacžejlaže'le che xałana'le. Zaca'ch yela' mban chelen' ca yela' guagw. Lecze ca' cuerp chelen', zaca'chen ca xałana'le.

²⁶ Le gon x̄bab ca nac be ca' zjažia x̄il ben' chesaš lo be', bitw chesazba', bitw cheselapba', n̄eca zoa da'a xoa' chegacha', perw na' Xacho Diosen' ben'

zoa yaba chguagwcze'ba'. ꞑNacchle zaca' le'e ca be ca' zjažia xilen'!

²⁷ Na' ñe tole bi gac yoston cuinle gašje metr še con cue' yichjle tonle.

²⁸ 'Na' ꞑbixchen' chbec yichjle xałana'le? Le gon xbab ca nac yej ca' da' zjaze yixe' chesecha'oczen'. Bibi žin chesonen, ñeca chesaljen do.

²⁹ Na' žia' le'e, da' rey Salomón gocue' lache' güen juisyw, perw bitw bežinlaže' xałane'na' ca yela' xdan che yej ca'.

³⁰ Diosen' none' xdan da' ca' ze yixen' la'czla' to chop žaze nitan' na' chosozeyen'. Nacchxe gon Diosen' len le'e gwleccze yichje' gone' yogo' da' chyažjele, le'e late' lasze chejle'le che'.

³¹ Da'nana' bitw cuec yichjle che bi dan' chyažjele, ñale': “ꞑBin' ye'ej gagwcho na' bin' gacwcho?”

³² Bene' ca' bi chesonxene' Diosen' con chesoe'laže' bi da' gata' yese'ej yesagüe' na' che xałana'gaque'. Perw Xacho Diosen' ben' zoa yaban' ñezcede' bi da' ca' chyažjele.

³³ Cheyała' güe'laže'le gwzenagle che Diosen' cont ñabi'e yichjlažda'olen' na' cont gacle bene' güen len le', lenna' naquen da' žialaoch, na' yogo' da' ca' chyažjele, goncze Diosen' len.

³⁴ Bitw cuec yichjle che bi dan' gac gwxe güižj, le decze da' cuec yichjcho tža tža. Da'nana' to to ža con cuec yichjcho che dan' chac ca hora'.

7

*Bitw zaca'cho ñacho zjanap bene' dola'
(Lc. 6:37-38, 41-42)*

1 'Bitw gonle xbab zaca'le nale bene' zjanape' doła'. Še nale che bene' zjanape' doła', ca'cze Diosen' ne' le'e naple doła'.

2 Can' chosbaga'le bene' žale zjanape' doła', lecze can' yosbaga' Diosen' le'e ne' naple doła'. Con can' chonle len bene', lecze can' gon Diosen' len le'e.

3 ¿Bixchen' chna'le beb dao' dan' yo'o lo' yejlaobene' lježle na' bi chacbe'ele naquech beb xen dan' yo'o lo' yejlaolen'?

4 Na' še le'e yo'o to da' xench lo' yejlaolen' ¿nacxechen' che'le bene' lježlen': "Ben yebeja' beb dao' dan' yo'o lo' yejlaguon"?

5 ¡Bene' güexoayag! Zgua'tec le yebej beb xen dan' yo'o lo' yejlaolen', nach le'ele binlo cont yebejle dan' yo'o lo' yejlaobene' lježle.

6 'Perw bitw güe'tezle xtiža' Diosen' len bene' ca' cheson yichjlaogüe' cbi chesacłaže' yosozenaguen', le xož yesonde' le'e znia ca cheson bał beco' še bi chazłaže'ba' bi da' chosonežjue'ba'. Na' še güe'tezle xtiža' Diosen' len bene' ca' cheson yichjlaogüe', xož yosolej yosošošje' diža' dan' güe'lenlene'. Ca' cheson coš len da' cbi chesacłaže'ba' yesagwba'.

Le nabe Diosen' bi dan' nabelene', le gonczen'
(Lc. 11:9-13; 6:31)

7 Še žan bi da' chyažecho, chnabchon. Še žan to da' chaclaže'cho želecho, chyiljwchon. Še žan chaclaže'cho saljw bene' puert che' na' necho cho'a puerta' cont saljue'. Na' ca'cze cheyala' ye'le Diosen' cate' bi da' chyažjele, o bi da' chaclaže'le gone'.

⁸ Na' note'tezle še bi da' ch̄nabelene', gon̄czen'. Na' še bi dan' che'nele nezele, gwzejni'iczden' le'e. Na' še žan chaclaže'le gac to da' gac, yoḷ güižle Diosen' can' chon to beṇe' ch̄nie' cho'a puert, nach Diosen' gone' cont gacczen.

⁹ 'Na' le'e xa bidao', še xi'inle nabebe' le'e yetextil ḷgwnežjwlebe' to yej?

¹⁰ Na' še nabbe' yid beḷ gagwbe', ḷgwnežjwlebe' to be xigüe'?

¹¹ La' nacle beṇe' mal, nezele chnežjo xi'inle to da' güen. Nacchxe güen gon Xacho Diosen' ben' zoa yaban' len beṇe' ch̄nab lagüe'na' bi dan' chyažjde'.

¹² 'Na' con yogo' da' güen da' chaclaže'le yeson benachen' len le'e, lecze ca' cheyaḷa' gonle len legaque', le can' zejen da' nyoj le'e ley dan' bzoj da' Moisésen' na' dan' bosozoj da' beṇe' ca' gosoe xtiža' Diosen' cani'.

*Nez da' yežin yaban' zaca'leben ca to nez las
(Lc. 13:24)*

¹³⁻¹⁴ 'Lao yela' mban checho chope nez de, to nez güen na' to nez mal. Nez malen' zaca'leben ca to nez yo to nez laga' dan' chaquele leca mba naquen cont talen, na' beṇe' zan cheseque'en. Perw cheyaḷa' gonle byen šo'le nez güenṇa' la'czḷa' chaquele naquen ca to nez las, to nez zdebe, le nez malen' chežinen gabil gan' saca'zile toḷi tocaṇe. Na' nez güenṇa' chežinen yaba ga banle toḷi tocaṇe.

*Dan' choncho chlo'en bin' yo'o lo'yichjlažda'och
(Lc. 6:43-44)*

¹⁵ 'Cheyaḷa' gwsaca'le cont bi šejle'le xtiža' beṇe' ca' chesonlaže' chesene' xtiža' Diosen' cheseyixjue'ede'. Xdanchgua cheso'e dižan', le

chesaclaže' gonle xbab zjanaque' bene' güen. Perw zjanaque' bene' laždao' xi'a na' chesaclaže' yosožiaye'e le'e.

¹⁶ Con can' nac da' chbia to to yaguen' nezecho bi yaga'. Ca nac yag yeše' bitw chbian uvas na' neca yag lay chbian yixgüigw. Ca'czen' cheyala' gache'ele bene' ca' yeseziye'e le'e cate' le'ele dan' chesone'na'.

¹⁷ Yag dan' nac yag güen, frut güencze chbian, na' yag da' bi nac güen, lecze frut da' bi nac güen chbian.

¹⁸ Bitw nacho to yag frut güen chbian frut da' bi nac güen, na' neca nacho dan' bi nac güen chbian da' nac güen.

¹⁹ Na' yogo'te yag frut da' bibi chbia, chog xan yaga' len na' gwzeyen'.

²⁰ Na' can' nac dan' cheson to to bene', nezecho še zjanaque' bene' güen o bene' mal.

Gague yogo' bene' yesyežine' gan' zoa Diosen' chnabi'e
(Lc. 13:25-27)

²¹ 'Bene' zan chese'e neda': "Naco' Xana", perw gague yogüe' yesyežine' yaban' gan' zoa Diosen' chnabi'e. Bene' ca' cheson can' chazlaže' Xa' Diosen' ben' zoa yaban', legaczen' yesyežine' yaban' gan' zoe'na'.

²² Cate' žin ža yosodie' cuent lao Diosen', bene' zan yesi'e neda': "Xana, goclen neto' na'a, le ba gwduxjue'eto' xtižo'na'. Na' lecze ca' bza' bzetjto' lao' bebejto' da' xigüe' ca' zjajo'o zjanyaz yichjlaždao' bene'. Na' lecze bza' bzetjto' lao'na' bento' da' zan yela' guac."

23 Perw na' yapa' legaque': "Bitw nombi'a le'e. Le šjaya'ac ca'ale le'e be_{ne}' güen da' xi_{nj}."

Chope be_{ne}' na' yo'o da' chon to toe'

(Mr. 1:22; Lc. 6:47-49)

24 'Be_{ne}' chzenag xtiža'na' na' chone' can' žia'na' zaca'lebde' ca to be_{ne}' sina' be_{ne}' ben liže' na' gwdixjue' lenen len yej gual.

25 Na' goc yejw zil juisyw na' betj yegw gwyechjen liže'na' na' gwyechj be' bdono'. Perw bitw gosezoen yosochixen len dan' gwdixjue' lenen de yej.

26 Na' be_{ne}' chzenag xtiža'na' perw bitw chone' can' žia'na', zaca'lebde' ca to be_{ne}' tont be_{ne}' bzoa ližen' lo yox.

27 Na' goc yejw zil juisywna' na' betj yegon' gwyechjen liže'na' na' gwyechj be' bdono'. Nach ližen' bebixen gwžiayin'.

28 Na' cate' beyož be' Jesúsen' diža' ca', be_{ne}' ca' že' na' besyebande' can' bsed blo'eden'.

29 Le can' bzejni'ide' nachia' nezde' cayanen' nac xbab che Diosen', gague bzejni'ide' can' chosozejni'i be_{ne}' ca' chososed chosolo'e ley dan' bzoj da' Moisésen'.

8

Jesúsen' beyone' to be_{ne}' che'ede' yižgüe' dan' nzi' lepra

(Mr. 1:40-45; Lc. 5:12-16)

1 Be_{ne}' zan zesyenagüe' Jesúsen' cate' beyetje' ya'ana'.

² Nach to be_{ne}' che'ede' yižgüe' dan' nzi' lepra gwbigue' lao Jesúsén' na' bzoa xibe' lagüe'na' gože'ne':

—Xana', še chaclažo' guac yeca'o yižgüe' dan' che'eda'.

³ Nach Jesúsén' bli ne'e na' gw_xoen' yichje' na' gože' le':

—Chaclaža' yeyacdo'. Beyaque.

Nach la' beyactie' ca nac yižgüe' dan' che'ede'.

⁴ Nach Jesúsén' gože' le':

—Notno yo'o can' ba beyona' le'. Con gwyej ja_{na}' b_xoza' cont le'ede' ba_{ch} beyacdo'. Na' bnežjw da' cheya_{la}' gwnežjo' dan' non Moisésén' mandadw cont yeyaco' xilaže' len ley che Diosen'. Ben ca' cont yogo' be_{ne}' yese_{ne}zde' ba beyacdo'.

Jesúsén' beyone' xmos to soldadw

(Lc. 7:1-10)

⁵ Na' cate' bežin Jesúsén' Capernaum to xan soldadw be_{ne}' Roma la' bšagte' le'. Na' gota'yoede' Jesúsén',

⁶ gože'ne':

—Xana', xmosan' die' ližan' chacšenchgüede'. Natsi' cuerp chen' na' chžaglaochgüe'.

⁷ Nach Jesúsén' gože' xan soldadoa':

—Sa'lena' le' na' yeyona'ne'.

⁸ Perw na' xan soldadoa' gože'ne':

—Xana', bitw naca' be_{ne}' zaque' par sa'o liža'na'. Ngateze ben mandadw yeyac xmosan' na' yeyacze'.

⁹ Neda' zoa be_{ne}' chnabi'e neda', perw lecze nita' soldadw chia' na' chnabia'gaca'ne'. Cate' chapa' toe': “Gwey”, na' cheje', na' cate' chapa' yetoe': “Da”, na' chide', na' cate' chapa' xmosa': “Da' nga

gono'", na' chonen'. Nan' ne_zda' con nao' yeyac xmosan' na' yeyaccze'.

¹⁰ Na' Jesúsen' cate' bende' xtiža' xan soldadoa' bebande' na' gože' be_ne' ca' zjanagüe' le'na':

—Da' licze žia' le'e, ne toze be_ne' Israel bi_na' šejnilaže'chgüe' neda' ca benga bi naque' be_ne' Israel.

¹¹ Žia' le'e, be_ne' zan za'ac doxen yežlion' šjasyenite' txen len da' xoxxta'ocho Abraham, Isaac na' Jacob yaban' gan' zoa Diosen' chnabi'e na' yesebi'e cho'a mes yesagüe'.

¹² Na' ca nac be_ne' nación Israelen' ben' gwlej Diosen' cont yesenite' len le', choj be_ne' zan bitw yesejnilaže' neda'. Da'nan' se_le' legaque' lo' yi' gabil gan' nac cho_l na' yesebežyaše' na' yesagwxejte laye' dan' yesežaglaochgüe'.

¹³ Beyož gwna Jesúsen' ca' nach gože' xan soldadoa':

—Guac yeyejo'. Yeyaque xmoso'na', con can' chejli'o gac che'.

Na' xmos xan soldadoa' la' beyactede'.

Jesúsen' beyone' taobi'in che Pedroa'

(Mr. 1:29-31; Lc. 4:38-39)

¹⁴ Na' gwyej Jesúsen' liž Pedroa', na' ble'ede' taobi'in che Pedroa' die' yo'e da' la.

¹⁵ Jesúsen' be_xue' ne'e na' la' bechojtie' da' lan'. Nach la' gwyaste no'olen' bsi_ni'e da' gose'ej gosagüe'.

Jesúsen' beyone' be_ne' zan

(Mr. 1:32-34; Lc. 4:40-41)

¹⁶ Na' cate' ba gw_xin, besežin be_ne' gan' zoa Jesúsen' zjanči'e be_ne' zan zjajo'o zjanyaz da'

xigüe' yichjlažda'ogaquen'. Jesúsen' con bene' mandadw na' besyechoj da' xigüe' ca'. Lecze beyone' yogo' beñe' ca' chesacšene.

17 Bene' ca' cont goc can' ža Xtiža' Diosen' dan' bzoj da' Isaiás che' cani', žan: “Le'na' yeque'e yela' chžaglao checho na' yeque'e yogo' yižgüe' chechon'.”

Can' gož Jesúsen' beñe' ca' gosaclačže' yesa'ogüe' le' (Lc. 9:57-62)

18 Gwde na' ble'e Jesúsen' ba besežin beñe' zan zjanyechjde' le', nach bene' mandadw len beñe' ca' zjanaque' le' txen cont yeselague' yešla'a nisdan'.

19 Na' bchoj to beñe' chsed chlo'ede' dan' bzoj da' Moisésen' nach gwbigue' lao Jesúsen' na' gože'ne':

—Maestrw, sa'lena' le' gate'tez šejo'.

20 Nach gož Jesúsen' le':

—Nita' xišna' beza' na' lecz chesyežin xišna' be dao' ca' zjazoa xil, be chaš le'e yaba, perw bibi xišna' neda' de ga yezi'laža', neda' naca' ben' gwseła' Diosen' golja' beñach.

21 Na' bchoj yeto ben' naque' Jesúsen' txen na' gože'ne':

—Xana', sa'lena' le' perw za' got xa'. Beňšca latje zgua'tec šjaycuaša'ne'.

22 Jesúsen' gože'ne':

—Yo'o len neda'. Beñe' ca' zjanac yichjlažda'ogüe' ca' che beñe' guat, legaque' guaccze yosocuaše' yezica'chle beñe' guat.

Jesúsen' bcueze' to be' bdono' lo' nisdan' (Mr. 4:35-41; Lc. 8:22-25)

23 Beyož be' Jesúsen' diža' ca', gwyo'e lo' barcon' len beñe' ca' zjanaque' le' txen.

24 Na' šlac zej barcon' lo nisen' gwzolao gwyečh
to be' bdonon' na' nisdaon' leze chas chatan' na'
gwzolao cheyož nis lo' barcon', perw ba chtas
Jesúsen'.

25 Nach bosyosbane' le' gosi'ene':

—¡Xanto'! ¡Bosla chio'! ¡Bach chbiayi'cho!

26 Nach Jesúsen' gože' legaque':

—¿Bixčhen' chžebtecle ca'? ¿Nacxečhen' bi
chejle'le čhia'?

Na' gwyase' na' gwdile' be' bdonon' len nisdaon',
na' la' gosebe'žiten.

27 Na' bene' ca' zjanaque' Jesúsen' txen besye-
bande' can' bene'na', nach gose' lježgaque':

—¿Noxe bengá? lente be' bdonon' na' len nisdaon'
chosozenaguen che da' že'.

*Chope bene' Gadara zjajo'o zjanyaze' da' xigüe'
(Mr. 5:1-20; Lc. 8:26-39)*

28 Na' besežine' yešla'a nisdaon' gan' chi' laž bene'
Gadara ca'. Na' cate' bechoj Jesúsen' lo' barcoa'
bosošag čhope bene' le', bene' zjajo'o zjanyaz da'
xigüe' yichjlažda'ogaque'. Bene' quinga ba nite'
capsantw na' gosacchgüe' bene' znia juisyw len
bene' chesyěžague' na' gague no chac ta tnez.

29 Na' bososye'e gose'e Jesúsen':

—¿Bixčhen' chgoša' chlaže' čchio' len neto', Jesús?
Naco' dogualje Xi'in Dios. ¿Zao' gwsaco' neto' na'a
cate' biča' žin ža si'to' castigw?

30 Na' gała'ze chesaš zan coš chesagwba'.

31 Nach da' xigüe' ca' gosata'yoen Jesúsen'
gose'en le':

—Še yebejo' neto' yichjlaždao' bene' quinga, gwseła' neto' gan' nita' coš ca' na' beŋ latje šjajo'oto' yichjlažda'oban'.

³² Nach gož Jesúsen' legaquen:

—Le šjajo'o.

Nach besyechojen yichjlaždao' bene' ca' na' jaseyo'on yichjlaždao' coš ca'. Na' besyeyetjes coš ca' le'e ya'a gan' nita'ban', na' jaselažo'ba' lo' nesdaon' ga gosatba' gose'ejba' nis.

³³ Na' bene' ca' chosoyoe' cošen' besele'ede' dan' ba goquen na' bosyoxonje' jasyeyeže' bene' lagüe' yež yogo' can' ba goquen' na' can' ba besyeyac bene' ca' goso'o gosaz da' xigüen' yichjlažda'ogaquen'.

³⁴ Nach yogo' bene' ca' že' yeža' jasešague' Jesúsen' na' cate' besele'ede'ne' gosata'yoede' le' yeze'e lažgaquen'.

9

*Jesúsen' beyone' to bene' bi chda šla'a ni'a ne'e
(Mr. 2:1-12; Lc. 5:17-26)*

¹ Nach Jesúsen' beyo'e lo' barcon' len bene' ca' zjanaque' le' txen besyelaque' yešla'a nesdaon' par besyežine' Capernaum gan' ba gwzoacze' sša.

² Na' besežin xonj bene' zjanlene' to bene' xinj bene' bi chda šla'a ni'a ne'e, zjanxoe' le' to lo' cam dao'. Cate' gocbe'e Jesúsen' le' gosejnilaže'ne' nach gože' bene' güe'na':

—Bebe xi'ina'. Ba bezi'xena' xtołon'.

³ Na' bal bene' ca' chososed chosolo'ede' dan' bzoj da' Moisésen' gosende' dan' gož Jesúsen' bene' güe'na' na' gosone' xbab lo' yichjlažda'ogaquen'

gosene': "Benga chñie' diža' bya' che Dios chne' ca', le chon cuine' ca Dios."

⁴ Jesúsen' gočbe'ede' ca nac da' cheseza'laže', na' gože' legaque':

—¿Bixchen' chza'laže'le ca' lo' yičhjažda'olen'?

⁵ Še yapa'ne': "Ba bezi'xena' xtolo'na'," bi nezele še napa' yela' gwnabia' cont yezi'xena' xtolen'. San še yapa'ne': "Gwyas na' gwda", na' nachbia' še napa' yela' guac gac can' gwnian'.

⁶ Perw neda' naca' bene' gwsela' Dios golja' beñač gwlo'eda' le'e na'a zoa' yežlio nga napa' yela' gwnabia' cont yezi'xena' xtola' beñačen'.

Nach gože' bene' xinja':

—Beyas, beyoa' xcamon' na' beyej ližo'.

⁷ Na' beyas bena', beže'e zjayde' liže'.

⁸ Na' bene' ca' besele'ede' can' goquen' be-sežebchgüe'. Na' gosonxene' Diosen' dan' be'e yela' guac che Jesúsen'.

*Jesúsen' gwleje' Mateo cont goque' txen len le'
(Mr. 2:13-17; Lc. 5:27-32)*

⁹ Na' Jesúsen' gwdie' latje gan' chi' Mateo chchixjue' impuesto. Na' cate' ble'ede' le' na' gože'ne':

—Da len neda'.

Na' gwzoža' Mateon' gwejlene' le'.

¹⁰ Ca' goquen' ba chi' Jesúsen' liž Mateon' ba che'ej chagüe' txen len zan bene' güečhixjw na' len yebałe bene' güen da' xinj na' len bene' ca' zjanaque' txen len le'.

¹¹ Na' bene' fariseo ca' cate' besele'ede' chi' Jesúsen' txen len bene' ca', gose'e bene' ca' zjanaque' le' txen:

—¿Nacxechen' ben' chsed chlo'ede' le'e che'ej chagwlene' txen beṇe' güeḥixjw na' yebale beṇe' güen da' xinj?

¹² Na' cate' Jesúsēn' bende' xtiža'gaquen' na' gože' legaque':

—Beṇe' cbi chesacšene bitw cheseyažjde' beṇe' güen rmed. Beṇe' chesacšende', legaquen' cheseyažjde' beṇe' güen rmed.

¹³ Le šjased bi zeje Xtiža' Diosen' dan' nyojen žan: “Chaclaža' yeyaše' yeži'ilaže'le beṇe', gague con gotle beyixe' gonxenle neda'.” Gague beṇe' ba zjanaque' beṇe' güen len Diosen' zedeneyoeda' cont yesyētinjde' xtolen', san beṇe' güen da' xinjen'.

Gosenabde' Jesúsēn' bixchen' beṇe' ca' zjanaque' le' txen bi gosone' gwbas

(Mr. 2:18-22; Lc. 5:33-39)

¹⁴ Nach beṇe' ca' chesone' txen len Juan ben' bzoe' beṇe' nis gosebigue' lao Jesúsēn' na' gose'ene':

—Neto' na' len beṇe' fariseo ca' chonchguato' gwbas, perw beṇe' ca' zjanaque' le' txen bi chesone' gwbas. ¿Bixchen'?

¹⁵ Nach gož Jesúsēn' legaque':

—¿Guac yesezoa beṇe' yela' güine' beṇe' chesaxe' to ga chac yela' güešagna' šlac ben' bšagnan' zoalene' legaque'? Še zoa ben' bšagnan' bi gac yesegüine'de'. Perw žin ža cate' bich soe' len legaque', cana'ch yesone' gwbas. Na' ca'cze naquen len neda' na' len beṇe' ca' zjanaque' neda' txen.

¹⁶ 'Nono zoa beṇe' chḥchine' lache' cobe cont yoda' xe' da' de'exo', le lache' coben' yeben' cate'

čhiben' na' čhezan' lache'exon', na' gan' nchezan' gacchen da' xen.

17 Na' lecze neca zoa bene' chgue'e vino cobe lo' bzod yide'exo', le vino coben' chson' yide'exon' na' laje vino na' yesebiayi' chopen. San chesegue'e vino coben' lo' yid cobe cont bitw cuiayi' vinon' len yiden'.

Jesúsen' beyone' xi'in Jairo na' beyone' yeto no'ole bene' gwdane' xe'

(Mr. 5:21-43; Lc. 8:40-56)

18 Na' ne' choe'te Jesúsen' dižan', bžin to bene' gwnabia' bzoa xibe' lao Jesúsen' na' gože'ne':

—Za' gotte to xi'ina' no'ole. Yo'ošca xoa taco' yichjbe' cont yebambe'.

19 Na' gwzoža' Jesúsen' na' gwče'e bene' ca' zjanaque' le' txen ja'aclene' bene' gwnabian'.

20 Na' šlac zja'aque' liž bene' gwnabian' zej to no'ole nagüe' legaque', bene' ba goc šižinw iz chzoe' gwbao', na' bene' byen gwbigue' cože' Jesúsen' gwdane' lox xen'.

21 Le bene' xbab lo' yichjlažda'ogüen', gwne': "Con še ba gwdana' xen' nach yeyacda'."

22 Na' gwyečhj Jesúsen' ble'ede' no'olen', gože'ne':

—Bendiplažo' xi'ina'. Ba beyacdo' dan' chejni-lažo' neda'.

Na' la' beyactede'.

23 Cate' bžin Jesúsen' liž bene' gwnabian' na' ble'ede' bene' zan zjaže' chesone' sšag chese-bežchgüe' na' ba nita' bene' chosocuež bžejo par yosocuaše'be'.

24 Na' gože' legaque':

—Le yechoj ngale. Bi' no'ole daon' bi_na' gatbe', san chtasben'.

Na' be_ne' ca' bosoxiže' goson_le' che'.

²⁵ Na' beyož bešaše' yogo'lo_l be_ne' ca', nach gwyo'o Jesúsen', be_xue' taca' bi' no'ol guaten', na' beyasbe'.

²⁶ Na' ca' nac yela' guac dan' ben Jesúsen', gw_xoa diža' c_hen yogo' yež dan' zjachi' do na'.

Jesúsen' beyone' c_hope be_ne' l_{ch}ol

²⁷ Cate' beza' Jesúsen' len be_ne' ca' zjanaque' le' txen, ja'aclen c_hope be_ne' l_{ch}ol le_gaque' na' gosene' zižje:

—Le' naco' xi'i_n diaža c_he da' rey David, beyaše'laže'šca neto'.

²⁸ Na' cate' Jesúsen' len be_ne' ca' zjanaque' le' txen besežine' yo'o gan' zjanite' na' besyeyo'e, na' le_cze goso'o be_ne' l_{ch}ol ca'. Nach Jesúsen' gože' le_gaque':

—¿Chej_le'le guac gona' cont yele'ele?

Nach gose'ene':

—Chej_le'to' X_{an}to'.

²⁹ Nach Jesúsen' gwdane' yejlaogaquen', na' gože' le_gaque':

—Yele'ele, le chejnilaže'le neda'.

³⁰ Nach besyeyac yejlaogaquen' besyele'ede'. Na' Jesúsen' gože' le_gaque' bicze yeso'e diža' can' goc besyeyac yejlaogaquen'.

³¹ Na' besyeya'aque' na' gate'tez ja'aque' doxen distritw Galilean' goso'e diža' ca' nac dan' ben Jesúsen' len le_gaque'.

Jesúsen' beyone' to be_ne' bi' goc _nie'

³² Na' cate' besyeya'ac be_{ne}' ca', la' besežinte be_{ne}' yoble zjanči'e to be_{ne}' bi goc nie', na' yo'o yaz da' xigüen' yichjlažda'ogüen'.

³³ Jesúsen' bebeje' da' xigüen' na' la' be_{ne}te bena'. Na' be_{ne}' zan besele'ede' can' goquen' besyebanchgüede', na' gosene':

—Chio' be_{ne}' Israel, da' nechon' za' ble'echo yela' guac dan' nac ca'.

³⁴ Perw na' be_{ne}' fariseo ca' gosene':

—Satanás dan' nac xan da' xigüe' ca' chacle-nen le' cont chebeje' da' xigüen' zjajo'o zjanyaz yichjlaždao' be_{ne}'.

Jesúsen' cheyaše' cheži'ilaže'de' be_{na}chen'

³⁵ Na' Jesúsen' len be_{ne}' ca' zjanaque' le' txen ja'aque' to to yež na' to to ciuda da' zjachi' do na' bzejni'ide' be_{ne}' Israel lo' yodao' čhegaque' ca', gwdxijue'ede' diža' güen can' nabia' Diosen' yichjlaždao' be_{ne}' yosozenag che'. Na' Jesúsen' beyone' be_{ne}' ca' chese'e bite'teze yižgüe' na' bite'teze da' chesac čhegaque'.

³⁶ Na' ble'ede' ba besežag be_{ne}' zan na' beyaše' beži'ilaže'de' legaque', le' gocbe'ede' chesacžejlaže' nac yesone' na' gague no zoa yesaclen legaque' len yogo' dan' chesežaglaogüe'. Nite' ca nita' no xila' be nono de gwyoe legacba'.

³⁷ Nach gože' be_{ne}' ca' zjanaque' le' txen:

—Chyažje be_{ne}' zan yeseyixjue'ede' xtiža' Diosen', perw to čhoptga be_{ne}' nita' yeseyixjue'eden'. Na' be_{ne}' yosozenague' čhe Diosen' zjazaca'lebe' ca to coseš xen da' chyažjen yedoben.

38 Da'nan' le nabe Xancho Diosen' sel_a'che' bene' yesaclene' chio' yotobcho coseš čhen'.

10

Jesúsen' gwleje' bene' šižinw ca' gosaque' txen len le'

(Mr. 3:13-19; Lc. 6:12-16)

¹ Jesúsen' botobe' bene' šižinw ca' zjanaque' le' txen na' bnežjue' legaque' yela' gwnabia' cont besyebeje' da' xigüe' lo' yichjlaždao' bene', na' cont besyeyone' bene' bite'teze yižgüe' da' chese'ede' na' bite'teze da' chesac čhegaque'.

² Quinga zjale bene' šižinw ca': Simón ben' lecze le' Pedro ben' goque' bene' blao, na' Andrés bene' biše' Pedroa', na' xi'in Zebedeon' Jacobo len Juan,

³ na' Felipe, na' Bartolomé, na' Tomás, na' Mateo ben' goc bene' güechixjw, na' Jacobo xi'in Alfeo, na' Lebeo ben' lecze le' Tadeo,

⁴ na' Simón ben' ben txen len partidw cananista, na' Judas Iscariote ben' bdie' Jesúsen' lo' na' ben' besegue'ede' le'.

Jesúsen' gwsele' bene' šižinw ca' jasedixjue'ede' xtiža' Diosen'

(Mr. 6:7-13; Lc. 9:1-6)

⁵ Na' Jesúsen' gwsele' bene' šižinw ca' jasedixjue'ede' xtiža' Diosen', gože' legaque':

—Bitw šejle laž bene' cbi zjanaque' bene' Israel, na' neca šejle yež ca' zjachi' distritw Samaria.

⁶ Le šja'ac gan' že' bene' Israel bene' ba zjambiyi' dan' bitw na' yesombi'e Diosen'.

7 Le šja'ac le šjatixjue'ede' ba bžin ža Diosen' ben' zoa yaban' nabi'e yichjlaždao' beņe' yosozenag che'.

8 Le yeyon beņe' chesacšene, le yeyon beņe' ca' chese'e yižgüe' dan' nzi' lepra, le yosban no beņe' ba gosat, na' le yebej da' xigüe' ca' zjayo'o zjanyaz lo' yichjlaždao' beņe'. Diosen' bibi bchixjue' le'e da' ba beņe' le'e yela' guac chen' cont gonle da' quinga, da'nan' le gaclen beņe' na' bibi gwchixjwlene'.

9 'Bitw gua'le mechw de oro, de plata o de cobre šlac co'ole nez.

10 Na' neca gua'le bzod, o yeto xcamisle, neca gua'le yel, na' neca goxe'le xis da' gwchiše'le. Ca nac le'e chonle xšinan' zaca'le par gon beņe' da' ye'ej da' gagwle gan' sel'a' le'ena'.

11 Na' gate'tez ciuda o yež ga žinle, le nab še zoa to beņe' güen beņe' yebede' gwlebe' le'e ližen'. Na' še gwlebe' le'e, na'teze soale. Cate'ch žin ža šejle ga yoble, cana'ch yeza'le.

12 Na' cate' žinle liže'na', le gwguape' tiox, na' le nablaze' soa cueze' binlo len yichjlažda'ogüe'.

13 Na' še nita' beņe' chesaclaže' yesezoa yesebeze' binlo len yichjlažda'ogaquen', na' gac can' gwñablaze'le par yesezoa yesebeze' binlo. Perw še nono zoa beņe' chesaclaže' yesezoa yesebeze' binlo len yichjlažda'ogaque', bi gac dan' ba gwñablaze'len'.

14 Na' še zoa ga bi yosolebe' le'e neca yosozenague' chele, cate' yeza'le na', le cuibe ni'aleni' yo bište cont nachbia' bi checa'ale čegaque'.

15 Da' mal xen goson beņe' ciuda Sodoma na' beņe' ciuda Gomorra cani', perw da' li žia' le'e,

cate' žin ža gac juisyw be_{ne}' ca' bi bosolebe' le'e ližen' yesale'chde' clel ca be_{ne}' Sodomān' na' be_{ne}' Gomorran'.

Gac da' saca'zi'cho

¹⁶ 'Neda' se_{la}' le'e šjatixjue'ele xtižan' len be_{ne}' ca' chesegue'ede' le'e. Zaca'leble ca xila' dao' ben' chja'ac gan' že' beco'yo. Da'nān' cheya_{la}' gacle be_{ne}' yo'ochgua xbab na' be_{ne}' xen_{la}že' len lega_{que}'.

¹⁷ Le gwsaca' len be_{ne}' ca' chesegue'ede' le'e. Nita' be_{ne}' yesone' le'e lo na' be_{ne}' gwnabia' ca' cont yesot yeseyine' le'e lo' yodao' chega_{quen}'.

¹⁸ Nach lecze dan' chejnilaže'le neda' nita' be_{ne}' yeseche'exoxje' le'e do lao rey, do lao nochle be_{ne}' gwnabia'. Na' can' güe'lenle lega_{que}' xtižan', lecze can' güe'lenle xtižan' len be_{ne}' bi zjana_{que}' be_{ne}' Israel.

¹⁹ Perw cate' yesezene' le'e na' yeseche'e le'e lao be_{ne}' ca', bi cuec yichjle nac yoži'ile xtiža'ga_{quen}' o nacle na_{le}. Lo hor na'teze Diosen' gwzejni'ide' le'e bin' cheya_{la}' na_{le}.

²⁰ Le gague le'eczen' nele, san Spiritw che Xacho Diosen' gonen ga na_{le} bin' cheya_{la}' na_{le}.

²¹ 'Cana' ba_l be_{na}ch yesechje' yesone' be_{ne}' biše' golje' lo na' be_{ne}' yesote' lega_{que}', na' nita' be_{ne}' yesone' xi'inga_{que}' lo na' be_{ne}' yesot legacbe', na' nita' be_{ne}' yesone' xaxne'e lo na' be_{ne}' yesote' lega_{que}'.

²² Yogo'ze be_{ne}' yesegue'ede' le'e dan' chejni-laže'le neda', perw note'tez le'e gwyo gwchejlaže'le cont bi cuejyichjle dan' chejnilaže'le neda' žinten gatle, nach šjayzoale len Diosen'.

23 Še be_{ne}' že' to yež yosyolague' le'e, le yeza'teze na' yeyejle ga yoble. Bi_{na}' yeyož šjatixjue'ele xtižan' yogo' yež gan' že' be_{ne}' Israel ca' cate' yida' da' yoble, neda' naca' ben' gwse_{la}' Diosen' golja' be_{nach}.

24 'Ca nac cate' to be_{ne}' chsede' len to maestrw, bitw nacho naque' be_{ne}' blaoch ca maestroa'. Na' to mos bitw naque' blaoch ca xanen'.

25 Con cheya_{la}' čhazlaže' ben' chseda' še yežin_{la}že' gaque' ca maestrw če' na' cheya_{la}' čhazlaže' mosen' še yežin_{la}že' gaque' ca xanen'. Neda' naca' Xan_{le}, na' be_{ne}' chesegue'ede' neda' chesene' cho_{na}' txen len Beelzebú dan' nac xan yogo' da' xigüe', na' naquechxe yesene' če' le'e nacle neda' txen.

Cheya_{la}' žebcho castigw dan' gon Diosen' če be_{ne}' güen da' xinj

(Lc. 12:2-9)

26 'Bitw žeble be_{ne}' bite'teze da' yesonde' le'e, le bitwbi de da' ngaše' da' nacho cbi gwlo'elaon, neca de da' nono na' neze da' nacho cbi yesenezden'.

27 Da' zan dan' chsed chlo'eda' le'e dan' bi chsed chlo'eda' yezica'chle be_{ne}'. Na' le'e le gwsed le gwlo'en yogo'lo be_{ne}', na' le gon cont be_{ne}' zan yesejni'iden'.

28 Bitw cheya_{la}' žeble be_{ne}' ca' yesot le'e. Legaque' bitw gac bi yesonde' yichjlažda'olen'. Cheya_{la}' žeble Diosen', le len' nape' yela' gwnabia' cont gwžiaye'e cuerp čhelen' len yichjlažda'olen' lo yi' gabilen'.

29 'Nezecho by_{ine} dao' ca' bitw bi zjazaca'tecba', perw bitw nacho toba' gat sin cbi güe' Xacho Diosen' latje.

³⁰ Na' ca nac chio', chaquechgüe Diosen' chio' na' neztede' bal yiša' yichj to tocho žia.

³¹ Da'nan', bitw žeble, le zaca'chle clcl ca zan byin dao' ca'.

Cheyalā' güe'cho diža' len bene' ye'cho legaque' nombia'czcho Jesucriston'

(Lc. 12:8-9)

³² Na' note'teze bene' še cho'e diža' len benachen' che'ene' chejle'e chia', lecze ca' neda' gua' diža' len Xa' ben' zoa yaban' yapa'ne' bena' naque' neda' txen.

³³ Na' note'teze bene' še cho'e diža' len benachen' che'ene' bitw chejle'e chia', lecze ca' neda' gua' diža' len Xa' ben' zoa yaban' yapa'ne' bena' bi naque' neda' txen.

Yesedile bene' neche dan' bid Jesúsēn'

(Lc. 12:51-53; 14:26-27)

³⁴ Bitw gonle xbab bene' že' yežlio nga yesezoa yesebeze' binlo len lježgaque' na'a ba bida'. Bitw yesezoa yesebeze' binlo san yesedile'.

³⁵ Lagüe dan' ba bida' yesedil bene' byo len xe' na' no'olen' len xne'e, na' yesedil xo'oliž no'ole len le'.

³⁶ Bene' lo' yo'oze yesegue'e lježe'.

³⁷ Note'tez bene' še chaquechde' xe' o xne'e clcl ca chacde' neda', bitw zaque' gone' txen len neda'. Lecze ca' še chaquechde' xi'ine' clcl ca neda' bitw zaque' gone' txen len neda'.

³⁸ Na' note'teze' še bi chzenague' chia' lagüe' dan' chacde' yosoči yososaca' bene' le', bitw zaque' cont gague' neda' txen še ca'.

³⁹ Note'teze bene' chacde' gone' cont bi chi saque' o cont nono yesot le', benan' cuiayi'. Na'

note'teze bene' chzanlaže' cuine' saca'zi'e o gate' ne
chia' neda, ba de yela' mban che' toli tocaṇe.

*Bene' ca'yesenita' mbalaz cate' yesyežine' yaba
(Mr. 9:41)*

⁴⁰ 'Note'teze bene' chosolebe' le'e chosolebe'
neda', lecze chosolebe' Dios ben' gwsele' neda'.

⁴¹ Na' note'teze bene' yebede' gwlebe' bene'
cheso'e xtiža' Diosen', mbalaz soe' cate' yežine' ya-
ban' lecze ca mbalaz soa ben' cheso'e xtiža' Diosen'.
Na' mbalaz gac che bene' ca' cheson can' chazlaže'
Diosen' caten' yesyežine' yaban'. Na' note'teze
bene' yebede' gwlebe' legaque' da' chesone' can'
chazlaže' Diosen', lecze mbalaz soe' caten' yežine'
yaban'.

⁴² Note'teze bene' gwnežjue' la' to xiga'ze nis
ye'ej bene' chejnilaže' neda', la' gwnežjuen' bene' bi
naque' bene' blao, da' licze gona' cont soe' mbalaz
caten' yežine' yaban'.

11

*Juanna' gwsele' chope bene' zjanaque' txen len le'
gan' zoa Jesúsen'
(Lc. 7:18-35)*

¹ Cate' beyož ben Jesúsen' mandadw can' yeson
bene' šižinw ca' gwleje' cont gosaque' le' txen,
beze'e latjen'. Na' gwyeje' yež ca' zjachi' do na'
jased jalo'ede' xtiža' Diosen' len bene' ca' že'na'.

² Juanna' ben' bzoe' bene' nis, cana' ba die' ližya.
Na' bende' diža' che yogo' dan' chon Criston' ben'
gwsele' Diosen' cont yedenabi'e. Nach Juanna'
gwsele' chope bene' zjanaque' txen len le' gan' zoa
Jesúsen',

³ jaseže'ne':

—¿Len' naco' ben' chbezto' seļa' Diosen', še cheyaļa' cuezchto' yid bene' yoble?

⁴ Nach Jesúsen' gože' legaque':

—Le šjaya'ac na' le šjayež Juanna' doxen da' ca' ba ble'ele na' da' ca' ba benele.

⁵ Ba ble'ele chona' cont chesyete'e no bene' lchol, na' chesyeda no bene' zjanxinj ni'e. Na' ľecze bene' gose'e yižgüe' dan' nzi' lepra besyeyacde', na' chesyeyene no bene' cuež. Ba ble'ele bosbana' no bene' guat, na' ba benele choa' diža' güen chia' len bene' yaše' ca'.

⁶ Mbalaz zoa bene' chejle'e chia' na' bi chdebde'.

⁷ Na' cate' besyeya'ac bene' ca' zjanaque' txen len Juanna', nach Jesúsen' be'lene' bene' ca' zjandoben' xtiža' Juanna', gože' legaque':

—¿Nacxe nac ben' jale'ele latje dašen'? ¿Chaque' quil ca'ale? Bi naque' ca'.

⁸ ¿Nac naque' caten' jale'elne'? ¿Nyaze' lache' šagüe'? ¿še bitw? le bene' zjanyaz lache' šagüe' nite' yo'o güenchgua ca no liž bene' gwnabia'.

⁹ ¿Noxen' jale'ele? ¿to ben' choe' xtiža' Diosen'? Da' ľi cho'e xtiža' Dios, perw žia' le'e, zaca'che' ca note'teze bene' choe' xtiža' Diosen'.

¹⁰ Che benga nyojen le'e Xtiža' Diosen', žan: Neda' Dios seļa' to bene' cuiagalgüe' laguo' güe'e xtižon'

cont cate' šejo' ba zjanita' bene' yosozenague' chio'.

¹¹ Da' ľi žia' le'e notoch no benach na' soa bene' naquech bene' blao ca Juanna' ben' bzoe' bene' nis. Perw na' note'tez bene' chzenague' che Diosen' cont nabia' Diosen' yichjlažda'ogüen', ľa'czļa' naque'

beṇe' la'zelagüe beṇe' bibi zaca', ba chejni'ichde' chia' clēl ca Juanna'.

12 'Gwzolaon caten' Juanna' gwduxjue'ede' xtiža' Diosen' na' bzoe' beṇe' nis na' chžinten ṇa'a, beṇe' zan chesone' ga zelao chesezaquede' cont ṇabia' Diosen' yichjlažda'ogaque'.

13 Na' lecz gwzolaon cani'te bžinten cate' bla' Juanna' gwduxjue'ede' xtiža' Diosen', ley dan' bzoj da' Moisés na' dan' bosozoj yezica'chle beṇe' gosoe' xtiža' Diosen' bzejni'in chio' che yela' gwn-
abia' che Diosen'.

14 Na' Xtiža' Diosen' dan' nyojen žan yid yeto beṇe' yedeyene' can' ben Elías ben' be' xtiža' Diosen' cani'. Che Juanna' žan ca', con še šejle'le.

15 Le'e žia nagle da' chene, le gwzenag xtiža'na'.

16 '¿No gwsaca'lebda' le'e zoale ṇa'a? Gwsaca'lebda' le'e ca bidao' dan' bicze bi chlebele. Nacle ca bidaon' nita' gan' chac ya'a chese' lježbe':

17 “Ba bcuežto' bžejo, ṇeca bya'ale, na' ba bilyaše'to', ṇeca gwchežle.”

18 Juan ben' bzoe' beṇe' nis bide' laole nga, bitw güe'ej gwdagwšagüe' can' chese'ej chesagw beṇe' yoble, nach gwnale che': “Yo'o yaz da' xigüen' yichjlažda'ogüe'.”

19 Na' neda', Diosen' gwsele' neda' golja' benach, na' chle'ele che'ej chagua' can' chese'ej chesagw beṇe' yoble, na' žale chia' naca' beṇe' lia na' beṇe' borrašw. Na' lecze žale chia' naca' xmigw beṇe' güe'chixjw ca' na' xmigw yezica'chle beṇe' güen da' xinj. Perw nacia' yela' sina' che Diosen' dan' napto' naquen da' güen, le ba ble'eczele can' chon neto' napton'.

Yež ca' gan' bitw bosozenague' che Jesúsen'
(Lc. 10:13-15)

²⁰ Nach Jesúsen' be'e xtiža' beṇe' ca' že' yež ca' gan' bene' da' zan da' zaca' yesyebande', na' gwdile' legaque' dan' bitw besyetinjde' xtola'gaquen'. Nach gwne':

²¹ —jNyaše'chguaze gac che le'e beṇe' Corazín! jNyaše'chguaze gac che le'e beṇe' Betsaida! Beṇe' ca' nita' Tiro na' Sidón ba besyetinjde' xtola'gaque' šaca' blo'egacda'ne' yela' guac chia' ca dan' ba blo'eda' le'e. Na' bosoše'e ca gosone' šaca' bena' ca', chesazlje' to lache' gasj da' naquen zeše' na' chosože'elja cuine' no de cont yesacbe'e beṇe' ba boša' yichjlažda'ogaquen'.

²² Žia' le'e, saca'zi'chle clcl ca beṇe' že' Tiro na' Sidón cate' žin ža gac juisyw.

²³ Na' le'e nita'le Capernaum chonle xbab šeca Diosen' gone' gacxenchgualle cate' yežinle yaba gan' zoe'na'. Bi gone' ca', san sele' le'e lo yi' gabil. Šeca' bena' da' zaca' yesyebane beṇe' ca' gwnita' Sodoman' can' ba bena' laole nga, zesyetinjde' xtola'gaquen', na' ne' chi' ciudan' šeca'.

²⁴ Žia' le'e, gale'chle clcl ca beṇe' Sodoman' cate' žin ža gac juisyw.

Bene' ca'yesejnilaže' Jesúsen' nite' mbalaz
(Lc. 10:21-22)

²⁵ Nach Jesúsen' bol güiže' Diosen', gwne':

—Xa', le' naco' Xan yežlio nga na' Xan yaba, chnabi'o doxen. Na' chona' yela' choxcclen chio' ba bzejni'ido' bal beṇe' diža' güen chio' quinga. Bzejni'ido' beṇe' ca' gosacbe'e cheseyažjde' no gwsed

gwlo'e legaque'. Na' bitw bzejni'ido' bene' ca' cheson xbab zjanaque' bene' sina' na' bene' zjanejni'i.

²⁶ Beno' ca' Xa', le can' gwnalažo'.

²⁷ Na' gože' bene' ca' že'na':

—Xan' ba bene' lo na' gona' cont chombia' bene' le'. Le' nombia'yañe' neda', na' neda' nombia'yaña' le'. Na' bene' ca' ba gwleja' ba zjanombi'e Xan'. Na' noch no zjanita' bene' zjanombi'e Xan', ne neda' ca zjanombi'e.

²⁸ Le'e chjaxaque'laže'le na' chacyaše'laže'le da' chaquele nac gonle cont soale binlo len Diosen', chata'yoeda' le'e, le šejnilaže' neda'. Neda' gona' ga soale mbalaz.

²⁹ Le gwzenag chia' na' gwzejni'ichda' le'e. Neda' naca' bene' xenlaže' na' bene' šagüe' na' gona' ca soale mbalaz lo' yichjlažda'olen'.

³⁰ Dan' žia' cheyala' gonle bitw naquen zed, na' can' chsed chlo'eda' bitw naquen zdebe.

12

Ža che Dios bene' ca' zjanaque' Jesúsen' txen goselechje' trigon' da' gosagüe'

(Mr. 2:23-28; Lc. 6:1-5)

¹ Ca tiempen' gozac to ža che Diosa' cate' Jesúsen' gwdie' len bene' ca' zjanaque' le' txen gan' nyaž trigw. Nach bene' ca' gosedone', na' goselechje' dao che trigon' cont gosagüe' xsenna'.

² Na' besele'e bene' fariseon' can' gosone', na' gosi'e Jesúsen':

—Gwnašč žbixchen' bene' ca' zjanaque' le' txen chesone' žin da' bi de lsens goncho ža che Dios?

³ Na' Jesúsen' gože' legaque':

—¿Bina' gwlable can' ben da' rey Davin' to ža cate' le' na' bene' lježe' ca' gosedone'?

⁴ Gwyo'o Davin' ga nac liž Dios na' gwdagüe' yetextil da' nac che Dios da' bi chac gagw bene' bi nac b̄xoz, na' lecze bnežjue' che bene' zja'ac len le'.

⁵ Na' ¿bina' gwlable le'e ley dan' bzoj da' Moisés gan' žan b̄xoz ca' chesoncze' mandadw che yodao' blaon' yogo' ža che Diosen'? Na' bitw nacho zjanape' dola' dan' chesone' žin ža che Diosen'.

⁶ Žia' le'e, neda' zoa' nga zaca'cha' clal ca' yodao' blaon'.

⁷ Xtiža' Diosen' dan' nyojen žan: “Chaclaža' yeyaše' yeži'ilaže'le bene', gague con gotle beyixe' par gonxenle neda'.” Šaca' chejni'ile bi zejenna' žan ca', bilja nale bene' quinga zjanape' dola', le bibi da' mal chesone'.

⁸ Žia' le'e, naquen' lo na' nia' bi da' nac güen goncho cate' nac ža che Diosen', neda' naca' ben' gwselā' Diosen' golja' benach.

Beyac to bene' n̄xo'on šla'a taque'

(Mr. 3:1-6; Lc. 6:6-11)

⁹ Na' cate' Jesúsēn' beze'e latjen', na' gwyo'e to lo' yodao' che chio' bene' Israel.

¹⁰ Na' lo' yodaon' zoa to bene' n̄xo'on šla'a taque', nach bene' fariseo ca' gose'e Jesúsēn':

—¿De lsens yeyoncho bene' xinj ža che Diosen'?

Gose'ene' ca' cont de da' yosode'ede' yesagüe' xya.

¹¹ Nach Jesúsēn' gože' legaque':

—Še nita' xila' dao' chele na' lažo' toba' to lo' yechw zitjw ža che Diosen' cate' bi de lsens goncho žin, ¿cbi la' yebejteleba' lo' yechon' lo' žana'?

12 Da'na'na' žia' le'e de lsens gaclencho bene' ža che Diosen'. Le zaca'ch to bene' clel ca to xila' dao'.

13 Nach Jesúsen' gože' ben' n̄xo'oŋ taque'na':

—Bli naon'.

Na' blien' na' taquen' beyaquen binlo can' nac dan' yešla'a.

14 Nach bene' fariseo ca' besyežaše' yodaon' na' bosoxi'e nacle yesone' yesote' Jesúsen'.

To dan' bzoj da' Isaías che Jesúsen'

15 Gocbe'e Jesúsen' can' bosoxi'a bene' fariseo ca' na' gwze'e gwyeje' ga yoble. Bene' zan ja'aclene' le', nach beyone' yogo' bene' ca' chesacšene.

16 Na' bene' mandadw nono yesoe'lene' diža' non' beyon legaque'.

17 Bene' ca' cont goc can' ža Xtiža' Diosen' dan' bzoj da' Isaíasen', žan:

18 Bengan' naque' xmosa', ben' gwleja' cont gone' can' chazlaža'.

Chacchgüeda' le', na' chbeda' che'.

Na' neda' seła' Spiritw chian' soateze soan len le'.

Na' chixjue'ede' yogo'lol bene' can' chazlaža' yesone'.

19 Bitw gacyože' len bene', neca yosye'e,

na' neca nie' zižjo lo nez cont yesene bene' bin' že'.

20 Bi gwzoe' ca'ale bene' chesejnilaže' le' late' lasze. Soe' gaclene' legaque'.

Nach žin ža gone' cont gac con da' zej to licha lo yežlion'.

21 Na' bene' že' yogo' naciónna' yesebeze' gaclene' legaque'.

Gosene' Jesúsen' bebeje' da' xigüe' len yela' guac che Beelzebú

(Mr. 3:19-30; Lc. 11:14-23; 12:10)

²² Na' zoa to beñe' lchol na' neca goc ñie', na' yo'o nyaz da' xigüe' yichjlažda'ogüe' na' jasesane'ne' lao Jesúsen'. Na' Jesúsen' bebeje' da' xigüen' yo'o nyaz yichjlaždao' ben' na' la' bele'etede' na' gocte beñie'.

²³ Na' yogo' beñe' ca' besele'ede' can' goca' besyebanchgüede'. Nach gose'e lježe':

—¿Nac benga ben' chbezcho yide' lao diaža che da' rey David?

²⁴ Perw cate' beñe' fariseo ca' gosende' diža' quinga gosene':

—Bitwbi yela' guac nap benga. Le Beelzebú dan' nac xan da' xigüe' ca' chaclenen le' cont chebeje' da' xigüe' zjayo'o zjanyaz yichjlaždao' beñe'.

²⁵ Gocbe'e Jesúsen' can' goson beñe' fariseo ca' xbaben', nach gože' legaque':

—Note'teze gobiern še choje' chop šon cuen na' yeyoža' yesedile' legacze', cuiayi' gobierna'. Na' lecze še beñe' že' bite'teze yež yesaque' chople na' yesedile' legacze', lecze bi sibia' yež chegaquen' še ca'. Na' še beñe' lo' bite'teze yo'o yesechoje' chople na' yesedile' legacze', gague sša yesenite' txen.

²⁶ Lecze ca' še Satanásen' yebejen yeto da' xigüe' yo'o nyaz yichjlaždao' beñe', cuiayi' yela' chnabia' chen, le chdillen cuinen še ca'.

²⁷ Le'e žale Beelzebún' chaclenen neda' cont chebeja' da' xigüe' ca'. Šaca' naquen can' žalen', lecze zejen Beelzebú dan' chnabia' da' xigüen' chaclenen beñe' lježle chesybeje' da' xigüe' zjayo'o zjanyaz yichjlaždao' beñe'. Na' beñe' lježle ca'ze chosolo'e clelen' chñele.

28 Spiritw che Diosen' chonen neda' yela' guac cont chebeja' da' xigüe' ca', na' da' chona' ca' chlo'en ba bžin ža nabia' Diosen' yichjlaždao' bene' yosozenag che'.

29 '¿Nac gac šo' bene' gwban liž to bene' gual na' que'e bi da' de che' še bi zgua'tec gwcheje' bene' guala'? Lete gone' ca' nach gac que'e bi da' de che'.

30 'Bene' bi chone' neda' txen, chone' contr neda'. Na' bene' bi chaclene' cont yosozenag bene' yoble chia', zeje diža' chone' par bi yosozenague' chia'.

31 'Da'nan' žia' le'e, yogo' da' xinj da' chon benač, na' yogo' diža' bya' dan' chesene' che Diosen', Diosen' yezi'xene' chen, perw note'teze bene' chne' yela' ya' che Spiritw che Diosen', gwbat yezi'xen Diosen' che'.

32 Na' note'teze bene' še ne' yela' ya' chia' neda' naca' ben' gwsela' Diosen' golja' benač, Diosen' yezi'xene' che', perw note'teze bene' še ne' yela' ya' che Spiritw che Diosen', gwbat yezi'xen Diosen' che' na'a na' bate'teze.

Diža' da' güe'cho chlo'en bin' yo'o lo' yichjlažda'ochon'

(Lc. 6:43-45)

33 'Ca nac yag frut ca', yag dan' nac yag güen, frut güencze chbian, na' yag da' bi nac yag güen, lecze frut da' bi nac güen chbian. Con can' nac da' chbia to to yaguen' nezecho bi yaga'.

34 Na' ca'czen' nac len le'e nacchgual e bene' zgot na' bene' gwxiye'. Bitw gac güe'le diža' šagüe' dan' nacle bene' laždao' xi'a. Le yogo'te diža' da' chchoj cho'achon', lo' yichjlažda'ochon' nan' za'aquen.

³⁵ To bene' laždao' xilaže' cho'e diža' šagüe', le can' nac lo' yichjlažda'ogüe' nan' cho'e dižan'. Na' to bene' laždao' xi'a cho'e diža' xi'a, le can' ža lo' yichjlažda'ogüen'.

³⁶ Na' žia' le'e, cate' žin ža gon Diosen' yesežaglao yogo' bene' cheson da' xinj toli tocanē, cana' yogo'lol bene' yosodie' cuent che yogo' diža' dan' ba goso'e da' bitwbi zjazacan'.

³⁷ Na' con ca diža' dan' choe'le, Diosen' choglagüen' chele še naple doła' o še bi naple doła'.

Bene' bi bosozenag che Diosen' gosenabe' gon Jesúsen' to yela' guac

(Mr. 8:12; Lc. 11:29-32)

³⁸ Nach bal bene' ca' chososed chosolo'e dan' bzoj da' Moisés, na' bene' fariseo ca' gose'e Jesúsen':
—Maestrw, chaclaže'to' gono' to yela' guac da' le'eto' cont nezeto' še da' licze Diosa' gwsele' le'.

³⁹ Nach Jesúsen' gože' legaque':

—Le'e zoale na'a nacchgualē bene' laždao' xi'a na' ba gwlejyichjle Diosen'. Na' chnable gona' yeto yela' guac da' le'ele cont nezele še Diosa' gwsele' neda', perw bi gona' can' chnablēna', le ba ble'ele da' ca' chona'. Dan' gon Diosen' len neda' cont nezele le'na' gwsele' neda' naquen ca da' bene' len da' Jonás ben' be' xtižen' can'.

⁴⁰ Cate' za' šej Jonásen' Nínive, Diosen' bene' cont to bel xen be yo'o lo' nisdāon' gwdebbā' le' na' šone ža šone yel gwyo'e lo' le'eban'. Na' ca nac neda', gata' na' gaša', na' yeyoža' šo'a lo' ba šone ža šone yel.

⁴¹ Na' cate' žin ža gon Diosen' cont yogo' bene' cheson da' mal yesežaglagüe' toli tocanē, žana' bene' Nínive bene' ba gosat yedesecuiše' le'e

mbanle na'a lao Diosen', le legaue' besyetinjde' xtolen' cate' da' Jonásen' gwdixjue'ede' xtiža' Diosen' len legaue'. Na' neda' zoa' nga naccha' bene' blao clal ca da' Jonásen', na' bitw chzenagle chia'.

⁴² Na' lecze žana' cate' gon Diosen' cont yogo' bene' cheson da' mal yesežaglaogüe' toli tocañe, da' no'olen' gwnabia' bene' Seba ca' yedecuiše' le'e mbanle na'a. Le le'na' gwze'e Seba gan' nac zito'chgua na' bide' nga cont bzenague' diža' sina' dan' be' da' rey Salomón. Na' neda' zoa' nga naccha' bene' blao clal ca da' rey Solomónna', na' bitw chzenagle chia'.

Da' xigüen' cheyo'on da'yoble lo'yichjlaždao' bene' (Lc. 11:24-26)

⁴³ Na' še to da' xigüe' da' yo'o nyaz lo' yichjlaždao' bene' yechojen, nach lažen nile nale yeyiljon ga soan mbalaz. Na' še bibi latje želen, nach nan:

⁴⁴ “Da' yoble šjajo'a lo' yichjlaždao' ben' gan' ba gwyo'a.” Nach yeyejen da' yoble gan' zoa ben'. Cate' le'en bač beyacde', na' ba zoache' binlo, na' gague no yo'o nyazech yichjlažda'ogüe' da' gwžon yeyo'on da' yoble,

⁴⁵ nach šjajtoben yegaže da' xigüe' da' zjanaquech mal ca len, na' txen yeso'on lo' yichjlažda'ogüen'. Na' še ba gosonen ca', na' gaquech mal che bena' clal ca goc che' cana'. Can' goc che bena', lecze ca' gac che le'e mbanle na'a dan' nactecle bene' laždao' mal.

Xna' Jesúslen len bene' biše' ca' besežine' ga zoe' (Mr. 3:31-35; Lc. 8:19-21)

46 Ne' choe'te Jesús'en' diža' len beṇe' quinga, cate' bžin xṇe'e len biše' ca'. Gosaclačže' yeso'e yeso'e'lene' le' diža' na' beṇe' zan nita' lagüe' na'ate.

47 Beṇe' ca' že' na', toe' gože' Jesús'en':

—Xṇa'o len beṇe' bišo' ca' zjanite' chyo'o na' chesaclačže' yeso'e'lene' le' diža'.

48 Nach Jesús'en' gože' le':

—¿Nezele no nac xṇa'a na' no zjanac biše' lježa'?

49 Nach bli ne'e blo'e beṇe' ca' zjanaque' le' txen na' gože' bena':

—Beṇe' quinga zjanaque' xṇa'a na' zjanaque' biše' lježa'.

50 Le note'teze beṇe' chone' da' chnaláže' Xa' Diosen' ben' zoa yaban', bena' nac beṇe' biša', beṇe' zana', lecze naque' xṇa'a.

13

Jempl che beṇe' goz trigon'

(Mr. 4:1-9; Lc. 8:4-8)

1 Na' lo žana' gwza' Jesús'en' yo'o gan' zoen' jachi'e cho'a nesdaon'.

2 Nach catec beṇe' zan juisyw besedobe' gan' chi'en' na' benten byen gwyo'e gwchi'e to lo' barcw. Na' yogo' beṇe' ca' besedoben' gosenite' cho'a nesdaon' ga nac yo biž.

3 Nach da' zan da' bsd blo'e Jesús'en' legaque' len jempl da' bi'e. Na' be'e to jempl, gwne':

—To beṇe' güen žin jeze' trigw,

4 na' šlac zej chose' trigon' late' biṇ che trigw dan' chazen' jasechazen chanez, nach be ca' žia xil be chaš le'e yaba gosagwban'.

⁵ Yelaten' jasechazen ga nac lo yej ga bibi yotec zoa, na' da' nga byob blan' le bi jasechazen ga nac sitjw.

⁶ Perw na' cate' bla' gwbiža' na' bzeyen len na' gosebižen, le gague zjajo'otec loenna' sitjw.

⁷ Yelaten' jasechazen ga nac lo yag yeše', na' yag yešen' gosecha'on na' bosololen len.

⁸ Perw na' yelaten' jasechazen ga nac yo šagüe' na' beselan'. Na' balen' gosebian to gayoa güeje to ton, na' yebalen gosebian gayon güeje, na' yebalen šichoa güeje.

⁹ Le'e žia nagle da' chene, le gwzenag xtižan'.

*Jesúsen' be'e diža' bixchen' bzejni'ide' beņe' jempl
(Mr. 4:10-12; Lc. 8:9-10)*

¹⁰ Nach beņe' ca' zjanaque' Jesúsen' txen gosebigue' lagüen', na' gose'ene':

—¿Bixchen' chsed chlo'edo' beņe' quinga len jempl?

¹¹ Na' gož Jesúsen' legaque':

—Nono na' neze can' nac yela' gwnabia' che Diosen', na' ba chone' cont le'e chejnilaže'lene' nezelen. Perw bi chon Diosen' ca' len beņe' bi chesaclaže' yesejnilaže'ne'.

¹² Note'teze beņe' chosozenague' xtiža' Diosen', gwzejni'ich Diosen' legaque' cont šanch dan' yesejni'ide'. Perw na' note'teze beņe' bi chosozenague', da' daon' ba zjaņezde', yeca'a Diosen' len.

¹³ Da'n'an' chsed chlo'eda' beņe' quinga len jemplen', le chesele'ede' dan' chona' perw bitw chesache'ede' bi zejen, na' chesende' xtižan' perw bitw chesejni'iden'.

14 Len be_{ne}' quinga ba chac can' bzoj da' Isaías, žan:

Da' li yenele, perw bitw šejni'ile bi zeje dan' yene-
len'.

Na' da' li le'ele, perw bi gache'ele bi zejen dan'
le'elen'.

15 Nacle be_{ne}' güedenag na' ba_{ch} natcze
yichjlažda'olen'.

Bi chazlaže'le gwzenagle dan' chenele na' dan'
chle'ele;

con nacle be_{ne}' güedenag.

Šaca' bi nacle be_{ne}' güedenag, šejni'ile bi zejen dan'
chenele na' dan' chle'ele.

Nach yetinjele xto_{la}'le cont yeca'an na' yocoba'
yichjlažda'olen'.

16 'Perw le'e nacle neda' txen, leca mbalaz zoale
dan' chle'ele da' ca' chona' na' chache'ele bi zejen,
na' chzenagle xtižan' na' chejni'ilen.

17 Da' li žia' le'e, zan da' be_{ne}' ca' gosoe' xtiža'
Diosen' cani' na' zan da' be_{ne}' ca' yezica'chle be_{ne}'
bosenag che Diosen' cani', gosac_{la}že'chgüe'
yesele'ede' dan' chle'ele na'a, perw bitw go_{la}'
yesele'eden'. Na' gosac_{la}že'chgüe' yesende' dan'
chenele na'a, perw bitw go_{la}' yesenden'.

*Jesúsen' bzejni'ide' bi zejen jempl che ben' goz
trigon'*

(Mr. 4:13-20; Lc. 8:11-15)

18 'Na' le gwzenag, quinga zejen jempl che ben'
goz trigon'.

19 Ca dan' byažen zejen xtiža' Dios da' chzejni'i
che yela' gwnabia' che'. Na' bi_n dan' beselažo'
chanezen', zejen be_{ne}' ca' chesende' xtiža'
Diosen' perw bi chesejni'iden'. Na' ca cheyoža'

chžin gwxiyen' chebejen xtiža' Diosen' lo' yichjlažda'ogaquen'.

²⁰ Na' biñ dan' beselažo' ga nac lo yej na' bi ben loen, zjanaquen ca beñe' la' chesyebetede' xtiža' Diosen' cate' chesenden',

²¹ perw zjanaque' ca da' bibi loe chontec, šložga chesejle'e che xtiža' Diosen', na' cate' chac bi da' mal čhegaquen' o cate' chesegue'e beñe' legaque' dan' chosozenague' xtiža' Diosen', la' chesebejyichjte' xtižen'.

²² Na' biñ dan' beselažon' ga nac lo yag yeše', zejen ca beñe' ca' ba zjanende' xtiža' Diosen', perw šlac zjambane' chesyelał chesyěžejde' na' da' chesaclaže' yeseñi'e chziye'en legaque'. Yogo' da' qui bi choen' latje yega'an xtiža' Diosen' lo' yichjlažda'ogüen', na' da'n'an' bi chesejnilaže' le' ca cheyala'.

²³ Na' biñ dan' beselažo' lo yo šagüe' zejen ca beñe' chesende' xtiža' Diosen' na' chesejni'iden' na' chosozenaguen'. Bañen gosebjan to gayoa güeje, na' yebañen gosebjan gayon güeje, na' yebañen šichoa güeje.

Jempl che trigon' na' yixe'

²⁴ Na' gozoe'len Jesús'en beñe' ca' yeto jempl, goze'e legaque':

—Yela' gwnabia' che Diosen' ben' zoa yaban' zaca'leben ca dan' goquen' cate' to beñe' jeze' trigw lo yežlio che'na'.

²⁵ Na' do šeže'le gwyej to beñe' chgue'e le' šlac chesetas beñe' ca' yezica'chle na' jeze' xsa yixe' gan' ba naz xan yežlion' trigon', nach beze'e.

26 Na' to šil'ize trigon' len yixe' ca' beselan', na' trigon' gwzolaŋ chbian.

27 Na' beŋe' güen žin che xan yežlion', cate' gosache'ede' nach jaya'aque' gan' zoa xangaque' jasyeyeže'ne': "Beŋe', žgague biŋ trigon' goz yežlio chion'? žBixchen' nchixen len yixe'?"

28 Nach xangaquen' gože' legaque': "To beŋe' chgue'e neda' jen ca'." Nach xmosen' gose'ene': "žChe'ndo' lažo'to' yixen'?"

29 Na' gože' legaque': "Bitw lažo'len. Le xož lažo'le lente trigon'.

30 Jaseyenna'. Guac yesecha'on txen. Na' cate' ba gole' yotoble cosešen', cana' gona' mandadw zgua'tec lažo'le yixen' na' gonlen manoj cont yeseyen. Nach šjaytoble trigon' co'ošagüe'len."

Yela' gwnabia' che Diosen' naquen ca biŋ che xomdas

(Mr. 4:30-32; Lc. 13:18-19)

31 Nach gozo'e yeto jempl, gozne':

—Šanch beŋe' yosozenag che Diosen' cont nabi'e yichjlažda'ogaque'. Da'nana' yela' gwnabia' che Diosen' ben' zoa yaban' zaca'leben ca to biŋ che xomdas dan' goz to beŋe' yežlio chen'.

32 Biŋ che xomdasen' chnabia' nac da' dao' len biŋ ca' chazcho. Perw na' cate' chlan' chcha'ochen ca bichle yixe' cuan na' chaquen ca to yag cha'o, nach byin dao' ca' chjasen ližda'ogacba' lo xozenna'.

Yela' gwnabia' che Diosen' naquen ca levadura

(Lc. 13:20-21)

33 Nach gozoe' Jesúsena' yeto jempl, gozne':

—Yela' gwnabia' che Diosen' ben' zoa yaban' zaca'leben ca levadura dan' gwlec no'olen' len to rob yezj cont gwcha'o doxenen.

Jesúsen' bzejni'ide' bene' len jempl

(Mr. 4:33-34)

³⁴ Yogo' da' quinga bsed blo'e Jesúsen' bene' ca' besežag gan' zoe'na'. Bsed blo'ede' legaque' be'e jempl, bitwbi bzejni'ide' legaque' sin ca be'e jempl.

³⁵ Bene' ca' cont goc can' bzoj da' bene' be' xtiža' Diosen' cani', žan:
Gwsed gwlo'egacda'ne' len jempl,
na' yapegaca'ne' dan' nono na' neze da' ba ngaše' cate' gwxete yežlion'.

Jesúsen' bzejni'ide' bi zeje jempl che trigon' na' yixe'

³⁶ Nach beyož bsed blo'e Jesúsen' bene' ca' zjaže' na', beze'e txen len bene' ca' zjanaque' le' txen jaya'aque' yo'o gan' nite'na'. Na' cate' ba besyeyo'e lo' yo'on' bene' ca' zjanaque' le' txen gosebigue' cuite'na' gose'ene':

—Bzejni'išque neto' bi zejen jempl che trigon' na' yixen'.

³⁷ Nach Jesúsen' gože' legaque':

—Quinga zejen: Diosen' gwsele' neda' golja' benač na' zaca'lebda' ca ben' goze' biñ che trigon'.

³⁸ Na' doxen yežlio nga zaca'leben ca pedas yežlio gan' goze' trigon'. Na' bene' ca' chosozenague' che Diosen' cont nabi'e yichjlažda'ogaque' zaca'lebde' ca biñ che trigon'. Na' bene' ca' chosozenague' che Satanás dan' chnabia' da' xigüe' ca' zjazaca'lebde' ca xsa yixen'.

39 Satanásen' zaca'leben ca beñe' chxi'a ben' goze' xsa yixen'. Na' žan' gac juisyw zaca'leben ca žan' yosyotobe' trigon'. Na' angl ca' zaca'lebegaque' ca beñe' ca' yosyotobe' cosešen'.

40 Na' can' šey yixen' yosyotoben', can' gac che beñe' ca' chosozenag che Satanásen' cate' žin ža gac juisyon'.

41 Diosen' gwsele' neda' golja' beñach na' cate' žin ža, neda' sela' angl chia' ca' cont yosyotobe' yogo' beñe' ca' chesego'oyele' beñe' yoble yesone' da' mal na' lecze yosyotobe' yezica'chle beñe' cheson da' mal. Na' angl ca' yesyebeje' legaque' cont bich yesenite' txen len beñe' ca' chosozenague' che Diosen' cont nabi'e yichjlažda'ogaquen'.

42 Nach yesyesele' legaque' lo yi' gabil gan' yeseye' toli tocanē. Na' yesebežyaše' yesagwxejte laye' tantw yesēžaglaochgüe'.

43 Cana'ch Xacho Diosen' gone' cont beñe' ca' cheson da' güen nite' len le', le zjanaque' xi'ine' na' yesaque' ca be'ni' che gwbižen' cate' yesēžine' yaban' gan' zoa Diosen' chnabi'e. Le'e žia nagle da' chene, le gwzenag xtiža'na'.

Jempl che mechw xen dan' ngaše' lo' yo

44 'Yela' gwnabia' che Diosen' ben' zoa yaban' naquen ca to mechw xen dan' ngaše' lo' yo. To beñe' bželde' mechw xen da' ngaše' to lo' yežlio. Nach bocuašen' da' yoble lecze na'ze na' chebechgüede' beze'e jayete' yogo'lol bi da' de che' cont gwxi'e yežlion' gan' ngaše' mechua'.

Jempl che to perla da' zaca'chgua

45 'Na' yela' gwnabia' che Diosen' ben' zoa yaban',
lecze zaca'leben ca da' nga goc. Zoa to comerciant
bene' cha'o perla dan' zjanacchgua xdan.

46 Na' bželde' to perla da' leca zacan'. Na'
beyote' yogo'lo| bi da' de che' na' gwxi'e per-
lan'. Ca'czen' zaca'lebe bene' ca' chesache'e
zaca'chguan yosozenague' che Diosen'.

Jempl che yixjw bel

47 'Na' yela' gwnabia' che Diosen' ben' zoa yaban'
zaca'leben ca da' nga goc. Gwnita' ba| bene' gwxcn
bel na' bosozale' yixjw bel chegaquen' lo' nisdaon'
na' gwxcnen zan cuen bel.

48 Nach cate' ba gwža' lo' yixjon', besyebejen' yo
biž, na' gosebie' be ca' zjanac güen par yesagüe'
na' gosegüe'eba' lo' žome. Na' be ca' bi zjanac güen,
gosecho'one'ba'.

49 Ca'czen gac che yogo' bene' cate' žin ža te che
yežlion'. Angl ca' yesebeje' bene' mal ca' ladjo bene'
ca' zjanaque' bene' güen lao Diosen'

50 na' yosozale' legaque' lo yi' gabil gan'
yesebežyaše' na' yesagwxejte laye' dan' leca
yesežaglagüe'.

Xtiža' Diosen' dan' byoj cani' len da' chsed chlo'e Jesúsen'

51 Nach Jesúsen' gože' bene' ca' zjanaque' le' txen:
—žZyejni'ile yogo' da' ca' ba blo'eda' le'e?

Nach gose'ene':

—Zyejni'iton'.

52 Nach gož Jesúsen' legaque':

—Note'tezle še chac chsed chlo'ele Xtiža' Diosen'
dan' byoj cani', še lecze chzenagle can' chsed
chlo'eda' che yela' gwnabia' che Diosen', nachen'

zaca'leble ca to xan yo'o bene' nape' yogo'lol da' zaca' dan' chyažj chchinde', balen zjanaquen da' cobe na' balen zjanquen da' gole.

Bene' yež Narzaret bi gosejle'e che Jesúsen'
(Mr. 6:1-6; Lc. 4:16-30)

⁵³ Nach cate' beyož be' Jesúsen' jempl ca', beze'e latjen' len bene' ca' zjanaque' le' txen

⁵⁴ jaya'aque' laže'. Na' jaysed jaylo'ede' bene' gualaž che' ca' lo' yodao' chegaquen'. Na' leca besyebande' len xtižen' na' gose' lježe':

—¿Ga jasede' yela' sina'? na' ¿nacxečen' chac chone' yela' guac ca'?

⁵⁵ Nombia'chone', le naque' xi'in ben' chonšagüe' yag. Na' xne'ena' lie' María, na' Jacobo, José, Simón na' Judas zjanaque' bene' biše'.

⁵⁶ Na' lecze bene' zane' ca' nite' lažcho nga. ¿Nacxe chaquen' cho'e diža' ca' na' chacte' chone' yela' guac?

⁵⁷ Na' dan' gosone' xbab nac Jesúsen' con to bene' gualaž chegaque', bi gosaclačže' yesejle'e che'. Na' gož Jesúsen' legaque':

—Yogo'ze bene' chonla'ane' bene' choe' xtiža' Diosen', perw bene' gualaž che' na' bene' lo' yo'o che' bi chesonla'ane' le'.

⁵⁸ Na' to chopze yela' guac ben Jesúsen' Nazareten' dan' bitw gosejle'e che'.

14

Quingan' goc gosote' Juan ben' bzoa bene' nis
(Mr. 6:14-29; Lc. 9:7-9)

¹ Na' ca tiempen' Herodes ben' naque' guber-
nador che distritw Galilean', bende' diža' ca nac
yogo'loł dan' chon Jesúsén'.

² Nach gože' xmose' ca':

—Bengan' da' Juanna', ben' bzoa bene' nis.
Ba bebane' ladjo bene' guat ca', da'nán' chaque'
chone' yela' guac.

³⁻⁴ Herodesen' gwne' ca' dan' bene' mandadw
gosote' da' Juanna'. Quingan' goc: Herodesen'
beque'e Herodías ca xo'ole' la'czla' Herodías naque'
xo'ole bene' biše' Felipe. Na' Juanna' gože' Herode-
sen':

—Bi cheyala' soalen no'ol che bene' bišon'.

Na' dan' gož Juanna' Herodesen' ca', da'nán'
Herodesen' bene' mandadw gosezene' Juanna'
na' bosocheje' ni'a ne'e len gden lo' ližya gan'
gosegüe'ene'.

⁵ Herodesen' goclaže' gote' Juanna', perw bitwbi
bende' le', le gwneзде' bene' zan chesejle'e Juanna'
cho'e xtiza' Diosen', na' bžebe' bi yeson bene' ca'.

⁶ Perw na' cate' gosone' lnin' ža la Herodesen', bi'
no'ol che Herodías bya'abe' lao bene' ca' ja'ac lnin'.
Na' leca bebe Herodesen' can' bya'a no'ol güegon',

⁷ na' bzoe' Diosen' testigw che' gwnežjue'be'
bite'teze nabebe' le'.

⁸ Na' gwlo'oyela' xna'ben' lebe' cont gožbe'
Herodesen':

—Ben neda' to lo platw yichj Juan ben' chzoa
bene' nis.

⁹ Ne late'ze bi gwyazlaže' rey Herodesen' gone'
can' gož no'ol güegon' le', perw bačhle bzoe' Diosen'
testigw che' lao bene' ca' jasa'ac lnin' gwnežjue'be'

bite'teze nabebe' le', da'nan' benšaze' mandadw gac can' gwñabebe' le'.

¹⁰ Ca' goquen' bene' mandadw jasechogue' yen Juanna' lo' ližya gan' yo'ena'.

¹¹ Na' bosožie' yichjen' to lo platw cont bosonežjuen' no'ol güegon' na' lebe' bnežjwben' xña'be'.

¹² Nach bene' ca' zjanaque' txen len da' Juanna' jasyexi'e cuerp chen' na' jasecuasen'. Gwde na' ja'aque' gan' zoa Jesús'en' jaseže'ne' can' ba goquen'.

Bguagw Jesús'en' gayo' mil bene'

(Mr. 6:30-44; Lc. 9:10-17; Jn. 6:1-14)

¹³ Na' cate' bene' Jesús'en' can' goc che da' Juanna', beze'e latjen' len bene' ca' zjanaque' le' txen na' besyeyo'e to lo' barcw par ja'aque' to latje daš na' nono nochle ja'aclen legaque'. Perw bene' ca' že' yež ca' zjachi' cho'a nesdaon' cate' gosende' ba zjada Jesús'en', na' gosa'ac lažgaque' ja'aque' yo biž jasešague' Jesús'en'.

¹⁴ Na' cate' bžin Jesús'en' cho'a nesdaon', ble'ede' nita' bene' zan na' beyaše' beži'ilaže'de' legaque'. Na' beyone' yogo' bene' ca' chesacšene.

¹⁵ Na' cate' ba chxoa gwbiž gosebiga' bene' ca' zjanaque' le' txen lagüen', na' gose'ene':

—Zoacho to latje ga bibi de, na' ba nac bagwže' par gagwcho xgüe. Bze bene' quinga diža' cont šjaya'aque' yež dao' ca' dan' zjachi' gala'ze šjasediljue' da' yese'ej yesagüe'.

¹⁶ Nach Jesús'en' gože' legaque':

—Bitw cheyala' šjaya'aque', san le'e güe'elne' da' yesagüe'.

17 Nach gose'ene':

—Chopga be_l ya'a chechon' de na' gayo'ga yetextil dao'.

18 Nach Jesúsen' gože' legaque':

—Le šjaxin' ni.

19 Nach ben Jesúsen' mandadw gosebe' bene' zan ca' lo yixyen'. Na' gwxi'e yetextil ca' gayo' na' be_l ya'a ca' chope, na' gwne'e yabale be'e yela' choxclen che Diosen', na' bzoxjen' be'en bene' ca' zjanaque' le' txen cont goseyisen' len to to bene' ca'.

20 Na' yogüe' gosagüen' na' goseljde'. Na' bososše'e šižiñw žome len yetextil bixjw len late' güeje be_l dan' bega'an'na'.

21 Na' bene' ca' gosagw da' ca' zjanaque' ca do gayo' mil bene' byo, bi cuent no'ol ca' len bidao'.

Jesúsen' gwze'e lo nisdaon'
(Mr. 6:45-52; Jn. 6:16-21)

22 Gwde na' Jesúsen' bene' byen besyeyo'o bene' ca' zjanaque' le' txen lo' barcon' cont gosebialagüe' besyelaque' yešla'ale nisdaon' šlac bega'an' le' besele' bene' ca' ližgaque'.

23 Na' beyož besele' bene' ca' ližgaque', gwloe' to lo ya'a jal güiže' Diosen' toze'. Na' cate' go_l, toz Jesúsen' zoe' lo ya'an.

24 Na' ca' nac barcon' gan' zeseyeyo'o bene' ca' zjanaque' Jesúsen' txen, ba zejen do gachol nisdaon' nžiga'ses nisen' len dan' chas chata' nisdaon', le ben' chechjen clele.

25 Na' do šbal beyetj Jesúsen' ya'ana' na' gwze'e lo nisdaon' na' ba zejgale' gan' zja'aquen'.

26 Nach cate' besele'ede' le' zeje' lo nesdaon' leca besežebe', na' bososye'e gosene':

—iše da' chda chelen' chle'echo!

27 Na' la' boļ güižte Jesúsen' legaque', gože'ne':

—Le gonchach laže'le. Neda'na'. Bitw žeble.

28 Nach Pedroa' gože'ne':

—Xanto', še da' li le'na', ben mandadw sa'a lo nesdaon' yida' gan' zon'.

29 Nach gož Jesúsen' le':

—Da, Pedro.

Na' la' bchojte Pedroa' lo' barcon' gwzolao gwze'e lo nesdaon' zeje' gan' zoa Jesúsen'.

30 Perw na' cate' gocbe'ede' chechjhgua ben', bžebe' na' gwzolao chebe' lo' nisen'. Nach bosye'e, gože' Jesúsen':

—Xana', bosla neda'.

31 Na' la' blite na' Jesúsen' bexae'ne', na' gože'ne':

—iBixchen' chac chopdo'? Gweyje'le'ch chia'.

32 Nach cate' beyo'o Jesúsen' len Pedroa' lo' barcon', la' gwlezte be'na'.

33 Na' bene' ca' že' lo' barcon' bosozoa xibe' lao Jesúsen' gošonxene'ne', gose'ene':

—Da' licze len' naco' doguale Xi'in Diosen'.

Jesúsen' beyone' bene' chesacšene ben' nita' Genesaret

(Mr. 6:53-56)

34 Na' goselague' nesdaon' na' besežine' yežlio gan' nzi' Genesaret.

35 Na' cate' bene' Genesareten' besyeyombi'e Jesúsen', goseyise' diža' yogo' yež ca' dan' zjachi' gaļa'ze cont gosenezde' ba bžin Jesúsen' lažgaque'. Na' bene' ca' že' yež ca' goseče'e yogo' bene' chesacšene lao Jesúsen'.

³⁶ Na' goseneyoede' Jesúsen' gwnežjue' latje yesoxe' la'ch late'ze xni'a xen'. Na' yogo' bene' gosoxen' besyeyaquede'.

15

Diža' mal dan' chchoj cho'achon' chonen cont lažda'ochon' bi naquen xilaže' len Diosen'

(Mr. 7:1-23)

¹ Na' bal bene' fariseo ca' na' bene' ca' chososed chosolo'e dan' bzoj da' Moisésen' gosa'aque' Jerusalénna' na' besežine' gan' zoa Jesúsen', na' gose'ene':

² —¿Bixchen' bene' ca' zjanaque' le' txen bitw zjana'ogüe' da' cheson bene' gol ca'? ¿Bixchen' cbi chosyone'e zan ni'a cate' za' yesagüe'?

³ Nach Jesúsen' gože' legaque':

—Na' le'e ¿bixchen' chbejyichjle cbi chonle can' ža Diosen' cheyała' goncho san chonxen costumbr chelen'?

⁴ Diosen' none' mandadw can' goncho, gwne': “Le gap bala'an xaxna'le”, na' “Note'teze' še chnešaše' len xaxne'e cheyała' gate'.”

⁵ Perw le'e žale guaque ye' to bene' xaxne'e: “Bibi de goṇa' gaclena' le'e, le yogo' da' de chia' ba bnežjuan' lo na' Dios.”

⁶ Na' žale bich bi cheyała' gwnežjue' xaxne'en še ca'. Na' dan' žale ca', chzoale ca'ale dan' ža Diosen' na' con na'ole costumbr gole che da' xozxta'ole ca'.

⁷ Le'e nacle bene' gwxiye'. Chonle cayanen' bzoj da' Isaíasen' chele, gan' žan:

⁸ Bene' qui chesonxene' neda' len diža' cho'a, perw bi chesonxene' neda' len lažda'ogaque'.

⁹ Bibi zejen dan' chesonxene' neda',

le dan' chososed chosolo'eden' naquen da' chnalaže' benachze.

10 Nach Jesúsen' bozoł güiže' bene' ca' zjanžaguen' cont gosebigue' lagüen' na' gože' legaque':

—Le gwzenag da' nga nia' le'e na' le šejni'i.

11 Bitw nacho dan' che'ej chagw benachen' chonen cont lažda'ogüen' bi naquen xilaže' len Diosen'. Perw diža' mal dan' chchoj cho'e, lenna' chonen cont lažda'ogüen' bi naquen xilaže'.

12 Nach gosebiga' bene' ca' zjanaque' Jesúsen' txen lagüen' gose'ene':

—¿Bi goche'edo' bene' fariseo ca' beseže'e cate' gosende' xtižo'na'?

13 Na' gož Jesúsen' legaque':

—Gwžin ža cate' Xa' Diosen' ben' zoa yaban' gwžiaye'e yogo'loł bene' bi chosozenag che'. Gwžiaye'e legaque' can' choncho cate' chlažo'cho yiže' ca' chesela'ac lo yel.

14 Jaseye bene' fariseo ca'. Zjanaque' ca to bene' lchol bene' che'nde' cue'e nez yeto bene' lchol. Nezecho to bene' lchol bitw gac cue'e nez yeto bene' lchol, le txen šjasebiže' to lo' yechw.

15 Nach Pedroa' gože' Jesúsen':

—Bzejni'išque neto' bi zejen can' gwnaon'.

16 Nach gož Jesúsen' legaque':

—¿Lencze le'e bitw chejni'ile da' quinga ba gwnia'?

17 ¿Bi nezele yogo' dan' che'ej chagw benachen' cho'on lo' li'e na' chžin hor cheden?

18 Perw yogo' diža' dan' chesoe' benachen' chesechojen lo' yichjlažda'ogüen'. Na' še choe' bene' diža' mal, len chonen cont bi nac lažda'ogüen' xilaže' len Diosen'.

19 Le lo' yichjlaždao' benachen' nan' chchoj yogo' xbab mal cate' žan yesone' da' mal quinga: yesote' bene', yesata'lene' no'ol bi nac xo'olgaque' o bene' byo bi nac bene' chegaque', na' yesone' gwban, yeso'e diža' güenlaže' che lježgaque', na' yeseneye'e che bene'.

20 Xbab mal ca' chesonen cont bi nac laždao' bene' xilaže' len Diosen', gague dan' bi chone'e zan ni'a cate' za' gagüe'.

To no'ole bi naque' bene' Israel chejnlaže' Jesúsen'

(Mr. 7:24-30)

21 Beza' Jesúsen' latjen' len bene' ca' zjanaque' le' txen jaya'aque' distritw Galilea gała'ze gan' mbane ciuda Tiro na' ciuda Sidón.

22 Na' to no'ole zoa do na', ben' bi naque' bene' Israel, gwze'e laže' cont bžine' gan' zoa Jesúsen' na' jašague'ne'. Na' gwne' zižje, gože'ne':

—Xana', le' naco' xi'in diaža che da' rey David. Beyaše'sque neto'. To bi' no'ol chia' yo'o nyaz da' xigüe' yichjlažda'obe' na' leca chžaglaobe'.

23 Perw Jesúsen' bitw boži'e xtiža' no'olen'. Nach bene' ca' zjanaque' Jesúsen' txen gosebigue' cuite'na' na' gosata'yoede' le' gose'ene':

—Boži'išca no'olen', le con nagüe' chio' chol güiže' le' zižje cont gacleno'ne'.

24 Nach gož Jesúsen' legaque':

—Diosen' gwsele' neda' cont chaclena' bene' Israel gualaž checho na'ze, le legaque' zjazaca'lebe' ca xila' dao' be zjanacžeje.

25 Nach no'olen' gwbigue' bzoa xibe' lao Jesúsen', na' gože'ne':

—Xana', goclenšca neda'.

26 Nach gož Jesúsen' le':

—Bitw naquen güen yeca'acho yela' guagw che xi'incho na' gwnežjwchon gagw beco' ca'.

27 Nach gože'ne':

—Leczdo' Xana'. Perw beco' ca' guac yesagwba' bła'a dao' da' cheselažo' lo yo.

28 Nach Jesúsen' gože'ne':

—No'ole, leca chejnilažo' neda'. Guaclencza' le' can' chaclažon'.

Na' la' beyacte xi'in no'olen'.

Jesúsen' beyone' bene' zan bene' chesacšene

29 Beza' Jesúsen' latjen' len bene' ca' zjanaque' le' txen goso'e nezen' dan' chde gala'ze cho'a nisdao' Galilean'. Nach gosepe' to lo ya'a jasechi'e lo ya'ana'.

30 Na' besežin bene' zan lo ya'a gan' zoa Jesúsen' len bene' ca' zjanaque' le' txen. Zjanche'e no bene' nxiņj ni'e, bene' lchol, bene' bi chac nie', bene' bi zoa ni'a na'gaque', na' len bene' chese'e gwde gwdele yižgüe', na' bosonite' legaque' xni'a Jesúsen'. Na' Jesúsen' beyone' yogüe'.

31 Na' leca besyebane bene' ca' cate' besele'ede' can' besyene bene' ca' bi gosac yesene, na' besyeyac bene' bi zjazoa ni'a na'gaque', na' besyeda bene' nxiņj ni'e, na' besele'e bene' lchol ca'. Nach gosonxene' Diosen' ben' chonxen chio' bene' Israel.

Jesúsen' bguagüe' tap mil bene'

(Mr. 8:1-10)

32 Gwde na' Jesúsen' goxe' bene' ca' zjanaque' le' txen na' gože' legaque':

—Cheyaše'da' bene' qui, le ba goc šone ža zjanite' nga len neda', na' bibi de da' yesagüe'. Na' bi cha-claža' yosa'ane' sin cbi yesagüe' cont bi yesečholde' chanez.

³³ Nach legaque' gose'ene':

—Gan' zoacho nga naquen to latje daš ga bibi de. ¿Gaxe želecho da' yesagw yogo' bene' quinga?

³⁴ Nach gož Jesúsen' legaque':

—¿Gaca' yetextilen' de chele?

Nach gose'ene':

—Gažga yetextil dao' zjade na' to čhopga bel ya'a dao'.

³⁵ Nach Jesúsen' bene' mandadw yesebe' bene' zan ca' lo yon'.

³⁶ Na' gwxi'e yetextil ca' gaže na' len bel ya'a dao' ca', nach be'e yela' choxclen che Diosen', nach bzojjen' bnežjuen' bene' ca' zjanaque' le' txen na' legaque' bosonežjue' che yogo' bene' nita' na'.

³⁷ Na' yogüe' gosagüe' goseljde'. Gwdena' bososše'e yegaže žome len late' güeje yela' guagw dan' bega'anna'.

³⁸ Na' bene' ca' gosagw yetextilen' len belen' nac tap mil bene' byo, na' bi cuent no'ole ca' len bidao' ca'.

³⁹ Nach beyož besela' Jesúsen' bene' ca' ližgaque', na' beyo'e to lo' barcw len bene' ca' zjanaque' le' txen na' ja'aque' distritw gan' nzi' Magdala.

16

Gosenabde' Jesúsen' gone' to da' yesele'ede' le'e yaba

(Mr. 8:11-13; Lc. 12:54-56)

¹ Na' goquen' bal' bene' fariseo ca' na' bene' saduceo ca' gosebigue' gan' zoa Jesús'en', na' cont yesagüe' xya che' gosenabe' gone' to yela' guac da' yesele'ede' le'e yaban' cont yesenezde' še da' licze Diosen' gwsele' le'.

² Nach Jesús'en' gože' le'gaque':

—Cate' chle'ele chexna le'e yaban' šeže'le nach žale: “Yeža'a gwxe dan' chexna le'e yaban'.”

³ Na' cate' chle'ele zete bejw xna le'e yaban' do cheni' nach žale: “Guac yejw zag, le ze bejw xna le'e yaban'.” Nacle bene' gwxiye', le nezele še guac yejw zag o še guac zeye' caten' chle'ele can' nac le'e yaban', perw bi chache'ele bi zejen da' ca' chon Diosen' tiemp nga zoacho na'a.

⁴ Le'e zoale na'a nacchgual' bene' laždao' xi'a na' ba gwlejyichjle Diosen'. Da'nan' chnable gona' yeto yela' guac da' le'ele cont nezele še Diosen' gwsele' neda'. Perw bitw gona' can' chnablen', le ba ble'ele da' chona'. Dan' gon Diosen' len neda' cont nezele le'na' gwsele' neda' naquen ca dan' bene' len da' Jonás ben' be' xtiža' Diosen' cani'.

Nach beyož gwna Jesús'en' ca', beze'e len bene' ca' zjanaque' le' txen gan' nita' bene' ca'.

*Dan' chsed chlo'e bene' fariseo ca' na' bene' saduceo ca' zaca'leben ca levadura
(Mr. 8:14-21)*

⁵ Na' cate' besežine' yešla'a nisdao' Galilean', bene' ca' zjanaque' Jesús'en' txen gosache'ede' gosanlaže' yetextil da' yesagüe'.

⁶ Nach Jesús'en' gože' le'gaque':

—Le gon xbab, le gwsaca' len levadura che bene' fariseo ca' na' che bene' saduceo ca'.

7 Nach gose' lježgaque':

—Gwne' ca' le gague bi yetextilen' noa'chon'.

8 Na' Jesúsen' gocbe'ede' xbab dan' gosone', na' gože' legaque':

—¿Bixchen' chacžejlaže'le da' bibi yetextil de? ¿Bi chejle'le napa' yela' guac par gwguagua' le'e?

9 ¿Bina' šejni'ile? na' ¿ba gonlaže'le can' bguagua' gayo' mil beņe' byo len gayo'ze yetextil dao'? na' lecze ¿bitw zalaže'le do yebał žome pedas yetextil botoble dan' becho'onen?

10 Na' ¿chixe tap mil beņe' byo ca' bguagua' len gažze yetextil dao'? ¿Zalaže'le yebał žome pedas yetextil can' botoble dan' becho'onen?

11 ¿Bixchen' con benle xbab che yetextilen' cate' gwnia' le'e gwsaca'le len levadura che beņe' fariseo ca' na' che beņe' saduceo ca'?

12 Nach beņe' ca' zjanaque' Jesúsen' txen gosacbe'ede' gague be'e diža' che levadura dan' chosočine' par chcha'o yetextilen' san be'e dižan' ca' cont bi yosozenague' che dan' chososed chosolo'e beņe' fariseo ca' na' beņe' saduceo ca'.

Pedroa' gwne' Jesúsen' naque' beņe' gwsela' Diosen' cont nabi'e

(Mr. 8:27-30; Lc. 9:18-21)

13 Nach Jesúsen' len beņe' ca' zjanaque' le' txen besežine' gała'ze to ciuda dan' nzi' Cesarea de Filipo. Nach Jesúsen' gože' beņe' ca' gosa'aclene' le':

—Diosen' gwsele' neda' golja' beņach. Perw ¿bi chesena beņe'? ¿non' naca' neda'? ¿Bi chesene'?

14 Na' gose'ene':

—Baļe' chesene' naco' da' Juan ben' bzoa beņe' nis. Na' yebaļe' chesene' naco' Elías ben' be'

xtiža' Diosen' cani'. Na' yebale' chesene' naco' da' Jeremías o yeto beṇe' be' xtiža' Diosen' cani'te.

¹⁵ Nach gože' legaque':

—¿Chixe le'e? ¿No žale naca'?

¹⁶ Nach Simón Pedroa' gože'ne':

—Len' naco' Cristo ben' gwlej Diosen' cont ṇabi'o, na' naco' dogualje Xi'in Dios, Dios ben' zoa toḷi tocaṇe.

¹⁷ Nach Jesúsen' gože'ne':

—Simón xi'in Jonás, mbalaz zo' dan' gwnao' ca'. Notno beṇač bzejni'i le' nao' ca'. Toz Xa' Dios ben' zoa yaba, len' ba bzejni'iden' le'.

¹⁸ Na' neda' žia', len' lio' Pedro na' zeje dižan' yej. Na' ca to beṇe' güen yo'o chbeje' yej gual cont gonen žin cate' cueque' len yo'on, ca'cze chbeja' le' gono' xšina', gaco' beṇe' nechw yotobo' beṇe' yesonxene' neda'. Na' bitwbi gac yeson da' xigüe' ca' yosolej yosošošjen beṇe' ca' yesonxene' neda'.

¹⁹ Na' gona' lo nao' zgua'tec le' go'o xtižan' len beṇe' zan cont yosozenague' che Dios ben' zoa yaban' na' ṇabi'e yichjlažda'ogaque'. Na' lecze naquen lo nao' yo'o beṇe' ca' yesonxene' neda' bica' da' ca' nac güen yesone' na' bica' da' ca' cbi nac güen yesone'. Na' Diosen' gwzejni'ide' le' naquen' ye'gaco'ne' cont yežaguen len dan' ža Diosen'.

²⁰ Nach Jesúsen' gože' legaque' nono yese'e še naque' Cristo ben' gwlej Diosen' cont ṇabi'e.

Jesúsen' gwduxjue'ede' gate'

(Mr. 8:31-9:1; Lc. 9:22-27)

²¹ Na' žana' Jesúsen' gwzolaḡüe' bzejni'ide' beṇe' ca' zjanaque' le' txen cheyaḷa' šeje' Jerusalénna'. Na' gože' legaque' beṇe' gole blao ca' chesenabi'e

nación chechon', na' bꞑoz gwnabia' ca' na' bene' ca' chosed chosolo'ede' dan' bzoj da' Moisés yosoꞑhi yososaque' le' na' yesote' le'. Perw yeyon ža yebane' ladjo bene' guat ca'.

22 Nach Pedroa' gwꞑhe'e Jesúsen' gan' nac lchojiže na' gwzologüe' be'lene' le' diža' gwdile' le', gože'ne':

—Xana', Diosen' gaclene' le'. Bitw gac chio' ca dan' žo' nga.

23 Perw Jesúsen' gwyechje' gwne'e Pedroa' gože'ne':

—iGwcuas ca'ale Satanás! Chgo'oyelo' neda' bi gona' can' nžia bia' Diosen' gona'. Bi nsa'o xbab che Dios, san nsa'o xbab che beṇaḥ.

24 Gwde na' Jesúsen' gože' bene' ca' zjanaque' le' txen:

—Note'teze bene' še chaclaže' gaque' neda' txen, cheyala' cuejyichj cuine' la'czla' žaglagüe' na' con gone' can' ñia' neda'.

25 Note'teze bene' chacde' gone' cont bi žaglagüe' o cont nono yesot le', benan' cuiayi'. Na' note'teze bene' chzanlaže' cuine' žaglagüe' o gate' ne chia' neda', ba de yela' mban che' toli tocaṇe.

26 ¿Bixe zejenna' to bene' ñabi'e doxen yežlion' na' cuiaye'e bi gata' yela' mban che' toli tocaṇe? Le bi zoa nacle gon beṇaḥen' chixjue' cont gata' yela' mban che' toli tocaṇe.

27 Diosen' gwsele' neda' golja' beṇaḥ na' cate' yida' yežlio nga da' yoble nsa'a yela' zaca' juisyw che Xa' Diosen' na' nchi'a angl chia' ca', cana'ch gona' cont to to beṇaḥen' ñite' mbalaz o yesezaca'zi'e neche da' goson to toe'.

28 Na' da' li žia' le'e, balle nita'le nga na'a bina' gatle cate' žin ža le'ele neda' yida' gwlo'a yela' gwnabia' chian', neda' naca' ben' gwsela' Diosen' golja' beṇaḥ.

17

Jesúsen' goque' ca to be'ni'
(Mr. 9:2-13; Lc. 9:28-36)

1 Gwde xop ža Jesúsen' gwchi'e Pedroa' len Jacobo na' Juan bene' biše' Jacobo na' ja'aque' to lo ya'a sibe. Na' nono nochle ja'aclen legaque'.

2 Na' lao legaque' bža' ca goc Jesúsen', cho'alagüen' goctiten ca gwbiž, na' xalanen' beyaquen šiš xila' ca be'ni'.

3 Na' concze besele'ede' da' Moisésen' len da' Elíasen' na' chosošalje' len Jesúsen'.

4 Nach Pedroa' gože' Jesúsen':

—iXanto', leca güenna' zoacho nga! Še chaclažo', gonto' šone ranšw, to chio', na' to che Moisés, na' yeto che Elías.

5 Ne' choe'te Pedron' dižan' ca' cate' to bejw da' chactiten gwyechjen legaque' na' ladjo bejon' gosende' gwna Diosen':

—Benga Xi'ina' ben' chacda'. Chbe chezaqueláže' chgüeda' che'. Le gwzenag che'.

6 Na' cate' bene' ca' nche'e Jesúsen' gosende' diža' ca' besežebchgüe', con gosaze' coscho'ale lo yon'.

7 Nach gwbiga' Jesúsen' gwXoa ne'e yichjgaquen' na' gože'ne':

—Le yeyas. Bitw žeble.

8 Na' cate' besyechis lagüen', noch no besele'ede' san toze Jesúsen' zie'.

⁹ Na' gwde na' šlac chesyeyetje' lo ya'an Jesúsen' gože' legaque':

—Nono ye'le can' nac dan' ba ble'ele nga. Cate'ch ba bebana' ladjo beṇe' guat ca', neda' naca' ben' gwsela' Diosen' golja' beṇaḥ, cana'ch güe'le diža' chen.

¹⁰ Nach beṇe' ca' zja'aclen Jesúsen' gose'ene':

—Beṇe' ca' chososed chosolo'e dan' bzoj da' Moisésen' chososedde' neto' chesene' zgua'tec da' Elías ben' gwzoa cani' cheyala' yide' da' yoble cate' za'yedenabia' ben' sela' Diosen'. ¿Bixchen' chesene' ca'?

¹¹ Nach Jesúsen' gože' legaque':

—Da' licze zgua'tec yid da' Elíasen' na' yey-onšagüe' yogo'lol.

¹² Perw žia' le'e, Elías ba bide' na' bi gosacbe'e beṇe' še nac le'. Na' gosonde' le' con ca gosaclaže'. Na' ca'czen' yosoči yososaque' neda' naca' ben' gwsela' Diosen' golja' beṇaḥ.

¹³ Nach beṇe' ca' zja'aque' len Jesúsen' gosacbe'ede' cho'e diža' che da' Juan ben' bzo'e beṇe' nis.

Beyon Jesúsen' to bi' chazbe' šon

(Mr. 9:14-29; Lc. 9:37-43)

¹⁴ Na' cate' besežine' gan' zjanžag beṇe' zan, to beṇe' bšague' Jesúsen' na' bzoa xibe' lagüe'na' gože'ne':

¹⁵ —Xana', beyaše'laže'šca xi'ina' nga. Chazbe' šon na' leca chžaglaobe' len len. Na' zan ni'a ba jačazbe' lo yi' na' lecze zan ni'a ba blažo'be' lo nis.

¹⁶ Ba bedesana'be' lao beṇe' ca' zjanaque' le' txen, perw bitw gosaque' yesyeyone'be'.

¹⁷ Nach Jesúsen' gože' beṇe' ca' že'na':

—ǰLe'e be_{ne}' bi chejnilaže', chonchguale clele!
 ǰBatca' zelao na'lagua' le'e? Bedesan bidaon' ni.

18 Nach Jesúsen' bene' mandadw yechoj da' xigüen' yo'o nyazen yichjlaždao' bidaon' na' la' bechojten. Na' la' beyaquetebe'.

19 Na' gwde goc ca', be_{ne}' ca' zjanaque' Jesúsen' txen gosebigue' lagüen' cate' zoe' toze', na' gose'ene':

—ǰBixçhen' bi goc neto' yebejto' da' xigüen'?

20 Jesúsen' gože' lega_{que}':

—Bitw goc yebejlen dan' bitw gwyejle'le Diosen' gone' yechojen. Xsa xomdasen' naquen da' dao' riz. Na' da' li žia' le'e, la'czla' dan' chejnilaže'le Diosen' naquen ca to xsa xomdas lagüe dan' bi chejnilaže'teclene', še šejnilaže'line', guaque ye'le ya'a nga: “Gwcuas nga, na' jayzoa na'ate”, na' gac can' nalen'. Bitw bi de dan' bi gac gonle con še chejle'le Diosen' gone' gaquen.

21 Na' cont yebejle da' xigüe' ca' dan' zjanac ca dan' bebeja' yichjlaždao' bidaon'a', cheyała' gwyo gwçhejle gonle gwbas na' zoatezle yoł güižle Diosen'.

Da' yoble Jesúsen' gwdixjue'ede' gate'

(Mr. 9:30-32; Lc. 9:43-45)

22 Na' šlac zjayda Jesúsen' len be_{ne}' ca' zjanaque' le' txen do gan' mbane distritw Galilea, Jesúsen' gože' lega_{que}':

—Diosen' gwsele' neda' golja' be_{na}çh, na' yosodie' neda' lo na' be_{ne}' chesegue'ede'nda',

23 na' yesote'nda'. Perw na' yeyon ža yosban Diosen' neda' ladjo be_{ne}' guat ca'.

Nach bene' ca' zjanaque' Jesúsen' txen cate' gosende' xtiže'na' gosacyaše'chgüede'.

Jesúsen' gwdixjue' da' chosochixjue' che yodao'

²⁴ Na' cate' besyežine' Capernaum, bene' ca' chosochixjue' che gastw che yodao' blao che chio' bene' Israel ja'aque' lao Pedroa'. Na' gose'ene':

—¿Bi chyixjw maestrw chelen' da' cheyała' chixjue' che yodaon'?

²⁵ Nach gož Pedroa' legaque':

—Chyixjuen'.

Gwde gwna Pedroa' ca' gwyo'e lo' yo'ona'. Nach Jesúsen' la' gožtie' le':

—¿Bi xbab chono', Simón? Ca nac bene' gwnabia' ca' nita' yežlio nga, ¿non' chacdo' chosochixjue'? ¿bene' gualaž che' o še bene' zito'?

²⁶ Nach Pedroa' gože'ne':

—Chosochixjue' bene' zito'.

Nach Jesúsen' gože' le':

—Bene' zjanaque' biše' lježe' bitwbi chesey-ixjue'. Na' chio' naccho xi'in Dios ben' zoa yaba chnabi'e, bitw cheyała' chixjwcho che yodaon'.

²⁷ Perw cont nono yeson xbab chgue'echo yodao' blaon', na' chixjwcho. Gwyej cho'a nesdaon', na' bzala' yixjw chion' na' bel nechw be seno', lo cho'aba'na' želdo' to mechw. Na' yeyoxon' šjadixjo' chechon'. Guaqueczen par šjadixjo' che chopcho.

18

Gosacyož bene' ca' zjanaque' Jesúsen' txen noe' nacch blao

(Mr. 9:33-37; Lc. 9:46-48)

¹ Nachen' be_{ne}' ca' zjanaque' Jesúsen' txen gosebigue' cuite'na', na' gose'ene':

—¿No neto' gacchto' blao cate' Diosen' ben' zoa yaban' gone' cont nabi'o?

² Na' Jesúsen' goxe' to bidao' na' bzeche'be' gachol legaque'.

³ Na' gože'ne':

—Da' li žia' le'e, note'tezle še bi gwša' xbab chelen' cont gwzenagle che Diosen' ca chon to bidao' cate' chzenagbe' che xaxna'be', gwbat nabia' Diosen' ben' zoa yaban' yichjlažda'ole.

⁴ Na' note'teze be_{ne}' še yeyaque' ca bidao' nga na' gwzexjwlaže' lao Diosen', nach gague' be_{ne}' blao len neda' cate' Diosen' ben' zoa yaba gone' cont solao nabi'a.

⁵ Note'teze be_{ne}' chone' güen len to bidao' ca bi' nga ne_{che} da' chejnilaže' neda', choncze' güen len neda'.

*Bitw cheyala' goncho cont gon be_{ne}' da' xinj
(Mr. 9:42-48; Lc. 17:1-2)*

⁶ Note'teze be_{ne}' chon cont lažo' to be_{ne}' za' gwzomagüe' chejnilaže' neda' gone' da' xinj, yejni'acle yosocheje' yene' to yiše xen na' yosozale'ne' lo' nidaon' clal ca da' gone' cont lažo' be_{ne}' yoble gone' da' xinjen'.

⁷ Nyaše'chguaze gac che be_{nachen}' da' zjade da' zan yežlio nga da' chesonen cont yesone' da' xinj. Bia'cze gata' dan' yeson cont lažo' be_{ne}' yesone' da' xinj, perw nyaše'chguaze gac che be_{ne}' chon cont lažo' be_{ne}' yoble gone' da' xinjen'.

⁸ Na' da' li žia' le'e, še ni'a na'len' chonen cont gonle da' xinj, cheyala' cuejyichjle da' malen'

chonle. Yejni'a bibi ni'a na'len' soa clēl ca gonle da' xinjen' len len. Na' yejni'a šjayzoale len Diosen' toli tocaṇe bi zoa šla'a taca'len' o nchog šla'a ni'alen' clēl ca yeyejle lo yi' gabil nya' cuerp chelen'.

⁹ Na' še yejlaolen' chonen cont gonle da' xinjen', cheyala' cuejyichjle da' malen' chonle. Yejni'a bibi yejlaolen' cuia clēl ca gonle da' xinjen' len len. Na' yejni'a šjayzoale len Diosen' toli tocaṇe zoa šla'aze yejlaole clēl ca yežinle lo yi' gabil žia chop la'a yejlaolen'.

Jempl che xila' be gocžeje
(Lc. 15:3-7)

¹⁰ 'Bi gonle note'teze beṇe' chejnilaže' neda' ca beṇe' bibi zaca'tec, la'czla' bitec zaque' len beṇaḥ. Žia' le'e, angl ca' chesape' legaque' lecze nite' lao Xa' Diosen' yaban' gan' zoe'na'.

¹¹ Na' ca naca' neda', Diosen' gwsele' neda' golja' beṇaḥ cont gwnežjua' yela' mban toli tocaṇe che beṇe' ba zjambiyi'.

¹² '¿Bixe chonle xbab? Še nita' to gayoa xila' chele na' yexjw toba' ¿bi yocua'anle be ca' yetaplalj togalj do lo ya'a na'ze na' šjaydiljwle ben' bexjua'?

¹³ Na' da' li žia' le'e, cate' yeželeleba' yebechle dan' beželban' clēl ca can' chebele che be ca' taplalj togalj ben' bi gosacžeje.

¹⁴ Ca'czen' naquen len beṇe' ca' chesejnilaže' neda' beṇe' ca' bitec bi zjazaque' len beṇaḥen'. Xacho Diosen' ben' zoa yaban' bitw che'nde' cuiayi' ne toe'.

*Cheyaḷa'yezi'xencho che bene' lježcho bene' chese-
jnilaže' Diosen'*

(Lc. 17:3)

15 'Še to bene' lježle gone' mal contr to le'e, šejle šje'elenlene' diža' chopzle can' nac dan' chonen' cont yetinjden'. Na' še gwzenague' diža' dan' šje'elenlenen', yezoe' binlo len Diosen' da' yoble.

16 Perw še bi gwzenague' diža' dan' šje'elenlenen', güen ch'e'ele yeto o yečope bene' lježle cont yesaque' testigw ba gota'yoele ben' yoša' xbab chen'.

17 Na' še bitwczew gwzenague' chele, le güe' diža' can' chonen' lao yogo'le gan' chdop chžagle chonxenle Diosen'. Na' še neca gwzenagcze' che yogo'le, cbich gonlne' cuent len le'e chdop chžagle chonxenle Diosen'. Perw le gon cuent naque' txen len bene' ca' bi chesejnilaže' Diosen', ca no bene' güečhixjw bene' chesonchgüa da' xinj.

18 'Da' li žia' le'e, naquen lo na'le ye'le bene' ca' yesonxene' neda' bica' da' nac güen yesone' na' bica' da' ca' bi nac güen yesone'. Na' Diosen' gwzejni'ide' le'e naquen ye'gaclene' cont yežaguen len dan' ža Diosen'.

19 'Na' da' yoble žia' le'e, še chople nita'le yežlio nga gwxi'ale bin' nabele Diosen', Xa' Diosen' ben' zoa yaban' goncze' dan' nabelenen'.

20 Na' gan' nžag chope šonle chonxenle neda', zoacza' txen len le'e.

21 Nach Pedroa' gwbigue' gože' Jesúsén':

—Xana', še bene' lježa' chone' da' mal contr neda', ĵbaḷ ni'a cheyaḷa' yezi'xena' che'? ĵzelao do gaž ni'a?

22 Nach Jesúsén' gože'ne':

—Žia' le', gague cheya_la' yezi'xen che lježle zelao do gaž ni'a, san yogo'te ni'a cheya_la' yezi'xen che lježle.

Jempl che ben' bi bezi'xene' che dan' čala' be_ñe' lježe'

²³ Na' yela' gwnabia' che Diosen' ben' zoa yaban' zaca'leben ca da' nga goc. Zoa to be_ñe' gwnabia' ben' chesa_la' xmose' ca' xmechue'. Na' goclaže' yebeje' cuent len lega_que'.

²⁴ Na' cate' gwzola_güe' bezi'e cuent che to toe', da' nechw bžin to xmose' ben' čala' zan millón.

²⁵ Na' mosen' bitwbi xmechue' gota' par yonežjuen'. Da'nan' be_ñe' gwnabian' bene' mandadw ta'oga_que' len xo'ole', len xi'ine' ca' na' len doxen da' zjade che' cont yeyaxjw dan' čale' čen'.

²⁶ Nach mosen' bzoa xibe' lao be_ñe' gwnabian' gota'yoede' le' gože'ne': “Xana', gwdapešca yela' chxenlaže' len neda', na' yeyo_na' doxen dan' čala' čion'.”

²⁷ Nach be_ñe' gwnabian' beyaše'de' le' na' bezi'xene' che doxen dan' čale' na' bsane' le'.

²⁸ Perw na' cate' bechoj mosen' liž xanen', la' bežagtie' yeto mos lježe' be_ñe' čala' late' xmechue'. Nach la' gwnizte' yene' gože'ne': “Yeyo_no' dan' čalo' čian' netec na'a.”

²⁹ Nach mos lježen' la' bzoate' xibe' lagüen', gože'ne': “Gwdapešca yela' chxenlaže' čia' na' yeyo_na' doxen dan' čala' čion'.”

³⁰ Perw na' mos nechon' bitw bzenague' che mos lježen'. La' gwyejte' jene' mandadw goseyixjue'ne'

ližya na' bi yechoje' še biṇa' yonežjue' dan' chale' chen'.

³¹ Na' mos ca' yezica'chle cate' besele'ede' can' ben' mos nechon', leca gosacde' zi'. Na' ja'aque' lao beṇe' gwnabian' jaseže'ne' yogo'loḷ can' goca'.

³² Nach beṇe' gwnabian' goxe' mos nechua' da' yoble lagüe'na', gože'ne': "Le' naco' to beṇe' xi'achgua. Neda' bezi'xena' chio' doxen dan' chalō' chian' dan' gota'yoedo' neda' yezi'xena' chion'.

³³ ¿Bixchen' bi beyaše'do' mos lježo' ben' chale' chion' can' beyaše'da' le'?"

³⁴ Na' bža'achgua beṇe' gwnabian' na' bdie' le' lo na' beṇe' goseyixjue'ne' ližya ga žaglaogüe', na' bi yechoje' še biṇa' yeyixjue' doxen dan' chale' chen'.

³⁵ Nach Jesúsen' gože' beṇe' ca' zjanaque' le' txen: —Can' gon Xa' Diosen' ben' zoa yaban' len note'tezle še bi chezi'xenle che lježle do yichj do laže'le bite'teze dan' chesonde' le'e.

19

Bi cheyaḷa' yela'acho len no'ol chechon' cont soa-lencho no'ole yoble

(Mr. 10:1-12; Lc. 16:18)

¹ Na' Jesúsen' cate' beyož gwne' da' ca' beze'e distritw Galilean' na' gwḷague' yegw Jordánna' beyeje' gan' mbane distritw Judean'.

² Na' beṇe' zan ja'aclen le', na' beyone' beṇe' ca' chesacšene.

³ Na' baḷ beṇe' fariseo ja'aque' gan' zoe'na', le gosaclaže' yesebeje'ne' diža' da' yosochine' cont gosožie'ne' xya choḷ, nach gose'ene':

—¿Guac to beṇe' nšagna' yele'e len xo'ole' še bite'teze dan' chone' cbi cholaže' beṇe' chen'?

4 Nach gože' legaque':

—¿Biṇa' gwlable can' nyoj Xtiža' Diosen'? Žan cate' gwxe yežlion' Diosen' bene' beṇe' nechw ca' to beṇe' byo na' to no'ole.

5 Na' gwna Diosen': “Da'nan' beṇe' byon' gwsane' xaxṇe'e cont soalene' no'ole cḥen' na' chope' yesaque' ca toz beṇe'.”

6 Na' ca' bich yesac cḥope' san toze'. Da'nan' bi cheyaḷa' yesyele'e, le Diosen' ba bcode' legaque'.

7 Nach gose'ene':

—Še naquen ca' ¿bixcḥen' ben da' Moisésen' mandadw cate' to beṇe' yele'e len no'ol cḥen' cheyaḷa' cḥas to yiš da' gwnežjue' no'ol cḥen' ga güen' diža' besyele'ena'?

8 Jesúsen' gože' legaque':

—Da' Moisésen' be'e latje yela'ale len no'ol cḥele lagüe dan' nacle beṇe' güedenag len Diosen'. Perw cate' Diosen' bene' beṇe' nechw ca' bitw ṇacho goclaže' yesyele'e.

9 Žia' le'e, note'teze beṇe' chele'e len no'ol cḥe' na' cheque'e no'ole yoble, len neztede' no'ol cḥen' bitw naque' to no'ole chzoa xtoe', toz ca da' xinjen' chone' ca nac dan' chon ben' chata'lene' no'ol cḥe beṇe' yoble. Na' note'teze beṇe' yošagna'lene' to no'ole beṇe' bela'a len beṇe' cḥe', lecze tozcze ca da' xinj gone' ca nac da' chon beṇe' chata'lene' no'ol cḥe beṇe' yoble.

10 Nach beṇe' ca' zjanaque' Jesúsen' txen gose'ene':

—Še can' naquen cḥe beṇe' byo na' no'ole, güench nono gwšagna'.

11 Jesúsen' gože' legaque':

—Gague yogo' bene' yesejni'ide' da' nga, šinze bene' ca' ba bzejni'i Diosen' legaue' bi zejen.

¹² Nita' bene' bi žan yosošagne'e dan' gosaljē' bi zjanya' cuerp che', na' lecze nita' bene' bi chosošagne'e lagüe dan' gosone bene' legaue' cont bi zjanya' cuerp chegaue'. Na' lecze ca' nita' bene' cbi chosošagne'e lagüe dan' chesazlaže'che' yesone' xšin Diosen' ben' zoa yaban' chnabi'e. Le gwzenag che dan' ba gwnian' še ba ben Diosen' cont chejni'ilen.

Jasesane' bidao' lao Jesúsen'
(Mr. 10:13-16; Lc. 18:15-17)

¹³ Na' ja'ac bene' jasesane' bidao' lao Jesúsen' cont xoa ne'e yichjgache' na' nabe' lao Diosen' gaclene' legache'. Perw bene' ca' zjanaue' le' txen gosedile' bene' ca' zjanche'ebe'.

¹⁴ Nach Jesúsen' gože'ne':

—Le güe' latje yesid bidao' ca' lagua' nga, na' bi gwžonle, le bene' ca' zjanac ca bidao' quinga, legaue' chosozenague' che Diosen' ben' zoa yaba cont chnabi'e yichjlažda'ogaue'.

¹⁵ Na' beyož gwxoā na' Jesúsen' yichjgache' gwñabe' lao Diosen' gaclene'be', nach gwyeje' ga yoble.

Bene' güego' bene' goc bene' gwni'a
(Mr. 10:17-31; Lc. 18:18-30)

¹⁶ Na' goquen', to bene' güego' bžine' gan' zoa Jesúsen', na' gože'ne':

—Maestrw, le' naco' bene' güen. ¿Bi da' güen cheyala' gona' cont gata' yela' mban chia' toli to-cane?

¹⁷ Nach Jesúsen' gože'ne':

—¿Bixčhen' žo' naca' beṇe' güen? Toz beṇe' güen zoa, na' len' naque' Dios. Perw na' še chaclažo' gata' yela' mban čhio' toli tocaṇe, cheyala' gono' can' non Diosen' mandadw goncho.

18 Nach gože' Jesúsen':

—¿Bica' da' ca'?

Nach Jesúsen' gože' le':

—Nono gotle, bi gata'lenle no'ol bi nac no'ol čhele o beṇe' byo beṇe' bi nac beṇe' čhele, bi cuanle, bitw güe'le diža' güenlaže' che beṇe' lježle.

19 Le gap bala'an xaxṇa'le, na' le gaque lježle can' chaque cuinle.

20 Nach beṇe' güegon' gože' Jesúsen':

—Yogo'lol da' quinga gwzolagua' chonczan' cate' ne' nactia' bidao'. ¿Bixe dan' chyažjech gona'?

21 Jesúsen' gože'ne':

—Še chaclažo' gaco' cayanen' chazlaže' Diosen', jayete' yogo' da' de čhio', na' da' le'edo' čhen bnežjon beṇe' yaše'. Nach še gono' ca', cate' yežino' yaba gan' zoa Diosen', da' zaca'ch gata' čhio'. Na' še ba beyož beno' can' žia' le', nach sao' gaco' neda' txen.

22 Perw na' beṇe' güegon' cate' beyož bende' diža' can' gož Jesúsen' le', beza'yaše', le beṇe' gwṇi'achgua goque'.

23 Gwde na' Jesúsen' gože' beṇe' ca' zjanaque' le' txen:

—Da' li žia' le'e, leca zdebe naquen to beṇe' gwṇi'a gwzenague' che Dios ben' zoa yaba cont Diosen' ṇabi'e yičhjažda'ogüe'.

24 Da' yoble žia' le'e, bedao'ch te to be xen be nzi' camello to lo' nag yeše' clel ca to beṇe'

gwni'a gwzenague' che Dios cont Diosen' nabi'e yichjlažda'ogüe'.

²⁵ Na' bene' ca' zjanaque' Jesúsen' txen leca besyebande' cate' gosende' xtižen', nach gosene':

—¿Noxen' šjayzoa len Diosen' še ca'?

²⁶ Jesúsen' gwne'e legaque', nach gože'ne':

—Bibi de da' gac yeson beñačen' cont šjasyenite' len Diosen', perw bi zoa da' nacho da' bi gac gon Dios.

²⁷ Nach Pedroa' gože' Jesúsen':

—Neto' ba gwlejyichjto' yogo' da' de cheto' cont nacto' le' txen. ¿Bi da' güen gata' cheto' dan' ba gwlejyichjto' da' ca'?

²⁸ Jesúsen' gože' legaque':

—Da' li žia' le'e, Diosen' gwsele' neda' golja' beñač na' cate' yocobe' yežlion', neda' cui'a nabi'a güen juisyw can' chnabia' Dios ben' zoa yaba. Na' le'e šižinwle cue'le cuita'na' nabi'a'le šižinw cuen bene' ca' zjanaque' xi'in diaža che da' Israel.

²⁹ Na' note'teze bene' ba gwlejyichje' liže', biše', zane', xaxne'e, xo'ole', xi'ine' o yežlio che', dan' chzenague' chia', Diosen' gwnežjue' le' da' zaca'ch da' xench ca yogo' da' ca'. Na' lecze gata' yela' mban che' toli tocanē.

³⁰ Perw zan bene' zjanaque' bene' žialao na'a, gwžin ža cate' yesaque' bene' bzebe. Na' bene' zjanaque' bene' bzebe na'a, gwžin ža cate' yesaque' bene' žialao.

20

Jempl che bene' güen žin ca'

¹ Nach Jesúsen' gože' legaque': —Yela' gwnabia' che Diosen' ben' zoa yaban' zaca'leben ca da' nga

goc. To beṇe' nape' to yežlio gan' že' chgua yag uvas. Na' gwze'e ližen' to zil do cheni' gwyeje' gan' chac ya'a jatiljue' beṇe' güen žin cont yesone' žin yežlio chen' žana'.

² Na' gosexenlaže' beṇe' güen žin ca' to denario chixue' to toe' con ca chac mosen' tža žin. Nach gwsele' legaue' gan' jasene' žinna'.

³ Na' do cheda ga gozeje' gan' chac ya'an, na' ble'ede' nita'ch beṇe' bibi žin de yesone'.

⁴ Na' gože' legaue': "Lencze le'e le šja'ac gan' že' yag uvas chian' le šjen žin na' chixjwcza' le'e ca cheyala'." Nach ja'ac beṇe' ca'.

⁵ Na' da' yoble gwyeje' do guagwbiž na' do cheda šone. Bezle'ede' nita'ch beṇe' bibi žin chesone' nach gwsele' legaue' cont yesone' žin gan' že' yag uvas chen'.

⁶ Na' ca do cheda gayo' šeže'le gozeje' da' yoble ble'eczde' nita'ch beṇe' bibi žin chesone'. Na' gože' legaue': "¿Bixchen' bi gwyejle žin?"

⁷ Nach gose'ene': "Notno gwṇe neto' šjento' xšine'." Nach goze'e legaue': "Lencze le'e le šja'ac le šjen žin gan' že' yag uvas chian'. Na' chixjwcza' le'e ca cheyala'." Nach ja'ac beṇe' ca'.

⁸ Na' cate' bžin hor bosa' xan yag uvasen' beṇe' güen žin ca', nach gože' mos blaoc chen': "Beyax beṇe' güen žin ca' cont chixjo'ne', solao chixjo' beṇe' ca' besela'ac bzebe, na' yeyože len beṇe' ca' besela'ac da' nechw'."

⁹ Nach mos blaon' zgua'tec gwdixjue' beṇe' ca' gosezolagüe' gosone' žin cheda gayo' šeže'le tgüeje denario to toe'.

¹⁰ Na' cate' gwdixjue' beṇe' ca' gosezolagüe' gosone' žin šezildao', gosacde' chixjoch'e' legaue'

da' zcha'och dan' gosezolagüe' gosone' žin šezildao'.
Perw tozcze can' gwdixjue' yogo'lołte'.

¹¹ Na' cate' beyož gosezi' laxjw beņe' ca' gosezolao žinŋa' šezildao', gosadoe' diža' xan žinŋa'.

¹² Gose'ene': "Do ža bžaglaochguato' lo da' zeye' bento' žin chion'. Na' tozcze can' gwdixjo' neto' len beņe' ca' besela' bzebe, len to hor güejgan' gosone' žin."

¹³ Perw na' xan žinŋa' gože' toe': "Migw chia', bitwbi da' mal chona' len le'. ¿Gague gwxenlažo' to denario chixjua' to tole?"

¹⁴ Laxjon' ba gwxi'o, guac yeyejo'. Chaclaža' gwnežjua' beņe' ca' to denario güeje con can' beņa' le'e la'czla' besela'aque' bzebe.

¹⁵ ¿Bixchen' chxi'o neda' neche dan' naca' beņe' šagüe'? Naquen lo na' gona' con ca chaclaža' len da' de chia'."

¹⁶ Nach Jesúsen' gože' beņe' ca' bosozenag jemplen':

—Can' naquen, nita' beņe' zjanaque' beņe' bzebe na'a, perw lecze gwžin ža cate' legaque' yesaque' beņe' žialao. Na' nita' beņe' zjanaque' beņe' žialao na'a, perw gwžin ža yesaque' beņe' bzebe. Diosen' chaxe' yogo'loł beņe' cont yesejle'e che', perw bal guen' chosozenague' che', na' legacze' chbeje' cont chesaque' xi'ine'.

Da'yoble chyixjue'e Jesúsen' gate'

(Mr. 10:32-34; Lc. 18:31-34)

¹⁷ Jesúsen' len yezan beņe' zja'aque' Jerusalénna'. Na' šlac zjangüe'e nezen' gwlejiže' beņe' šižiŋw ca' gwleje' cont zjanaque' txen len le' na' gože' legaque':

18 —Na'a ba zejcho Jerusalénna' gan' yesone' neda' lo na' bxoꝝ gwnabia' ca' na' lo na' beṇe' ca' chosed chosolo'ede' dan' bzoj da' Moisés, na' yeseḥoglagüen' chia' yesote' neda', neda' naca' ben' gwseḷa' Dios golja' beṇaḥ.

19 Na' yesone'nda' lo na' beṇe' bi zjanaque' beṇe' Israel cont yesonle' chia', na' yesot yeseyine' neda', na' yesote'nda' yosode'e neda' le'e yag cruz, perw yeyon ža yebana' ladjo beṇe' guat ca'.

Xna' Jacobo na' Juanna' gwnabe' yesebe' xi'ine' ca' cuit Jesús'en' gan' nabi'ena'

(Mr. 10:35-45)

20 Na' ja'ac xi'in Zebedeo, Jacobo len Juan, na' len xna'gaque' lao Jesús'en'. Na' xna'gaquen' bzoa xibe' lao Jesús'en' gože'ne':

—Chnabda' le' to goclen.

21 Nach Jesús'en' gože'ne':

—¿Bi goclen chaclažo' gona'?

Nach xna'gaquen' gože'ne':

—Chaclaža' gono' cont xi'ina' quinga yesebi'e šla'a güeje cuito'na' cate' žin ža nabi'o.

22 Jesús'en' gože' Jacobo na' Juanna':

—Le'e cabi nezele bi dan' chṇable. ¿Gwḥejlaže'le tele yeḷa' zi' yeḷa' ya' ca dan' tia' neda' na' gac ḥele can' gac chia'?

Nach bosyoži'e xtižen' gose'ene':

—Gwḥejlaže'to'.

23 Nach Jesús'en' gože' legaque':

—Da' licze tele yeḷa' zi' yeḷa' ya' ca dan' tia' neda' na' gac ḥele can' gac ḥian', perw bi naquen lo na' nia' non' cue' cuitan' cate' žin ža nabi'a, san yesebe' beṇe' ba mbej Xa' Diosen' gaquen ḥe'.

24 Nach cate' yeši beṇe' ca' zjanaque' le' txen gosende' can' gosena beṇe' ca' chope, beseloque' legaue'.

25 Nach Jesúsen' goxe' yogüe' cont gosebigue' lagüen' na' gože' legaue':

— Nezeczele beṇe' gwnabia' che to to nación na' beṇe' blao ca' chesone' byen chosozenag beṇe' chegaue'.

26 Perw bi naquen ca' len le'e. San note'tezle chaclaže'le gacle beṇe' blao, cheyała' gwzexjwlaže'le gaclen beṇe' lježle.

27 Na' še note'tezle chaclaže'le gacle beṇe' žialao, cheyała' gon cuinle ca' xmos beṇe' lježle.

28 Ca'cze naquen len neda' naca' ben' gwsela' Diosen' golja' beṇačh. Gague za'a cont yesaclen beṇe' neda' san za'a cont gaclena' beṇe', na' chzanlaže' cuina' yesote' neda' neche xtola' beṇačhen'.

*Jesúsen' bene' cont chope beṇe' lchol besyele'ede'
(Mr. 10:46-52; Lc. 18:35-43)*

29 Nach cate' besyeya'aque' ciuda Jericó, beṇe' zan zjasenagüe' Jesúsen' len beṇe' ca' zjanaque' le' txen.

30 Na' chope beṇe' lchol zjachi' chanez gan' zjayda Jesúsen'. Na' cate' gosacbe'ede' Jesúsen' zej gan' zjachi'ena' nach chososya'adie' gose'e le':

— Xanto', len' naco' xi'in diaža che da' rey Davin'. Beyaše'laže'šca neto'.

31 Nach beṇe' ca' chesyede gan' zjachi'ena' gosedile' legaue' cont yesenite' šize. Perw na' gosene' zižjech gose'ene':

— Xanto', len' naco' xi'in diaža che da' rey Davin', beyaše'laže'šca neto'!

³² Jesúsén' gwleze' gan' nite'na', nach goxe' legaque' gosebigue' lagüen'. Nach gože'ne':

—¿Bin' chaclaže'le gonda' le'e?

³³ Nach gose'ene':

—Xanto', chaclaže'to' yele'eto'.

³⁴ Jesúsén' beyaše'laže'de' legaque' na' gwdane' yejlaogaquen', nach la' besyele'etede', na' gosa'ogüe' le'.

21

Gosonxene' Jesúsén' cate' beyo'e Jerusalén
(Mr. 11:1-11; Lc. 19:28-40; Jn. 12:12-19)

¹ Na' cate' ba zoa yesežine' Jerusalénna' besežine' gan' chi' yež Betfagé, gan' zoa ya'a dan' nzi' Ya'a Olivos. Na' Jesúsén' gwsele' mandadw chope beņe' ca' zjanaque' le' txen,

² gožgaque'ne':

—Le šja'ac yež dan' chi' gala'ze, na' cate' žinlen' na' yeželele to burr be no'ole da'ba' yag na' nche'te to xi'inđa'oba'. Le sežgacba' na' le che'gacba' nga.

³ Na' še bi ye' beņe' le'e na' ye'lne': “Xanto'na' chyažjde' legacba'.” Na' la' yedyesantecze'ba' len le'e.

⁴ Goc yogo' da' qui cont goc can' bzoj to ben' bzoj Xtiža' Diosen' cani', gwne':

⁵ Gož beņe' ca' nita' Jerusalénna':

“Le na'šč, ba za' rey chelen',

žie' cože' to burr dao', xi'in beyixe' be choa' yoa'.

Ze'e ca to beņe' bi naque' beņe' blao.

⁶ Na' ja'ac beņe' ca' yež dao' dan' gož Jesúsén' legaque' ca', na' gosone' can' ben Jesúsén' mandadw.

7 Na' besyeche'e burroa' len xi'inba' lao Jesúsén' na' gosexoá no xagaque' cože'ban' na' gwžia Jesúsén' be daon' cont gwyeje' Jerusalénna'.

8 Na' beñe' zan gosonxene' Jesúsén' goseyixjw no xagaque' lo nez cont blej burron' len na' yebale' gosechogue' xoze' yag na' goseyixjuen' lo neza'.

9 Na' beñe' zjažialao na' lecze beñe' za'ac cože' bososye'e gosene':

—iLeca beñe' zaca' benga nac xi'in diaža che da' rey David! iMbalaz ben' za' nga gwsela' Xancho Diosen' le' cont nabi'e! iLeca beñe' zaca' ben' zoa yaban'!

10 Na' cate' bžin Jesúsén' Jerusalénna' yogo' beñe' ca' že' ciudan' besyebande', na' gosene':

—¿No benga bla' nga?

11 Na' beñe' ca' nžag Jesúsén' bosyoži'e xtiža'gaque' gosene':

—Bengan' Jesús beñe' za' yež Nazaret gan' mbane distritw Galilea na' cho'e xtiža' Dios.

Jesúsén' bebeje' beñe' ca' cheson ya'a yodao' blaon'

(Mr. 11:15-19; Lc. 19:45-48; Jn. 2:13-22)

12 Na' Jesúsén' gwyo'e chyo'o yodao' blaon' na' bešaše' yogo' beñe' ca' chesote' na' beñe' chesa'o na'. Nach bchiže' xmes beñe' ca' chosoša' mechw, na' yag ga chesebe' beñe' ca' chesote' ngolbex.

13 Na' gože' legaque':

—Nyojcze Xtiža' Diosen' žan: “Yesene' ližan' naquen to latje gan' yesol güiž beñe' neda’”, perw le'e chonlen ca to latje ga že' beñe' gwban.

14 Na' be_{ne}' lcho_l ca' na' len be_{ne}' ca' nxi_{nj} ni'e gosebigue' lao Jesús'en' šlac zoe' chyo'o yodaon'. Nach beyone' lega_{que}'.

15 Perw na' b_xoz gwnabia' ca' na' be_{ne}' ca' chososed chosolo'e dan' bzoj da' Moisés'en' leca beseže'e cate' besele'ede' yela' guac ca' dan' ben Jesús'en'. Na' lecze beseže'e cate' gosende' can' bososya'a bi' bixjw ca' chyo'o yodao' blaon', gosenabe': "Le_{ca} be_{ne}' zaca' benga nac xi'in diaža che da' rey David."

16 Nach gose'e Jesús'en':

—¿Zendo' bin' gosena bidao' ca'?

Jesús'en' boži'en gože' lega_{que}':

—Zenda'. ¿Bi_{na}' gwlable can' nyoj Xtiža' Diosen'?, žan:

Ba beno' cont bi' bixjw ca' na' len bi' ne' chesaže' chesonxembe' le'.

17 Na' bechoje' gan' nita' be_{ne}' ca' na' beze'e ciudadan'. Na' že'na' jayga'a_{ne}' Betania.

*Ben Jesús'en' cont gwbiž yag yixgüigw
(Mr. 11:12-14, 20-26)*

18 Na' zil beteyo besyeya'aque' Betanian' jaseya'aque' Jerusalén_{na}' da' yoble. Na' šlac zjangüe'e nezen' gwdon Jesús'en'.

19 Na' ble'ede' to yag yixgüigw zoan cho'a nezen' na' ja_{ne}'e še žia yaguen' yixgüigw. Perw bibi bželde', con xlaguen' na'ze žia. Nach gožen':

—Bich bi yixgüigon' cuio'.

Na' la' gwbižte yaguen'.

20 Nach be_{ne}' ca' zjanaque' le' txen besyebande' cate' besele'ede' can' goquen', nach gose'ene':

—¿Nac goquen' la' gwbižte yaguen'?

21 Na' Jesúsen' gože' legaque':

—Da' li žia' le'e, še chejnilaže'le Diosen' na' bitw gacžejlaže'le, gwaque gonle can' ba benan' cont gwbiž yaguen'. Na' lecze ca' guac ye'le ya'a nga: “Gwcuase nga na' jasoa lo' nisdaon”, na' gac can' nalen'.

22 Na' še chejnilaže'le Diosen', bite'teze dan' nabelene' cate' yoł güižlene', gonçzen' le'e.

Yela' chnabia' che Jesúsen'

(Mr. 11:27-33; Lc. 20:1-8)

23 Nach Jesúsen' gozeje' yodao' blaon' da' yoble. Na' šlac chsed chlo'ede' bene' ca' že' na', bχoz gwnabia' ca' na' bene' gole blao ca' chesenabi'e nación chechon' gosebigue' cuit Jesúsen'. Nach gosenabde' le':

—¿Bi yela' gwnabia' napo' chono' da' qui? ¿No ben yela' gwnabian' cont chono' da' qui?

24 Nach Jesúsen' boži'e xtiža'gaquen', gwne':

—Lecze de to da' nabda' le'e. Še yoži'ile xtižan' nach ni'a le'e bi yela' gwnabia' chonlendan'.

25 Le našc neda': ¿non' gwseła' da' Juanna' bzoe' bene' nis? ¿Dios nan' gwsele'ne', še benachen'?

Nach legacze' gose' lježe':

—Še ye'chone' Dios gwseła' le', na' ye'e chio': “¿Bixchen' ca gwyejle'le che'?”

26 Na' bi gac ye'chone' benach gwseła' le', le yogo'te bene' že' nga chesejle'e Diosen' gwsele' da' Juanna' be'e xtiže'na', na' xož bi yesonde' chio'.

27 Nach gose'e Jesúsen':

—Bi nezeto'.

Nach gože' legaque':

—Lecze neda' bi yapa' le'e bi yela' gwnabian' chonlenda' da' ca'.

Jempl che chope xi'in bene'

²⁸ Na' Jesús'en' gože' legaque':

—Le gon xbab bi zeje jempl nga: Gwzoa to bene' gwnita' chope xi'ine'. Na' gože' tobe': “Xi'ina', chaclaža' šejo' güen žin ņa'aža gan' že' yag uvas chia' ca'.”

²⁹ Nach xi'in'en' gožbe' le': “Bitw ša'a.” Perw gwdele beyombe' xbab nach gwyejbe'.

³⁰ Nach gozeje' gan' zoa xi'in'en' yeto, na' ježe'be' can' gože' bi' biše'ben'. Na' la' gožte bin' le': “Guaccze, na' ša'a.” Perw bitw gwyejbe'.

³¹ Gwnašč neda', čno bi' ca' chope ben can' gw-nalaže' xabe'?

Nach gose'ene':

—Bi' nechoa'.

Nach Jesús'en' gože' legaque':

—Ca'cze naquen. Na' da' li žia' le'e, bene' güečhixjw ca' na' no'ole ca' chja'aclen note'teze bene' byo yobech yosozenague' che Diosen' cont nabi'e yičhjažda'ogaque' clal ca' le'e.

³² Ca' nac Juanna' ben' bzoe' bene' nis, bide' laolen' na' gwduxjue'ede' le'e naquen' cheyla' gonle cont yebe Diosen' le'e. Perw bitw gwyejle'le che'. Na' bene' güečhixjw ca' na' no'ole zle' ca' gosejle'e che'. Na' cate' gocbe'ele bene' ca' ba gosejle'e che', bitw betinjle'le xtoła'le ca' cont šejle'le che dan' bsede da' Juanna'.

Jempl che mos mal ca'

(Mr. 12:1-12: Lc. 20:9-19)

33 'Le gwzenag yeto jempl nga. Gwzoa to bene' na' goze' to cue' xen yag uvas lo yežlio che' na' gwlo'en le'ej. Na' na'teze bene' to ga yesesie' uvasen' cont choj xisen'. Na' lecze bene' to da' sibe ca to campanaryw ga yesecua' bene' yosogüia yesene'e yag ca'.

'Na' bcua'ane' yežlion' lo na' bene' yesonši'e yag uvasen' na' gwze'e gwyeje' zito'.

34 Cate' bžin ža yosyotobe' cosešen', gwsele' to chope xmose' gan' že' bene' ca' nac lo na'gaque' yag uvasen' cont šjasyexi'e to tlaw cosešen' dan' cheyala' si'e.

35 Perw na' bene' ca' nac lo na'gaque' yag uvasen' gosezene' mos che' ca'. Goseyine' toe', na' yetoe' bosožie'ne' yej, nach yetoe' gosote'ne'.

36 Nach gossela' xan yag uvasen' mos zanch clel ca' bene' ca' gwsele' da' nechw, perw lecze can' gosonde' bene' nechw ca', lecze ca' gosonde' legaue'.

37 'Nach gwdena' xan yežlion' gwsele' cuincze xi'inen', gocde' yesezi'e xtižen'.

38 Perw na' bene' ca' nac lo na'gaque' yag uvasen' cate' besele'ede' xi'ine'na', nach gose' lježe': "Bengan' yega'anlene' yežlio nga cate' gat xen'. Le šo'o gotchone' cont yega'anlenchon."

39 Nach gosezene'ne', besyebeje'ne' gan' že' yag ca' na' gosote'ne'.

40 Beyož be' Jesúsena' jempl nga, gozne':

—¿Nacxe chaquele gon xan yežlion' len bene' ca' bocua'anlene' yag uvas chen' cate' yežin cuine'?

41 Nach bosyoži'e xtižen' gosene':

—Šeje' šjetoe' be_{ne}' mal ca', na' yodie' yežlion' lo na' be_{ne}' yoble be_{ne}' yeson güen yosyonežjue'ne' to tlaw cosešen' cate' žin ža yosyotoben'.

⁴² Jesúsen' gože' lega_{que}':

—Ca'czen'. ¿Bi_{na}' gwlable ga nyoj Xtiža' Diosen', žan quinga?:

Yej dan' bi gosac_{laže}' be_{ne}' güen yo'o ca' yoso_{chine}',

len ba naquen yej squin.

Da' nga ben X_{ancho} Diosen',

na' naquen to da' yežejecho.

⁴³ Da'nan' žia' le'e, da' bi chzenagle _{che} Diosen', cuejyichje' le'e na' cueje' be_{ne}' yoble be_{ne}' yosozenag _{che}' cont nabi'e yichjlažda'oga_{que}'.

⁴⁴ Na' ca' nac yejen', note'teze be_{ne}' lažo' lo yeja' na' cue'žošje', na' note'teze be_{ne}' chiže' yeja' cate' lažon' na' gwšošjen le'.

⁴⁵ Na' b_{xoz} gwnabia' ca' na' be_{ne}' fariseo ca', cate' gosende' jempl ca' dan' be' Jesúsen', gosacbe'ede' be'e diža' _{che} lega_{que}' dan' bi chesejnilaže' le'.

⁴⁶ Nach gosac_{laže}' yesezene' le', perw besežebe' bi yesone be_{ne}' ca' nžague' lega_{que}', le yogüe' gosejle'e gwsela' Diosen' Jesúsen' cont cho'e xtiže'na'.

22

Jempl _{che} ben' bene' l_{ni} cate' bšagna' xi'ine'

¹ Na' da' yoble bsd blo'e Jesúsen' be_{ne}' ca' len jempl, gozne':

2 —Yela' gwnabia' che Diosen' zaca'leben ca da' nga goc. Gwzoa to bene' gwnabia' na' bene' gastw cate' bšagna' xi'ine'.

3 Na' cate' bžin hor solao lnin' gwsele' xnose' ca' cont jasexi'e bene' ca' ba bol güiže' šja'ac lnina', perw notno goclaže' šja'ac lni chen'.

4 Nach gože' yeto xonj xnose' ca': “Le šjež bene' ca' ba bol güižan' ye'ine' ba bsini'a dan' gagwchona'. Ba betua' be dao' be chesane' na' ba bsini'a dan' gagwcho lo lnin'. Na' ye'ine' yeside' gagwcho dan' ba bsini'an'.”

5 Perw bene' ca' ba gosata'yoede' cont šja'aque', bitw gosone' cuent dan' gose' mos ca' legaque'. Toe' gwyeje' jane'e yežlio che', na' yetoe' gwyeje' jene' negosyw.

6 Na' yebale' gosenize' mos ca' gwsela' bene' gwnabian' na' gosonde' legaque' zi' na' gosote' legaque'.

7 Na' leca bža'a bene' gwnabian'. Na' gwsele' soldadw che' ca' jasete' bene' ca' gosot xmosen' na' bosozeye' lažgaquen'.

8 Nach bene' gwnabian' gože' xmosen': “Ba bsini'a dan' gagwcho lo lnin', perw bene' ca' ba bol güiža' nacia' bitw zjazaque' yeside'.

9 Le šja'ac le šjata yogo' nez na' ye'le yogo' bene' yežagle yeside' lnin'.”

10 Na' mos ca' ja'aque' yogo' nez na' jasetobe' con yogo' bene' besežague', no bene' naque' bene' güen na' no bene' naque' bene' mal, cont beža' yo'o gan' chac lnin'.

11 'Perw cate' gwyo'o bene' gwnabian' jane'e bene' ca' že'na' na' ble'ede' to bene' bi nyaze' lache' da' bnežjue' yesaze' lo lnin'.

12 Nach gože' le': “Migw chia', ĩnac goquen'

gwyo'o nga bitw nyazo' lache' dan' be_{na}' čhazo'?"
Nach be_{na}' bitw beželde' bi ye'ene'.

13 Nach be_{ne}' gwnabian' bene' mandadw yosočej xmose' ca' ni'a na' be_{na}' cont yesyebeje'ne' na' yesebeque'ne' gan' nac čhol, ga cuežyaše' na' gan' gagwxejte laye' tantw žaglagüe'.

14 Can' naquen, Diosen' chaxe' yogo' be_{ne}' cont yesejle'e če', perw ba_l guen' chosozenague' če' na' legacze' chbeje' cont yesaque' xi'ine'.

Ca nac dan' cheyala' gaxjw

(Mr. 12:13-17; Lc. 20:20-26)

15 Nach be_{ne}' fariseo ca' besežague' na' bosoxi'e naclen' yesone' cont yesebeje' Jesúsen' diža' da' yosode'ede' cont yesagüe' xya če'.

16 Na' be_{ne}' fariseo ca' gosesele' ba_l be_{ne}' zjanaque' txen len legaque' na' yeba_l be_{ne}' chesone' txen len Herodesen' cont jaseže' Jesúsen':

—Maestrw, nezeto' zoatezo' cho'o diža' li. Na' nezeto' diža' li cho'o chsed chlo'edo' be_{ne}' can' čhazlaže' Diosen' goncho. Na' bi chono' cuent bi ža bene', le toz can' chono' len note'teze be_{ne}'.

17 Da'n'an' zedenabeto' le' cont nao' neto' can' chacdo' cheyala' gonto'. ¿Naquen binlo no čhixjw da' cheyala' čhixjwcho lao ben' nac la'zelagüe be_{ne}' gwnabia' ben' chi' Roma, še bi?

18 Jesúsen' gocbe'ede' yela' xi'a čhegaquen', nach gože' legaque':

—¡Nacle be_{ne}' gwxiye'! ¿Bixčhen' chaclaže'le yoslažo'le neda' len xtižan'?

19 Le gwlo'e neda' to mechw dan' chyixjwle če gobiernen'.

Nach goso'ene' to mechw dan' nzi' denario.

20 Nach Jesúsen' gože' legaque':

—¿No lao dan' da' le'e mechw nga? na' ¿no la da' nyoj le'en ni?

²¹ Nach gose'ene':

—Che César ben' nac la'zelagüe bene' gwnabia' ben' chi' ciuda Roman'.

Nach Jesús'en' gože' legaque':

—Le gwnežjo bene' gwnabian' da' nac che bene' gwnabia', na' le gwnežjo Dios da' nac che Dios.

²² Nach cate' gosende' xtiža' Jesús'en' besyebande'. Nach besyeya'aque' gan' zoe'na'.

Cate' yesyeban bene' guat ca'

(Mr. 12:18-27; Lc. 20:27-40)

²³ Na' lo ža na'teze besežin bal bene' saduceo gan' zoa Jesús'en'. Bene' ca' chesene' bene' guaten' bi yesyebane'. Nach gosenabde' le', gose'ene':

²⁴ —Maestrw, da' Moisés'en' gwne': “Še to bene' byo nšagne'e na' gate' sin nono xi'ine' zoa, bene' biše' ben' ba goten' cheyala' yošagna'lene' no'ol güezeba' cont yesenita' xi'in diaža che da' bišen'.

²⁵ Na' len neto' gosenita' bene' gosac gaž biše'. Na' bene' nechua' bšagne'e, na' gote' nono xi'ine' gwnita'. Na' bene' gwchopen' bošagna'lene' no'ol güezeba'.

²⁶ Na' lecze gote' nono xi'ine' gwnita'. Lecze ca' goc len bene' gwyona', bžinten bene' gaža' yogo'lolē' gosac che' ca'.

²⁷ Na' gwde gosat yogo'lol bene' ca', nach got len no'ola'.

²⁸ Na' cate' yesyebane' ladjo bene' guat ca', ¿nox bene' ca' soalene' no'ola' ca' xo'ole'?, le yoguen' bosyošagna'lene' le'.

²⁹ Na' gož Jesús'en' legaque':

—Clelen' chon_{le} xbab dan' žale ca', le bi nezele can' ža Xtiža' Dios dan' nyojen, n_{eca} nombia'le yela' guac chen'.

³⁰ Caten' yesyeban be_{ne}' guat ca', bich yosošagne'e, n_{eca} yosonežjo xi'ine' no'ol gwšagne'e, le yesaque' ca angl bene' zjazoa yaba.

³¹ Na' ca nac dan' yesyeban be_{ne}' guat ca', ¿bina' gwlable da' nga can' nyoj Xtiža' Diosen'? žan:

³² “Neda' naca' Dios ben' chonxen Abraham, ben' chonxen Isaac na' ben' chonxen Jacob”. Be_{ne}' guat ca' bi chesonxene' Diosen', san be_{ne}' zjamban.

³³ Na' be_{ne}' ca' zjanžaguen' besyebande' cate' gosende' diža' dan' bsed blo'ede' legaque'.

Dan' nac da' blaoch dan' ža Diosen' cheyala' goncho

(Mr. 12:28-34)

³⁴ Na' cate' gosene be_{ne}' fariseo ca' can' bzoaži Jesúsen' be_{ne}' saduceo ca', nach besedobe' jasa'aque' lagüen'.

³⁵ Na' to ben' nsedchgüe' ley dan' bzoj da' Moisés lecze goclaže' cueje' Jesúsen' diža' da' gwchine' contr le', gože'ne':

³⁶ —Maestrw, lo ley che Diosen', ¿non' nacch da' žialao da' zjanyojen da' ža Diosen' cheyala' goncho?

³⁷ Nach gož Jesúsen' le':

—“Cheyala' gaquecho Xancho Diosen' con ca zelao chejni'icho do yichj do laže'cho.”

³⁸ Len_{na}' naquen da' žialaoch na' da' blaoch lagüe da' ca' ža Diosen' cheyala' goncho.

³⁹ Na' da' gwchopen' zejgalan' ca', žan: “Cheyala' gaque lježcho ca chaque cuincho.”

40 Chope da' ca' ža Diosen' cheya_la' goncho chze-
jni'in chio' can' zeje doxen dan' bzoj da' Moisésen'
na' dan' bosozoj be_ne' ca' goso'e xtiža' Diosen'
cani'.

Criston' naque' xi'in diaža che da' rey David

(Mr. 12:35-37; Lc. 20:41-44)

41 Na' šlac ne' zjanžag be_ne' fariseo ca',

42 Jesúsen' gože' lega_que':

—¿Bixe xbab chon_le che Criston' ben' gwlej
Diosen' cont yedenabi'e? ¿No xi'in diaža che
naque'?

Na' gose'ene':

—Xi'in diaža che da' rey Davin'.

43 Nach Jesúsen' gože' lega_que':

—Še ca' naquen, ¿bix_{ch}en' cate' da' David bzoje'
can' blo'e Spiritw che Diosen' le', gwne' Criston'
naque' Xane'? Quinga bzoje':

44 Xancho Dios gože' Xanan':

“Gwche'edo' cuita' nga nabia'cho txen,
na' gona' cont yogo' no chesegue'e le' yosozexjw
yichje' yosozenague' chio'.”

45 ¿Nacxe gac nacho Criston' xi'in diaža che da' rey
David? le' cuin Davin' gože' le': “Xana”.

46 Na' notoch no goc yosyoži'e xtižen'. Na' gw-
zolao žana' notoch no besyeyaxje bi yese_nabde'
Jesúsen'.

23

*Xto_la' bene' fariseo ca' na' bene' ca' chososed
chosolo'e leyna'*

(Mr. 12:38-40; Lc. 11:37-54; 20:45-47)

¹ Nach Jesúsen' gwzolao be'e diža' len be_{ne}' ca' zjanaque' le' txen na' len be_{ne}' ca' zjanžague' gan' zoe'na', gwne':

² —Be_{ne}' ca' chososed chosolo'e ley na' be_{ne}' fariseo ca' ba zjanłane' xłatje da' Moisésen' cont chosozejni'ide' be_{ne}' ley che Diosen'.

³ Na' da'nan' cheyała' gwzenagle chegaque' cate' chosozende' le'e can' ža leyna', na' cheyała' gonle can' chosozejni'ide' le'e. Perw bitw gonle can' cheson legaque', le legaque' bitw chesone' dan' chesene' cheyała' gac.

⁴ Legaque' chosozanche' dan' ža leyna'. Chesonen' ca to yoa' da' nono soe gua' na' chesaclaže' gua' be_{ne}' yoble len na' bitw chesaclaže' yeso'en legaque'.

⁵ Ca nac be_{ne}' ca', yogo' dan' chesonen', chesonen' ga yesele'e be_{ne}' can' chesonen' contze yesonxene' legaque'. Chio' be_{ne}' Israel nchejcho caj dao' de yid do na'cho na' do loxgacho na' lo' caj dao'na' chgo'ošagüe'cho to pedas yiš gan' nyoj late' güeje Xtiža' Diosen'. Perw ca nac be_{ne}' ca' chososed chosolo'e ley che Diosen' na' be_{ne}' fariseo ca', zjanonche' caj dao' chegaque' da' xench ca yezica'chle be_{ne}'. Na' lecze chesone' lox xagaque' da' tonech clal ca che be_{ne}' yezica'chle.

⁶ Chesyebede' chesebi'e gan' chesebe' be_{ne}' blao cate' chja'aque' gan' chac no lni na' cate' chja'aque' yodao' chegaque'.

⁷ Chesyebede' chesap be_{ne}' legaque' bala'an cate' chesyežague' lagüe ya'a. Na' chesyebede' yese' be_{ne}' legaque' maestrw.

⁸ 'Perw žia' le'e, bi gonle byen ye' be_{ne}' le'e maestrw, le toz neda' Cristo naca' Maestrw chele.

Na' yogo' le'e chejnilaže'le neda' nac biše' lježle tole yetole.

⁹ Na' lecze bitw gonxenle note'teze beņe' blao ye'lnē': "Xato". Toze Diosen' ben' zoa yaba naque' Xacho.

¹⁰ Na' bitw güe'le latje ye' beņe' le'e: "Xana", le toz neda' Cristo naca' Xanle.

¹¹ Še no le'e nacle beņe' blaoch, cheyała' gwzexjw yichjle gaclen lježle.

¹² Le note'teze beņe' chonxen cuine', Diosen' gone' cont si'e zto' lagüen'. Na' note'teze beņe' chzexjwlaže' lagüen', Diosen' gone' cont gacxene'.

¹³ ¡Nyaše'chguaze gac che le'e chsed chlo'ele ley dan' bzoj da' Moisésen' na' le'e beņe' fariseo! Chziye'le beņe' cont bi yosozenague' che Diosen', le bi chaclaže'le nabia' Diosen' yichjlažda'ogaque', na' lecze le'e bi chzenagle che Diosen' cont nabi'e yichjlažda'olen'.

¹⁴ ¡Nyaše'chguaze gac che le'e chsed chlo'ele ley dan' bzoj da' Moisésen' na' le'e beņe' fariseo! Chziye'le no no'ole güezebe cont checa'ale yo'o čhegaque'. Na' cate' chol güižle Diosen', sša choe'le diža' cont yesaque beņe' leca chonxenlne'. Gacchle castigw clēl ca yezica'chle beņe' güen da' xinj.

¹⁵ ¡Nyaše'chguaze gac che le'e chsed chlo'ele ley dan' bzoj da' Moisésen' na' le'e beņe' fariseo! ¡Nacle beņe' gwxiye'! Chejtez chejle chjatiljwle beņe' zito' beņe' yeson txen len dan' chsed chlo'elen'. Na' cate' chželelene' chzejni'ilne' cont yesaque' beņe' xi'ach clēl ca le'e.

¹⁶ ¡Nyaše'chguaze gac che le'e! ¡Nacle ca beņe' lchol beņe' chesacde' guac yesegüe'e nez beņe' yoble! Žale note'teze beņe' še ne': "Yodao' blaon'

zoan testigw chia' gona' can' ba gwnia", bitwbi zejen dan' chnen'. Perw še že': "Oro dan' de lo' yodaon' zoan testigw chia' gona' can' ba gwnia", nach cheyala' gone' can' gwnen'.

17 ¡Le'e nacle ca to bene' lchoł na' bitw chejni'ile! Oron' bitec bi zacan'. Yodao'na' gan' yo'o oron' lenna' zaca'chen, le dan' yo'o oron' lo'enna', da'nan' oron' naquen che Dios.

18 Na' lecze žale še to bene' že': "Mes gan' chosozeye' beyixe' ca' chesonxene' Diosen', zoan testigw chia' gona' can' ba gwnia", bitwbi zejen xtizen'. Perw na' še že': "Dan' xoa lo mes lo' yodaon' zoan testigw chia' gona' can' ba gwnia", nachen' cheyala' gone' can' gwnen'.

19 ¡Le'e nacle ca bene' lchoł na' bitw chejni'ile! Dan' chosozeye' chesonxene' Diosen' bitec bi zacan'. Mes gan' chesexoe' dan' chosonežjue' Diosen', lenna' zaca'chen, le naquen che Dios.

20 Še bene' že': "Mes dan' zoa lo' yodaon' zoan testigw chia' gona' can' ba gwnia", lencze dan' xoa lo mesen' zoan testigw che'.

21 Na' še bene' že': "Yodaon' zoan testigw chia' gona' can' ba gwnia", lecze zejen Diosen' naque' testigw che', le yodaon' naquen che Dios na' nan' zoe'.

22 Na' še bene' že': "Yaban' zoan testigw chia' gona' can' ba gwnian", zejen Diosen' naque' testigw che', le nan' zoa Diosen' chnabi'e.

23 ¡Nyaše' chguaze gac che le'e chsed chlo'ele ley dan' bzoj da' Moisés na' le'e bene' fariseo! ¡Nacle bene' gwxiye'! La'czla' chnežjwle Diosen' to part lao ši part che yixegüej, che oreg, che comin, na' che bichle cuan chele, bibi zejen dan' bitw

chzenagle che da' ca' zjanac da' žialaoch dan' ža leyna'. Leyna' žan cheyała' gonle da' nac güen lao Diosen', na' cheyała' yeyaše'laže' ljež beňachle na' cheyała' gonle can' ba gwlo'o cho'ale gonle. Da' ca' zjanaquen da' zejechen gonle, perw lecze bitw cheyała' cuejyichjle bi gwnežjwle da' ca' chnežjwle Diosen'.

²⁴ ¡Nacle ca to beňe' lchoł beňe' chesacde' guac yesegüe'e nez beňe' yoble! Zaca'lebele ca to beňe' chebej yogo' beb dao' riz da' nchixe da' che'eje' perw bitw chacbe'ede' še yo'o to da' xen juisyw da' zaca' yebeje'. Le chi' yichjle che da' ca' bitec bi zaca' da' ža ley chechon' cheyała' goncho, na' bi chonle da' ca' zjazaca'chguan.

²⁵ '¡Nyaše'chguaze gac che le'e chsed chlo'ele ley dan' bzoj da' Moisés na' le'e beňe' fariseo! ¡Nacle beňe' gwxiye! Zaca'leble ca ye'en dan' chchin beňe' na' chyibe' cožen' perw bi chyibe' lo'en. Chonle cont chesaque beňe' nacle beňe' güen, perw leca chzelaže'le bi da' de che beňe' na' chbechgüele chca'alén.

²⁶ ¡Le'e beňe' fariseo, nchoł yichjlažda'olen! Le yetinje xtola'le cont da' licze gacle beňe' güen can' chaclaže'le yeson beňe' xbab nacle. Nach gacle ca to ye'en dan' nyibe' cožen' na' lo'en.

²⁷ '¡Nyaše'chguaze gac che le'e chsed chlo'ele ley dan' bzoj da' Moisés na' le'e beňe' fariseo! ¡Nacle beňe' gwxiye! Zaca'leble ca to ba dan' zjanone' xdanchgua lagüen perw lo'en že' žit che beňe' guat na' chi'chgua da' zban.

²⁸ Chonle cont chesaque beňe' nacle beňe' güen, perw len yichjlažda'olen' nacle beňe' gwxiye' na' beňe' malchgua.

29 'iNyaše'chguaze gac che le'e chsed chlo'ele ley da' bzoj da' Moisés na' le'e beñe' fariseo! ¡Nacle beñe' gwxiye'! Chonšagüe'le cho'a ba che da' beñe' gosote xtiža' Diosen' caní', na' chonšagüe'le cho'a ba che yezica'chle beñe' goson da' güen.

30 Na' žale: "Šaca' chio' ba zoacho ca tiemp che da' xoxxta'ocho ca', bitw bencho txen len legaque' cate' gosote' beñe' ca' gosote xtiža' Diosen' caní'."

31 Perw na' yogo'lołte dan' chonle chlo'en tozcze can' nacle len da' xoxxta'ole ca' beñe' gosot da' beñe' ca' gosote xtiža' Diosen' caní'.

32 Le gwza'laošaze le gon bica'ch da' zgot dan' bitw goła' yeson da' xoxxta'ole ca'.

33 'Le'e nacchguale beñe' zgot na' beñe' gwxiye'. Bitw gac yelale lao castigw dan' gon Diosen' le'e, le sele' le'e lo yi' gabilen'.

34 Na' da' gona', neda' sela' no beñe' yeso'e xtiža'na' len le'e na' no beñe' sina' na' nochle beñe' yososedde' le'e xtižan'. Na' gotle bale' gwda'gaclene' to le'e yag cruz, na' yebale' chinle do lo' yodao' chelen', na' yebale' gwlaglene' gate'teze yež šja'aque'.

35 Na' dan' gonle ca' gaple doła' che yela' got che yogo' beñe' ca' goson da' güen, ben' gosot da' xoxxta'ole ca' gwzolaozen len da' Abel ben' naque' beñe' güen lao Diosen' na' beyožen len da' Zacarías xi'in da' Berequías. Zacaríasen' gosote'ne' do gan' zoa yodao' blaon' na' do gan' ze mes gan' chosoz-eye' beyixe' chesonxene' Diosen'.

36 Na' da' li žia' le'e, le'e mbanle na'a si'le castigw che yela' got che yogo' beñe' ca' gosot da' xoxxta'ole ca'.

Begüine' Jesúsén' che xtolá' bene' Jerusalén
(Lc. 13:34-35)

³⁷ 'Le'e bene' Jerusalén, chotle bene' ca' chselá' Diosen' cont chesoe'lene' le'e xtižen' chchellene' yej. Zan ni'a ba goclaža' yotoba' le'e ca to jed xcaca' ben' nche' xi'in na' chyežba' legacba', perw bitw goclaže'le.

³⁸ Na' na'a ba gwlejjychj Diosen' le'e.

³⁹ Na' žia' le'e, bich le'ele neda' na'a, perw cate'ch žin ža le'ele neda' yeto nach nale: “Mbalaz ben' za' nga nselá' Xancho Diosen' le' nabi'e”.

24

Gwžin ža yosyochinje' yodao' blaon'
(Mr. 13:1-2; Lc. 21:5-6)

¹ Na' ba cheza' Jesúsén' yodao' blaon' šeje' ga yoble cate' bene' ca' zjanaque' le' txen gosebigue' gan' zoe'na' na' gosezolagüe' goso'e diža' catec xdan nac yodaon' na' lecze ca' yo'o ca' zjanyechjen.

² Nach Jesúsén' boži'e xtiža'gaque' gwne':

—Ca nac yogo' da' quinga chle'ele, da' li žia' le'e, ne to yej da' zjancua' nga ca yega'an zjancua' cože' lježen. Yogon' yosyochinje'.

Dan' gac cate' ba za' bagwze yeyož yežlio nga
(Mr. 13:3-23; Lc. 21:7-24; 17:22-24)

³ Na' ja'aque' Ya'a Olivos. Na' cate' Jesúsén' ba chi'e lo ya'an, bene' ca' zjanaque' le' txen gosebigue' lagüen' gose'ene' šižize:

—Che'neto' nao' neto' batcan' gac da' ca'. Na' žnac gac nezeto' cate' ba zoa bagwze yido' na' ba zoa yeyož yežlion'?

⁴ Nach Jesúsén' boži'e xtiža'gaquen' gwne':

—Le gwsaca' cont notno siye' le'e.

⁵ Le zan be_{ne}' yesaš yežlio nga be_{ne}' yesaclaže' yosolane' xlatja' nga. Na' yesene': "Nedan' Cristo ben' gwlej Diosen' cont nabi'e." Na' yeseziye'e be_{ne}' zan.

⁶ Na' yenele chac gwdile nile nale, na' yenele guac gwdile, perw bi žeble, le can' cheyala' gac. Perw gague lenna' nacho ba bžin ža yeyož yežlion'.

⁷ Le yesedil to yež len yeto yež yoble na' to naci_{ón} len yeto naci_{ón} yoble. Na' cue' yižgüe', na' gata' gwbin na' zan cuen ga xo'chgua lo yežlion'.

⁸ Perw na' yogo' da' qui gac cate' za' solao gata' yela' zi'.

⁹ 'Nach be_{ne}' ca' že' yogo' naci_{ón} yesegue'ede' le'e dan' chejnilaže'le neda' na' yesone' le'e lo na' be_{ne}' ca' chesegue'e le'e na' yososaca'zi'e le'e nach yesote' le'e.

¹⁰ Cana' be_{ne}' zan be_{ne}' ba chesejnilaže' neda' yesebejyichje' bich yesejnilaže' neda'. Na' legacteze' yesechje' yeson lježgaque' lo na' be_{ne}' da' chesegue'ede' legaque'.

¹¹ Na' be_{ne}' zan yesonlaže' yesene' xtiža' Diosen' cheseyixjue'ede' na' yeseziye'e be_{ne}' zan.

¹² Na' lagüe dan' šanch be_{ne}' ca' yeson da' malen', be_{ne}' zan juisyw be_{ne}' ba chesejnilaže' neda' bich yesacde' lježe'.

¹³ Perw na' note'tezle gwyo gwchejlaže'le cont bi cuejyichje'le dan' chejnilaže'le neda' žinten gatle, nach šjayzoale len Diosen'.

¹⁴ Na' šja'ac be_{ne}' doxen lo yežlion' yeseyixjue'ede' diža' güen cont yeseneze benachen' cheyala' yosozenague' che Diosen' nach nabi'e

yichjlažda'ogaque'. Na' cate' bene' že' yogo' nación ba zjanезде' da'na', cana'ch yeyož yežlion'.

15-16 'Da' Daniel ben' gwdixjue'ede' xtiža' Dios cani' bzoje' che da' zbranchgua da' gwxinjen latje gan' chonxencho Diosen'. Na' cate' le'e le'ele ba zoa dan' gan' zoa yodao' blao, cana' bene' yesenita' distritw Judea cheyla' yosoxonje' šja'aque' do ya'adao'. (Bene' gwlaben' cheyla' šejni'iden'.)

17 Na' bene' chda do yichjo'o che ližen', bi yeyetje' yotobe' xšinlaze' že' ližen', con yoxonje'.

18 Na' bene' chda yixe' bi yeyej liže' šjayxi'e xalane'.

19 ;Nyaše'chguaze zjanac no'ol ca' zjanao' xi'in' na' no'ol ca' ne' chosoguaže' bidao' lo ža ca'!

20 Na' le nab lao Dios bi yažjen gwxonjle cate' chac zag o lo ža che Dios.

21 Le yesaquen ža da' leca yesale' bene'. Cate' gwxete yežlion' na' ža na'aža nono na' gale' ca', neca žinlažen' yesale'de' ca' da' yoble.

22 Na' šaca' Xancho Diosen' bi yozaše' žan' yesac ca', notno yela, perw yozašen' neche chacde' bene' ca' chesejnilaže' le', bene' ba gwleje' zjanaque' xi'ine'.

23 'Cana' še no ye' le'e: "Le na'šč, nga zoa Criston' ben' gwlej Diosen' cont nabi'e", o "Le na'šč, na' zoe", ne ca'cze bi šejle'le.

24 Yesaš bene' gwxiye' bene' yesaclaže' yosolane' xlatja' nga, na' yeson cuine' ca' bene' chesoe' xtiža' Dios. Na' yesone' yela' guac da' yesele'e bene' na' bichle da' zaca' yesyebande' cont yeseziye'e legaque'. Na' len bene' ca' ba gwlej Diosen' zjanaque' xi'ine' yesaclaže' bene' gwxiye' ca' yeseziye'e šaca' gac yeseziye'e legaque'.

25 Ba nezele can' gac, le ba gwɔdixjue'eda' le'e yogo' can' gac.

26 Na' še yese'e le'e: "Zoa Criston' latje dašen'", bitw gwzenagle čhegaque', bitw šejle. Na' še yese'e le'e: "Zoa Criston' lo' yo'ona'", bitw šejle'le čhegaque'.

27 Can' chac cate' chep yes chsenin' doxen le'e yaban' zejzenez, lecze can' gac cate' žin ža yida' da' yoble, Diosen' gwsele' neda' golja' beṇač. Yida' zejzenez na' yogo' lo' beṇe' yesele'ede' neda'.

28 Nga chonen che ben' že': "Gan' de be guat nan' chesežag šod ca'."

*Can' gac caten' yid Jesucriston' da' yoble
(Mr. 13:24-37; Lc. 21:25-33; 17:26-30, 34-36)*

29 'Na' cate' la' yeyožte saca'zi' beṇačen', gwbižen' yeyaquen chol, na' bion' bich gwseṇin'. Nach beljw ca' yeselažon' le'e yaban', na' yogo' da' chle'echo le'e yaban' yesaquen ca' chac yežlion' cate' chxo'.

30 Na' cana'ch beṇe' že' yežlion' yesele'ede' neda' naca' ben' gwseła' Diosen' golja' beṇač za'a ladjo bejon' len yela' guac xen na' yela' beṇe' zaca' juisyw chia'. Na' beṇe' že' yogo' nación che yežlion' yesebežyaše', beṇe' bi gosejnilaže' neda'.

31 Na' caten' yida', to trompeta' cuežen zižje, na' seła' angl chia' ca' doxen yežlion' yosyotobe' beṇe' ca' ba gwleja' cont zjanaque' neda' txen gate'teze nite' doxen lo' yežlio ga zelao nac zito'.

32 'Le gwzenag che jempl nga che yag yixgüigw: Cate' ba chzolao chebešjw yaguen' na' chelan' laga' che'en dao', chache'ele bačh zoa yela' tiemp yejon'.

33 Na' lecze cate' le'ele ba chac da' mal ca' ba gwnian', cana'ch nezele ba za' juisyw, ba zoa gala'.

34 Da' li žia' le'e, bina' yenit diaža che le'e nita'le na'a cate' ba goc yogo'lo_l da' ca'.

35 Le'e yaba na' yežlion' yesede chen, perw ca nac xtižan', gague da' te cbi gac can' žanna'.

36 'Perw nono neze bi ža bi horen' gac ca', ne angl ca' nita' yaba, neca neda' naca' Xi'in Diosen' bi neza'. Toz Xa' Dios neze.

37 'Diosen' gwsele' neda' golja' benach, na' can' goc tiemp che da' Noé, lecze can' gac caten' neda' yida' da' yoble.

38 Bene' ca' gosenita' tiemp che da' Noén' gosenite' chese'ej chesagüe' na' chosošagne'e na' chosošague' na' no xi'ingaque'. Ne' chesonte' ca' caten' bžin ža gwyo'o Noén' lo' barcon'.

39 Bitw gosache'ede' bin' gac. Cate'ch goc yejw sio' juisyw na' bia' nisen' yogo'lo_{le}' cana'ch gosache'ede'. Lecz can' gac, con cate'ch yida' da' yoble cana'chen' yesacbe'e bene' bin' gac.

40 Quingan' gac caten' yida' da' yoble: Chope bene' nite' do yixe', toe' yezi' yeca'a, na' yetoe' yocua'ana'.

41 Na' chope no'ole nite' chesote', toe' yezi' yeca'a na' yetoe' yocua'ana'.

42 'Da'nan' le soa le cueze, le bi nezele bi ža bi horen' yida' da' yoble, neda' naca' Xanle.

43 Le gon xbab che da' nga, šaca' neze xan yo'on' do bi hor lo yelen' žin bene' gwban_{na}' ližen', na'ze' cont bitw güe'e latje šo' ben' ližen' cuane' xšinlazen'.

44 Da'nan' le soa le cueze batcan' yida' da' yoble, le cate' bi chonle xbab yida', cana' yida', neda' naca' ben' gwse_{la}' Diosen' golja' benach.

*Mos ben' chon güen, na' mos ben' bi chon güen
(Lc. 12:41-48)*

⁴⁵ 'Note'tezle še zoale lez bate'teze, zaca'leble ca to mos beñe' naque' beñe' sina' na' beñe' chon da' cheyała' gone'. Na' še to beñe' mos chonchgüe' güen, nach xanen' cue'e lo ne'e ližen' cate' se'e cont mosen' gwnežjue' da' yesagw yogo' mos ca' cate' ba gole' yesagüe' tža tža.

⁴⁶ Še to beñe' mosen' chonteze' can' gož xanen' le', mbalaz soe' cate' yežin xanen'.

⁴⁷ Da' li žia le'e, xanen' cue' lo na' mosen' yogo'lol da' de che'.

⁴⁸ Perw še mosen' naque' beñe' zgot na' gone' xbab ne': "Ba gwže xanan'".

⁴⁹ Nach solagüe' tile' mos ca' yezica'chle na' ye'ej gagwxate' len no beñe' borrašw,

⁵⁰ nach xane'na' yežine' to ža senyale' le' to hor bi nache'ede'.

⁵¹ Na' dan' bi chon mosen' ca cheyała' gone', xane'na' chinchgüe' le' ca gatte'. Gac che' can' chac che note'teze beñe' gwxiye', chjaya'aque' gabilen' gan' chesebežyaše' na' chesagwxejte laye' dan' leca chesežaglagüe'.

25

Jempl che ši no'ole güego' ja'aque' to yela' güešagna'

¹ Nach Jesúsen' goze'e beñe' ca' zjanaque' le' txen:

—Cheyała' soale lez batcan' yedenabi'a, can' gwnita' no'ole chesejni'i no'ol ca' za' gua'a diža' chen'. Goc to yela' güešagna', na' nita' ši no'ol güego' zjanaque' migw che beñe' ca' chosošagnan'.

Na' zjānxobe' lintern c̄hegaque' ja'aque' jaseleze' yesyechoj beṇe' ca' liž no'olen' par šja'aque' liž beṇe' byon' txen.

² Na' gayo' no'ol ca' gosaque' beṇe' chejni'i na' yegayoe' bibi xbab gosone'.

³ Cate' no'ol ca' bibi xbab goson gosa'ac liže', zjānxobe' lintern c̄hegaquen', perw bitw gosoḅe' botey gan' yože set dan' yosoḅhine' cate' yebiž dan' yože lo' lintern c̄hegaquen'.

⁴ Na' no'ol ca' chesejni'i, zjānxobe' lintern c̄hegaque' lente botey seten' dan' yosoḅhine' cate' yebiž dan' yože lo' lintern c̄hegaquen'.

⁵ Na' beṇe' güešagna' ca' gosežede' na' no'ole ca' gosebeze' legaque' gosetase' šlac chesebeze'ne'.

⁶ Na' do chel, to beṇe' gwṇe' zižje, gože' legaque': "Ba chesyechoj beṇe' güešagnan'. Le šo'o šjašagchone'."

⁷ Na' cate' gože' legaque' ca', yogo' no'ol ca' gosezeche' na' goseḅhogue' mešw dan' gwyey c̄he linternā' na' bosyogualen' da' yoble.

⁸ Na' no'ol ca' bibi xbab cheson gose'e no'ol ca' yegayo': "¿Bi gonle late' dan' yože botey c̄helen' neto'? le ba chebiž c̄heton'."

⁹ Nach no'ol ca' gose'e legaque': "Bitw gac gon̄to' late' c̄hele, le dan' de c̄heton' bitw gaquen par yogo'cho. San le šja'ac le šjaxi' c̄helen' ga choten'."

¹⁰ Nach no'ol ca' bi goson xbab ja'aque' ja-sexi'e seta'. Na' šlac zja'aque' besyežin beṇe' ca' chosošagna' liž beṇe' byon'. Na' no'ol ca' gosaque' beṇe' chejni'i, goso'e txen len beṇe' ca' chosošagnan' lo' yo'o gan' chesone' l̄nin'. Nach mos ca' bososeyjue' puerten'.

11 Na' cate' besyežin no'ol ca' bi goson xbab, gose_{ne}' cho'a puerten', gose'e ben' zoa lo' yo'on: "Be_{ne}' gwsaljwšca puerta' cont šo'to'."

12 Perw na' gože' lega_{que}': "Da' li žia' le'e, bitw saljua' šo'le le bitw nombi'a le'e."

13 Nach gož Jesúsen' be_{ne}' ca' zjana_{que}' le' txen:

—Ca'czen' cheya_{la}' soale lez batcan' yedenabi'a, le bitw nezele bi ža bi hor yida' yežlio nga da' yoble, neda' naca' ben' gwsela' Diosen' golja' be_{nach}.

Jempl che ben' bocua'anlene' xmose' ca' mechon'

14 'Na' dan' yida' yežlio nga da' yoble yedenabi'a zaca'leben ca da' nga goc. To be_{ne}' gwyeje' naci_{ón} zito'. Na' za' se'e goxe' mos che' ca' na' gwlo'e lo' na'ga_{que}' xmechue' cont gosone' delgens.

15 Toe' bocua'anlene' gayo' mil. Na' yetoe' bocua'anlene' chop mil. Na' yetoe' bocua'anlene' to mil. Bnež_{juen}' lega_{que}' con ca ble'ede' da' chac yeson to toe'. Beyož bene' ca' na' gwze'e.

16 Na' ben' bocua'anlene' gayo' mil la' gwzolaote chone' delgens len mechon' na' bene' gan le_{cze} gayo' mil.

17 Le_{cze} ca' ben ben' bocua'anlene' cho_{pe} mil, na' bene' gan ye_{chope} mil.

18 Na' ben' bnež_{jue}' to mil gwyeje' jacuaše' xmechw xan_{en}' to lo' yechw da' gwche'ene' lo' yo.

19 'Goc šsa gwza' xan mos ca' cate' bežine', nach bene' mandadw ja'ac xmose' ca' lagüen' cont bosyodie' cuent.

20 Mosen' ben' bocua'anlene' gayo' mil bžine' lagüen' na' gože'ne': "Xana', ni de da' gayo' mil dan' be_{no}' neda'. Na' ba bena' gan yegayo' mil."

21 Na' xane'na' gože'ne': "Ba beno' da' güen. Naco' mos güen na' ba beno' ca cheyała' gono'. Na' dan' beno' can' cheyała' gonon' len da' daon' bocua'anlena' len', da'nan' gona' lo nao' da' xench. Gwyo'o cont so' mbalaz len neda'."

22 Nach cate' bžin ben' bocua'anlene' chope mil, bena' gože'ne': "Xana', ni de da' chope mil dan' bocua'anleno' neda', na' ba bena' gan yechope mil."

23 Nach gož xanen' le': "Ba beno' da' güen. Naco' mos güen na' ba beno' ca cheyała' gono'. Na' dan' beno' can' cheyała' gonon' len da' daon' bocua'anlena' le', da'nan' gona' lo nao' da' xench. Gwyo'o cont so' mbalaz len neda'."

24 Nach cate' bezžin ben' bocua'anlene' to mil, nach gože' xane'na': "Nga de xmecho' dan' bocua'anleno' neda'. Nezda' naco' to bene' znia. Chelapo' da' gosaz bene' yoble, na' chotobo' coseš ga goson bene' yoble žin.

25 Da'nan' gwya'a jače'ena' to yechw na' bcuaša' xmechon', le bžeba' še gwñitan'. Na' na'a bezi'scan'."

26 Nach xanen' gože' le': "iNaco' mos mal, na' naco' xagüed! Nezdo' chelapa' ga gosaz bene' yoble, na' chotoba' coseš ga goson bene' yoble žin.

27 Na' lagüe da' nezdo' chona' ca' ĵbixchen' bi gwlejo' xmechuan' bene' yoble cont yezi'an len yichjen na'a ba bela'a?"

28 Nach gože' xmose' ca' yezica'chle: "Yeca'ale mechon' dan' bocua'anlena' bengana' gwnežjwlen ben' ba noxe' ši mil.

29 Can' naquen, note'teze bene' chon güen len dan' chnežjo xanen' le', xanen' gwnežjochcze' che', cont gata' da' zcha'och che'. Perw na' note'teze

be_{ne}' bi chgone' žin dan' chnežjo x_{anen}' le', yeca'a x_{anen}' da' daon' noxe'na'.

³⁰ Na' ca nac mos xagüed nga, le yebeje' le che'exoxje' gan' nac chol na' cuežyaše' na' gagwx-ejte laye' dan' leca žaglagüe'."

Can' gac cate' Jesús'en' gone' yela' justis che yogo' nación

³¹ 'Diosen' gwsele' neda' golja be_{nach}, na' cate' yida' da' yoble nsa'a yela' zaca' juisyw chia' na' nchi'a yogo' angl chia' ca', cana'ch cui'a nabi'a güen juisyw can' chnabia' Dios ben' zoa yaba.

³² Na' yapa' yogo' be_{ne}' che yogo' nación ca' yeside' laguan'. Na' cate' ba nita' yogüe' na' la'ane' can' chon to be_{ne}' güeye xila' cate' chebeje' partle xila' ca' na' partle šib ca'.

³³ Na' be_{ne}' ca' zjanac be_{ne}' güen lao Diosen' dan' ba gosejnilaže' neda', gwnita' legaque' cuitan' šla'a licha. Perw be_{ne}' mal ca', gwnita' legaque' cuitan' šla'a robes.

³⁴ Na' neda' naca' rey yapa' be_{ne}' ca' nita' šla'a lican': "Ba ben Xa' Diosen' cont le'e soale mbalaz. Le da nga cont gona' nabi'a'le txen len neda' can' ba nžia bia' Diosen' cate' gwxete yežlio.

³⁵ Gona' cont nabi'a'cho txen, le cate' gwdona' le'e be_{ne}le dan' gwdagua'. Na' cate' gwbi_{lda}' nis, le'e be_{ne}le da' güe'aja'. Na' cate' goca' ca be_{ne}' zito' le'e bleble neda' ližlen'.

³⁶ Na' cate' bi gota' da' chaza', le'e be_{ne}le da' gwyaza'. Na' cate' gocšenda', le'e bedetiple laža'. Na' cate' gota' ližya, le'e bede_{na}'le neda'."

³⁷ Na' be_{ne}' güen ca' yese'e neda': "Xanto', žbaten' ble'eto' le' gwdono' na' be_{nto}' da' gwdago'? Na' žbaten' gwbi_{ldo}' na' be_{nto}' da' güe'ajo'?"

38 Na' ĵbaten' goco' ca bene' zito' na' blebto' le'? Na' ĵbaten' ble'eto' le' bi de da' ĉhazo' na' ben_{to}' da' gwyazo'?

39 Na' ĵbaten' gocŝendo' o goto' liĵya na' bedena'to' le'?"

40 Na' neda' naca' rey yape'gaca'ne': "Da' li ĵia' le'e, bene' ca' chesejnilaže' neda' zjanaque' ca biŝa' na' ca zana'. Na' yogo' ni'a cate' beyaŝe'laže'le legaque', la'czla' bitec bi zjazaque' len benaĉhen', lencze nedan' beyaŝe'laže'le."

41 'Nach bene' ca' nita' ŝla'a robesle, bene' mal ca', yape'gaca'ne': "Le cuas ca'ale. Ba ĵia bia' ĉhele cuiayi'le yela' güen da' mal ĉhelen'. Le ŝja'ac lo yi' gabil dan' bi cheyol, yi' dan' bxen Diosen' cont saca'zi' Satanás toli toca_{ne} len da' xigüe' ca' cheson xŝinen.

42 Le ŝja'ac lo yi' gabilen', le cate' gwdona' bitw benle dan' gagua'. Cate' gwbuilda' bitw benle da' ye'eja'.

43 Cate' goca' ca bene' zito' bitw bleble neda' ližle. Cate' bi gota' da' ĉhaza' bitw benle da' ĉhaza'. Cate' gocŝenda' na' cate' gota' liĵya, bitw bedena'le neda'."

44 Nach legaque' lecze yosyoži'e xtižan' yesene': "Xanto', ĵbaten' bi beyaŝe'to' le' cate' gwdono' o gwbuildo', o goco' bene' zito', o bi gota' da' ĉhazo', o gocŝendo', o goto' ližyan'?"

45 Na' yeyož yese'e neda' ca' nach yape'gaca'ne': "Lagüe' dan' bi beyaŝe'laže'le bene' ca' chesejnilaže' neda', la'cze bibi zjazaque' len benaĉhen', da'nan' lencze nedan' bi beyaŝe'laže'le."

46 Nach bene' mal ca' yesezaca'zi'e toli toca_{ne}. Perw bene' ca' chesone' güen lao Diosen' yesezoe' mbalaz toli toca_{ne}.

26

Bosoxi'e nac yesone' yesezene' Jesúsen'

(Mr. 14:1-2; Lc. 22:1-2; Jn. 11:45-53)

¹ Cate' beyož be' Jesúsen' diža' ca', gože' beṇe' ca' gwleje' cont zjanaque' txen len le':

² —Ba nezele yečhope žazen' gala' lni pascw čechon'. Na' cana' gaca' lo na' beṇe' ca' chesegue'ede' neda' na' yesote' neda' yosode'e neda' to le'e yag cruz, neda' naca' ben' gwsela' Diosen' golja' beṇačh.

³ Nach bꝛoz gwnabia' ca' na' beṇe' ca' chososed chosolo'e dan' bzoj da' Moisésen' na' beṇe' gole blao ca' chesenabi'e nación Israel čechon' bese-dobe' chy'o liž bꝛoz blao ben' le Caifás.

⁴ Na' cheseyiljwlaže' naclen' yesone' yeseziye'e Jesúsen' cont yesezene'ne' yesote'ne'.

⁵ Na' gosene':

—Bi senchone' lo lnin' cont ca yesebec beṇe' žaš.

To no'ole bzoe' set zix yichj Jesúsen'

(Mr. 14:3-9; Jn. 12:1-8)

⁶ Nach goquen' Jesúsen' len beṇe' ca' gwleje' cont zjanaque' txen len le' nite' Betania liž Simón ben' güe'e yižgüe' da' nzi' lepra.

⁷ Na' šlac chi' Jesúsen' cho'a mesen', bžin to no'ole noxe' to de yejese ga chož set da' čla' zix da' leca chzaca' la'ay. Na' no'olen' bzoačhočhje' seten' yichj Jesúsen'.

⁸ Na' beṇe' ca' zjanaque' txen len Jesúsen' cate' besele'ede' can' ben no'olen' beseže'e na' gosene':

—¿Bixčhen' con benditjde' set zix nga?

⁹ Ša no bete' len, yesonen mechw xen na' yosonežjuen' gaclenen beṇe' yaše'.

10 Jesúsen' gočbe'ede' bin' gosene' nach gože' legaque':

—¿Bixčhen' chnele che no'olen'? Dan' bene' len neda' nga naquen güen.

11 Le bene' yaše' ca' bate'teze nita'cze' len le'e, san nedan' bich soa' yessa len le'e.

12 Dan' bguazje'nda' set zixen' bene' dan' cheyała' yesone' len neda' cate' gaša'.

13 Da' li žia' le'e, doxen yežlio gate'teze šjasedixjue'e bene' diža' güen dan' chzejni'in chia', decze de yesene' can' ben no'ol nga, cont šjasyeze'ede'ne'.

Judas Iscariote bene' Jesúsen' lo na' bene' chesegue'ede' le'

(Mr. 14:10-11; Lc. 22:3-6)

14 Gwde da' quinga, Judas Iscariote ben' goque' txen len bene' šižinw ca' ben' gwlej Jesúsen' cont zjanaque' txen len le', gwyeje' jäne'e bxoz gwn-abia' ca'.

15 Na' ježe' legaque':

—¿Gaca'te' gonle neda' cont gwdia' Jesúsen' lo na'le?

Nach bosoxi'a bene' ca' yosonežjue'ne' šichoa mechw plata na' bosonežjue'nen'.

16 Nach cana' Judasen' gwzologüe' gwdiljwlaže' nac gone' gwdie' Jesúsen' lo na'gaquen'.

Jesúsen' blo'ede' legaque' can' yesone' šjasyeza'laže' yela' got chen'

(Mr. 14:12-25; Lc. 22:7-23; Jn. 13:21-30; I Co. 11:23-26)

17 Na' bžin ža čala' lni caten' chesagüe' yetextil dan' bibi levadura yo'o, na' ža nechw che lnin'

be_{ne}' ca' zjanaque' Jesúsen' txen ja'aque' gan' zoe' na' gose'ene':

—¿Gan' che'ndo' šjasini'ato' cont gagwcho xše' che pascon'?

¹⁸ Nach Jesúsen' gože' legaque':

—Le'e šja'ac ciudan' gan' zoa to be_{ne}' byo ben' nombia'cho na' ye'lné': “Maestron' že' ba zoa žin ža gac da' cheyała' gac che', na' ližo' nga che'nde' gagwlento'ne' xše' lni pascon'.”

¹⁹ Nach be_{ne}' ca' gosone' can' gož Jesúsen' legaque', jasesini'e xše' že' lnina'.

²⁰ Na' cate' beyož gwxa gwbiž, Jesúsen' len be_{ne}' šižinw ca' gwleje' cont zjanaque' le' txen gosebi'e cho'a mesen' gosagüe'.

²¹ Na' šlac chesagüen' gož Jesúsen' legaque':

—Da' li žia' le'e, to le'e gwdele neda' lo na' be_{ne}' ca' chesegue'e neda'.

²² Nach legaque' besyeyaše'laže'de', nach gosezo-lagüe' tgüeje' tgüeje' gosenabde' le' gose'ene':

—Xana', ¿nedan' gona' ca'?

²³ Nach gože' legaque':

—To ben' chagw len neda' txen toz lo' ye'en, le' gwdie' neda' lo na' be_{ne}' ca'.

²⁴ Na' gac chia' can' nyoj le'e Xtiža' Diosen', neda' naca' ben' gwsela' Diosen' golja' be_{nach}, perw nyaše'chguaze nac ben' gwdie' neda' lo na' be_{ne}' ca'. Yejni'acle ša bi golje'.

²⁵ Nach Judasen' ben' za' gwdie' Jesúsen' lo na' be_{ne}' ca' gože'ne':

—Maestrw, ¿nedan' gwdia' le' lo na' be_{ne}' ca'?

Jesúsen' gože'ne':

—Le len'.

26 Na' šlac chesagüen', Jesúsen' gwxi'e to yetex-tilen' na' beyož be'e yela' choxclen che Dios, bzox-jen' na' bnežjuen' bene' ca' zjanaque' le' txen, gože' legaque':

—Le gagon'. Lenna' cuerp chian'.

27 Nach bexue' to vas gan' yože nis uvasen', na' beyož be'e yela' choxclen che Dios boznežjuen' legaque', goze'ene':

—Yogo'le, le ye'ej late' güeje dan' yože lo' vas nga.

28 Da' nga xchena' na' chzanlažan' laljen neche xtola' yogo'lol benach. Na' laljen cont solao gac da' cob dan' gwna Diosen' gone' gaclene' benachen'.

29 Chnia' le'e, bich ye'aja' nis uvas na'a. Cate'ch žin ža ba zoacho txen gan' zoa Xa' Diosen' chnabi'e, cana' ye'ijan' da' yoble.

*Jesúsen' gwne' Pedroa' bi chebe' še nombi'e le'
(Mr. 14:26-31; Lc. 22:31-34; Jn. 13:36-38)*

30 Na' beyož gosonxene' Diosen' len to da' gosole', nach gosa'aque' ja'aque' Ya'a Olivos.

31 Na' šlac zjangüe'e nezen' Jesúsen' gože' legaque':
—Na'aže' yogo'le cuejyichje neda' neche dan' gac chian'. Le nyojczen le'e Xtiža' Diosen' žan: "Gota' bene' güeye' xilan' na' xila' ca' yesaslasba'."

32 Perw na' cate' yosban Diosen' neda' ladjo bene' guat ca', yobch yeya'a Galilea ca le'e.

33 Nach Pedroa' gože' Jesúsen':

—La' yogo' bene' quinga yesebejyichje le', neda' gwbat gona' ca'.

34 Jesúsen' gože' le':

—Da' li žia' le', bina' cuež jean' na'aže' cate' gac šon ni'a bi chchebo' še nombi'o neda'.

35 Nach Pedroa' gwne':

—La'czla' še chonen byen guatlencza' le', gwbat n̄ia' bi nombi'a le'.

Na' lecze ca' yogo' beñe' šižiñw ca' zjanaque' Jesúsen' txen gosene' ca'.

Jesúsen' bol güiže' Diosen' to latje dan' nzi' Getsemani'

(Mr. 14:32-42; Lc. 22:39-46)

³⁶ Nach besežine' latje gan' nzi' Getsemani', na' Jesúsen' gože' beñe' ca' zjanaque' le' txen:

—Ngaze le cue' šlac ša'a na'le šjał güiža' Diosen'.

³⁷ Na' gwçhe'e Pedroa' len çhop xi'in Zebedeo, Jacobon' len Juanna'. Na' Jesúsen' gwzolao go-cyaše'chgüede', na' benchgüe' xbab.

³⁸ Nach gože' legaque':

—Lo' yichjlažda'oguan' chacyaše'chgüeda', chacda' con gatzca' catequen' chžaglagua'. Nga le yega'an̄ bi tasle, le na' txen len neda'.

³⁹ Nach Jesúsen' gwžialagüe' yelate' na' jaçhaze' lo yon' coscho'ale nach bol güiže' Diosen', gwne':

—Xa', še guac ten ca'ale, benšca cont bi saca'zi'a na' bi yesote'nda' can' ba zoa gaca'. Perw bi chñaba' gac da' n̄ia' neda', san gac can' n̄ao' le'.

⁴⁰ Nach beyeje' gan' nita' beñe' ca' šone na' ble'ede' zjanite' chesetase'. Na' gože' Pedroa':

—¿Ne šlož dao' ca goc cuejle bišgal len neda'?

⁴¹ Bi tasle na' le yol güiž Dios cont bi gon gwxiyen' le'e gan'. Nežda' che'nele n̄a'zle len neda' perw bi chzoele.

⁴² Na' gosze'e gan' nite' na' da' yoble jał güiže' Diosen', gwne':

—Xa', še gac ten ca'ale, benšca cont bi saca'zi'a na' bi yesote'nda', perw gac con can' che'ndo' le'.

43 Na' bezyeje' gan' niten' na' da' yoble ble'ede' chesetase' le ba chesežode' yejlagüen' bišgal.

44 Na' gwze'e da' yoble gan' nite'na' jał güiže' Diosen' da' gwyone ni'a, na' goznacze' da' yoble can' ba gwnen'.

45 Na' bezžine' gan' nita' beņe' ca' šone nach gože' legaque':

—Na'ach guaque tasle na' yezi'laže'le. Ba gole gwde to beņe' neda' lo na' beņe' güen da' xinj ca', neda' naca' ben' gwseła' Diosen' golja' beņach.

46 Le chas. Le yeyo'o. Ba za' ben' gon neda' lo na'gaque'.

Judasen' bdie' Jesúsen' lo na' beņe' chesegue'ede' le' (Mr. 14:43-50; Lc. 22:47-53; Jn. 18:2-11)

47 Ne' choe'te Jesúsen' dižan' ca' cate' bžin Judas ben' goque' txen len beņe' šižinw ca' gwlej Jesúsen' cont zjanaque' le' txen. Na' zan beņe' zja'ac len le' zjanoxe' no yag, no spada, beņe' gosesela' bχoz gwnabia' ca' na' beņe' gole blao ca' chesenabi'e nación Israel chechon'.

48 Na' Judas ben' bdie' le' lo na' beņe' ca', gože' legaque' nac yesenezde' non' yesezene', gwne':

—Ben' gwnopa' xague', le'na' Jesús. Le sene'.

49 Nach la' gwbiga'te' cuit Jesúsen', gože'ne':

—Patiox, Maestrw.

Na' bnopene'.

50 Jesúsen' gože'ne':

—Migw chia', ¿bixchen' zao' nga?

Nach la' gosebiga'te beņe' ca' gosezene' Jesúsen' na' goseche'ene'.

51 Na' to ben' nac txen len Jesúsen' gwleje' spada chen' na' gwдынen' mos che b̄xoz blaon' gwchogte' šla'a naguen'.

52 Nach Jesúsen' gože'ne':

—Bego'o spada chion' lo' liženna', le yogo' bene' chesote' bene' len spada, lecze len chesatlene'.

53 ¿Bi nezdo' guac nabda' Xan' cont la' sela'te' angl zan juisyw bene' yesaclene' neda'?

54 Perw še gona' ca' ¿nacxe gac dan' cheyała' gac dan' nyoj Xtiža' Diosen' žan quinga gaquen'?

55 Nach Jesúsen' gože' bene' ca' zjasezen le':

—¿Bixchen' nonle neda' ca to bene' gwban za'acle zedexi'le neda' len spada len yag? Yogo' ža gwchi'a chyo'o yodao' blaon' bsd blo'eda' bene' že'na' na' bi gwzenle neda'.

56 Perw chac da' qui cont chac can' ža Xtiža' Diosen' dan' bosozoj da' bene' goso'e xtižen' cani'.

Nach yogo' bene' ca' zjanaque' Jesúsen' txen bosoxonje' gosebejyichje'ne'.

Goseche'e Jesúsen' lao bene' ca' chesenabia' nación Israelen'

(Mr. 14:53-65; Lc. 22:54-55, 63-71; Jn. 18:12-14, 19-24)

57 Na' bene' ca' gosezen Jesúsen' goseche'ene' lao Caifás ben' nac b̄xoz blao, gan' ba zjanžag bene' ca' chososed chosolo'e dan' bzoj da' Moisésen' na' len bene' gole blao ca' chesenabi'e nación chechon'.

58 Nach Pedroa' na'ogüe' Jesúsen' zito' zito'le bžinte' liž b̄xoz blaon', na' gwyo'e chyo'ona' gwchi'e len bene' ca' chesape' yodao' blaon', le goclaže' le'ede' naquen' zelao gac che Jesúsen'.

59 Nach yogo' b \underline{x} oz gwnabia' ca' na' yezica'chle be \underline{n} e' gole blao ca' chesenabi'e naci \underline{o} n chechon' cheseyiljwlaže' bi diža' güenlaže' yeso'e che Jesúsen' cont yesote'ne'.

60 Perw goc sša bitw besyeželde' bi diža' güenlaže' yosode'ede' le' cont gosožie'ne' xya la'czla' be \underline{n} e' zan gosenite' gosene' diža' güenlažen' contr le'. Gwde na' besechoj yechope be \underline{n} e' na' bedilen can' gosenen'.

61 Quinga gosene':

—Benga gwne': "Neda' guac yochinja' yodao' blao gan' chonxencho Diosen', na' šone žaze yeyonan'."

62 Nach gwzoža' b \underline{x} oz blaon' gože' Jesúsen':

—¿Bibi de bi nao' ca' nac da' nga chosocuiš be \underline{n} e' quinga le'?

63 Bitwbi gwna Jesúsen'. Nach gož b \underline{x} oz blaon' le':

—Chnia' le' gwna neto' še le len' Cristo ben' nac dogualje Xi'in Diosen', ben' gwleje' cont yedenabi'e. Na' Diosen' ben' zoa toli toca \underline{n} e cue'e da' ba \underline{l} i še ledo' can' žon'.

64 Jesúsen' gože'ne':

—Le can' žale nan' naca'. Diosen' gwsele' neda' golja' be \underline{n} a \underline{c} h. Na' chnia' le'e, gwžin ža le'ele neda' chi'a cuit Diosen' ben' nape la'zelagüe yela' guac xen, na' nabi'a txen len le', na' le'ele yetja' yaban' to lo' bejw.

65 Cate' bene b \underline{x} oz blaon' xtiža' Jesúsen', gwšo' gwcheza'te xen', le par le' da' mal juisyon' gwna Jesúsen' cui'e cuit Diosen' nabi'e. Nach gwne':

—Ba benecho na'a ba gwne' che Diosen' dan' gwne' ca'. Noch no chyažje no gagw xya che'.

66 ¿Nac žale che'?

Nach be_{ne}' ca' bosyoži'en gose'ene':

—Cheya_{la}' gate' dan' chon cuine' ca Dios.

⁶⁷ Nach bosoži'e xene' cho'alao Jesús'en', na' gose-baže'ne', na' ba_{le}' gosegape' xague'na'.

⁶⁸ Nach gose'ene':

—Še len' naco' Criston', gw_{ne}ya'ašč, gwna neto', ĵnon' chgapa' le'?

Pedroa' bi gw_{che}be' še nombi'e Jesús'en'

(Mr. 14:66-72; Lc. 22:56-62; Jn. 18:15-18, 25-27)

⁶⁹ Na' šlac chac da' quinga, chi' Pedroa' chyo'ona', cate' bžin to no'ole g_üen žin che Caifásen', gože'ne':

—Lencze le' naco' txen len Jesús be_{ne}' Galilean'.

⁷⁰ Na' lao yogo' be_{ne}' ca' že' na', Pedroa' bitw gw_{che}be' še naque' txen len Jesús'en', na' gože' no'olen':

—Bi _{ne}zda' bi dižan' cho'o.

⁷¹ Gwde beyož gože' no'olen' ca' beyeje' cho'a puert na'le, na' bezle'e yeto no'ole g_üen žin_{na}' le', na' goze'e be_{ne}' ca' že'na':

—Lecze len benga naque' txen len Jesús be_{ne}' Nazareten'.

⁷² Da' yoble bitw gw_{che}be' še naque' txen len Jesús'en', nach gwne':

—Na' zoa Diosen' cue'e da' ba_{li} bitw nombi'a be_{na}' žo' ca'.

⁷³ Na' goccze šlož, gosebiga' be_{ne}' ca' že'na' goseze'e Pedroa':

—Da' _{li}cze, naco' txen len _{le}gaque', _{le} nacb_{ia}' ch_{ni}o' can' ches_{ne} be_{ne}' Galilea ca'.

⁷⁴ Nach Pedroa' ch_{op} š_{one} _{ni}'a gwne':

—Diosen' go_{ne}' ga saca'zi'a še chon_{la}ža' dan' žia' bi nombi'a be_{na}'.

Na' _{la}' gwchežte to jea.

⁷⁵ Nach jayze'e Pedroa' can' gož Jesúsen' le':
 “Bina' cuež jean' cate' gac šone ni'a bi chchebo' še
 nombi'o neda'.” Nach beze'e leca gwchežyaše'.

27

Goseche'e Jesúsen' lao Pilaton' (Mr. 15:1; Lc. 23:1-2; Jn. 18:28-32)

¹ Na' cate' gwyeni', yogo' b̄xoz gwnabia' ca' na'
 beñe' gole blao ca' chesenabia' nación chechon'
 besyedobe' na' gosechoglagüen' yesote' Jesúsen'.

² Nach bosocheje'ne' na' goseche'ene'
 jasesane'ne' lo' na' gobernador Poncio Pilato.

Judasen' beyot cuine'

³ Na' Judasen' ben' bdie' Jesúsen' lo' na' beñe'
 ca', cate' gocbe'ede' ba gosechoglagüen' yesote'
 Jesúsen', betinjde' dan' bdie' le' lo' na' b̄xoz gwn-
 abia' ca' na' beñe' gole blao ca'. Nach gwyeje'
 laogaquen' par bonežjue' legaque' šichoa mechw
 platan'.

⁴ Nach gože' legaque':

—Malen' bena' bdia' lo' na'len' to beñe' bi nape'
 doła'.

Na' gose'ene':

—Bitwbi doła' nap neto' dan' beno' ca'.

⁵ Nach Judasen' bozale' mechw ca' lo' yodao'
 blaon', nach beze'e na' jaylo'o do yene' beyot
 cuine'.

⁶ Beyož beza' Judasen', b̄xoz gwnabia' ca' bosy-
 otobe' mechon'. Na' gose' lježe':

—Bitw gac co'ochon lo' caj gan' yo'o mechw che
 yodaon', le' naquen mechw dan' gwdixjwcho cont
 yega'a yela' mban che to beñe'.

⁷ Na' bosoxi'e yesezi'e len mechon' to yežlio dan' de che to beņe' güen yeso'. Na' gosezi'en par to capsantw ga yosocuaše' beņe' zito'.

⁸ Na' yežlion' ne' nzin' Yežlio Chen ža na'aža, le gosezi'en len mechw dan' goseyixjue' cont gosote' Jesúsen'.

⁹ Can' goc cont goc can' bzoj da' Jeremías ben' be' xtiža' Diosen' cani', gan' žan: “Besyezi'e šichoa mechw platan', dan' gosena beņe' Israel zaca' bena'.

¹⁰ Na' gosezi'e yežlio che to beņe' güen yeso', can' gwna Xancho Diosen' neda'.”

Bosocuiše' Jesúsen' lao Pilaton'

(Mr. 15:2-5; Lc. 23:3-5; Jn. 18:33-38)

¹¹ Na' goseche'e Jesúsen' lao gobernadoren' na' šlac zeche' lagüen', gobernadoren' gože'ne':

—¿Len' naco' rey che beņe' Israel?

Nach Jesúsen' boži'e xtižen', gwne':

—Can' gwnao'na', can' naquen.

¹² Na' cate' b̄xoz gwnabia' ca' na' beņe' gole blao ca' chesenabia' nación chechon' bosocuiše' Jesúsen', bitw bi gwne'.

¹³ Nach Pilaton' gože'ne':

—¿Bi chendo' catec da' zan xya nga chesagüe' čhio'?

¹⁴ Perw Jesúsen' ne to xtiže'na' bitw boži'e, na' bebanechgüe gobernadoren'.

Gosechoglagüen' yesote' Jesúsen'

(Mr. 15:6-20; Lc. 23:13-25; Jn. 18:38-19:16)

¹⁵ Na' gota' costumbr, gobernadoren' gwsane' to beņe' de ližya cate' čala' l̄ni pascw checho, con beņe' yesenab beņe' gualaž chechon'.

16 Na' ližya na' de to be_{ne}' chzechgua che' naque' be_{ne}' güen da' xinj, na' le' Barrabás.

17 Nach Pilaton' gože' be_{ne}' ca' zjanžaguen':

—¿Noe' be_{ne}' quinga chaclaže'le gwsana'?
¿Gwsana' Barrabás še Jesús nga ben' chesene' naque' Cristo ben' gwlej Diosen' cont yedenabi'e?

18 Gocbe'e Pilaton' dan' chesacxi'a b_xoz gwnabia' ca' Jesús'en', da'nan' bosodie' le' lo ne'en.

19 Ca' chi' Pilaton' gan' chone' yela' justisen', cate' bžin to rson da' gwse_{la}' no'ol chen', gože'ne':
“Bitw bi gondo' bena', le bibi do_{la}' nape'. Nže'e gw_{ne}da'ne' yel na' bžaglaochgua' ne_{che} dan' chac che bena'.”

20 Na' b_xoz gwnabia' ca' na' be_{ne}' gole blao ca' chesenabi'e nación chechon' gosego'oye_{le}' be_{ne}' ca' že'na' cont yesenabe' gwsane' Barrabásen' na' yesenabe' yesote' Jesús'en'.

21 Nach gobernadoren' gože' lega_{que}' da' yoble:

—¿No be_{ne}' quinga chope chaclaže'le gwsana'?

Nach gose'ene':

—Barrabásna'.

22 Pilaton' gože' lega_{que}':

—¿Bixe gona' len Jesús nga ben' chesene' naque' Cristo ben' gwlej Diosen' cont yedenabi'e?

Na' yogüe' gose'ene':

—¡Bde'e le'e yag cruz!

23 Nach gož gobernadoren' lega_{que}':

—¿Bixe da' xinj nonen'?

Na' lega_{que}' da' yoble bososya'achgüe' gose'ene':

—¡Bde'e le'e yag cruz!

24 Gocbe'e Pilaton' bicze bi gac gone'. Ba chya_{la}'ch chesone' žaš juisyw. Nach gwse_{le}' to

be_{ne}' ja_xi'e nis cont bone'e lao be_{ne}' ca' že'na' na' gože' le_{ga}que':

—Bibi da' xinj non benga. Bitw naquen xbagā' dan' gotlene', xbagā' le'e naquen še ba betwlene'.

²⁵ Nach yogo' be_{ne}' ca' gose'ene':

—Xbagā' neto' na' xbagā' xi'into' naquen che yela' got che benga.

²⁶ Nach bsan Pilaton' Barrabásen' can' gosenaben'. Perw na' bene' mandadw gosot goseyin soldadw che' ca' Jesúsēn', nach bene' le' lo' na'gaque' cont yosode'ene' le'e yag cruzēn'.

²⁷ Nach soldadw che gobernadore_n' goseche'e Jesúsēn' lo' yo'o che gobernadore_n', nach bosyotobe' yogo' soldadw ca'.

²⁸ Na' goseyi_{ne}' xalana' Jesúsēn' na' bosoguacue'ne' to lache' xna ca dan' chesaz rey ca'.

²⁹ Na' gosone' to corona de xis yeše' bosozoen' yichjen', na' ne'e licha bosogoxe'ne' to xis. Na' bosozoa xibe' lagüēn' par gosonle' che', nach gose'ene':

—¡Viva rey che be_{ne}' Israel!

³⁰ Nach bosoži'ene' xene', na' besyeque'e xis dan' noxen' na' bosozeten' yichje'.

³¹ Na' beyož gosonle' che', besyeque'e lache' xnan' dan' bosoguacue'nen' na' bosyoguacue'ne' xacze'. Nach goseche'ene' cont jasede'ene' le'e yag cruzēn'.

Bosode'e Jesúsēn' le'e yag cruzēn'

(Mr. 15:21-32; Lc. 23:26-43; Jn. 19:17-27)

³² Nach besechoje' ciudan' na' besyežague' to be_{ne}' Cirene le Simón na' gosone' byen bosogüe'ene' yag cruz che Jesúsēn'.

33 Na' besežine' to latje gan' nzi' Gólgota, zeje diža' latje che žit yichj bene' guat.

34 Na' bosonežjue' Jesúsen' vino da' nchixe to da' zla' par ye'ejen', perw le' con bnixen', bitw güe'ejen'.

35 Na' cate' beyož bosode'ene' le'e yag cruzen', soldadw ca' gosone' rifa cate' besyele'e xalane' cont gota'bia' noe' yechelen'. Na' dan' gosone' ca' goc can' bzoj da' ben' be' xtiža' Diosen' cani', gwne': "Yesyele'e xalanan' na' yesezi' che che', yesonen' rifa."

36 Nach gosebi'e gosape'ne'.

37 Na' yichj yag cruzen' gan' de'ena' bosozoje' dan' bcuiš le', na' žan: "Benga Jesús rey che bene' Israel ca'."

38 Na' lecze cana' bosode'e chope bene' gwban le'e yechope yag cruz. Toe' gwda' cuit Jesúsen' licha na' yetoe' cuite' robes.

39 Na' bene' ca' gosede gan' da' Jesúsen' goson yichjlagüe' dan' leca besegue'ede' le', na' gosezi'diže' le',

40 gose'ene':

—Len' gwnao' yochinjo' yodao' blaon' na' šone žaze yeyonon', bosla cuino'. Še len' naco' doguale Xi'in Diosen', beyetj le'e yag cruzen'.

41 Na' len bxoz gwnabia' ca' na' len bene' ca' chososed chosolo'e dan' bzoj da' Moisésen' na' len bene' fariseo ca', na' len bene' gole blao ca' chesenabi'e nación chechon', yogüe' gosezi'diže'ne' na' gosene':

42 —¡Yezica'chle bene' bosle' na' bi chac yosla cuine'! Še naque' rey che chio' bene' Israel, yeletj cuine' le'e yag cruzen' na'a na' šejle'cho che'.

43 Le' chejnilaže' Diosen', le gwne': "Dogualje Xi'in Dios neda'." ;Na' le'echo yosla Diosen' le' na'a še chacde' le'!

44 Na' beṇe' gwban ca' zjada' le'e yag cruzen' chop la'a cuiten', lecze gosezi'diže' le'.

Can' goc cate' got Jesúsen'

(Mr. 15:33-41; Lc. 23:44-49; Jn. 19:28-30)

45 Na' do guagwbiž doxen yežlion' goc chol bžinte cheda šone.

46 Na' do cheda šone Jesúsen' bosye'e zižje gwne':
—Elí, Elí, ¿lama sabactani? (Zeje diža': Dios chia', Dios chia', ¿bixchen' ba gwlejyichjo' neda'?)

47 Na' bal beṇe' ca' zjanita' na' gosende' na' gosene':

—Le gwzenag, benga chol güiže' da' Elías ben' be' xtiža' Diosen' cani'.

48 Nach la' bchojte to beṇe' gwyejsese' jaṁi'e to esponja na' bzažeden' vino zichj na' bzoen' to lao xis tone nach jažiguen' cho'a Jesúsen' cont xopen'.

49 Na' yebale' gose'e bena':

—Cuezcho, yešč še güide Elíasen' yosle'ne'.

50 Nach da' yoble Jesúsen' bosye'e zižje na' gote'.

51 Na' ca hora' lache' da' ze lo' yodao' blaon' bcheza' gacholen gwza'te yichjen bžinte che'eḷe. Na' gwxo'chgua gosoxjte jej ca'.

52 Na' lecze beseyaljo ba che beṇe' ba gosat. Na' zan da' beṇe' ca' gosejnilaže' Diosen' besyebane' ladjo beṇe' guat ca'.

53 Nach caten' ba beban Jesúsen' ladjo beṇe' guat ca', besyechoje' lo' ba chegaquen' na' jaya'aque' jaselo'elagüe' ciuda Jerusalén. Na' zan beṇe' be-sele'ede' legaque'.

54 Na' ca nac xan soldadw ca' na' bene' ca' nche'e, bene' nita' chesape' Jesúsén', cate' besele'ede' can' gwxo' na' bichle da' ca' goc, besežebchgüe', na' gosene':

—Da' li le benga goc dogualje Xi'in Dios.

55 Na' lecze nita' zan no'ole ladjo bene' ca' na' goseze' zito' chesene'e can' chaquen'. No'ol ca' gosa'ogüe' Jesúsén' cate' beze'e dīstritw Galilean' par chesaclene' le' len bi da' chyažjde'.

56 Na' len no'ol ca' María bene' Magdala, na' lecze María ben' nac xna' Jacobo na' José, na' lecze ca' xna' Jacobo na' Juan, xi'in Zebedeo.

Bosocuaše' Jesúsén'

(Mr. 15:42-47; Lc. 23:50-56; Jn. 19:38-42)

57 Na' gwzoa to bene' gwñi'a bene' ciuda Arimatea le' José na' ba gwzolao chzenague' che Jesúsén'. Na' cate' ba chxoa gwbiž

58 Josén' gwyeje' lao Pilaton' jaynabe' cuerp che Jesúsén'. Na' Pilaton' bene' mandadw bosy-onežjue'ne' cuerp chen'.

59 Nach Josén' bego'o lo ne'e cuerp che Jesúsén' na' blaže'ne' to lache' xen da' nyach.

60 Na' gwlo'e cuerp chen' to lo' bloj cobe che' da' gwche'ene' le'e yej. Na' blōle' to yej xen cho'a blojen' cont bseyjon len. Nach beze'e.

61 Na' María bene' yež Magdalan' na' yeto María yoble jasechi'e cho'a blojen'.

Bosozoe' bene' chesape' gan' jasecuaše' Jesúsén'

62 Na' beteyo, gwde žan' caten' chososiñi'e par ža che Diosen', besedobe bχoz gwnabia' ca' na' bene' fariseo ca' na' ja'aque' gan' zoa Pilaton'.

63 Na' gose'ene':

—Be_{ne}' , ba jaysalaže'to' can' gwna da' be_{ne}' gwxiyen' cate' ne' mbane' , gwne': “Yeyo_n ža yebana' ladjo be_{ne}' guat ca'.”

⁶⁴ Da'nan' gwse_{la}'šca be_{ne}' šjasedape' cho'a blojen' gan' jasecuaše'nen' cont bi šja'ac bene' ca' gosaque' Jesúsen' txen šeže'le šjasyeleje' cuerp chen' na' yese'e be_{ne}' le bebane' ladjo be_{ne}' guat ca'. Le še yesaque be_{ne}' ba bebane' ladjo be_{ne}' guat ca', gonchen malech clél ca len diža' dan' gwdise' gwne' Diosen' gwse_{le}' le'.

⁶⁵ Nach Pilaton' gože' be_{ne}' ca':

—Go_{na}' le'e soldadw ca'. Le che'e cont yesape' ga zelao yesezoede'.

⁶⁶ Nach ja'aque' len soldadw ca' na' bosochiše' sey le'e yej dan' da' cho'a blojen', na' bosonite' soldadw ca' gosapen'.

28

Jesúsen' bebane' ladjo be_{ne}' guat ca'
(Mr. 16:1-8; Lc. 24:1-12; Jn. 20:1-10)

¹ Na' cate' beyechj ža che Dios, ba_l dmigw María be_{ne}' Magdala len María ben' yeto ja'aque' jasene'e gan' bosocuaše' Jesúsen'.

² Na' leca gwxo', le angl che Xanchon' betje' yaban', na' bžine' gwque'e yej dan' nseyjw cho'a blojen', na' gwchi'e lo yeja'.

³ Na' anglen' leca chactit cho'alagüen' cacze ga chep yes na' xalanen' naquen šiš xila' juisyw ca nac beye'.

⁴ Na' cate' besele'e be_{ne}' gop ca' le', leca gosexize' besežebe' na' gosebixe' gosatte' šlat.

⁵ Perw na' anglen' gože' no'ol ca':

—Bitw žeble. Neda' ne_zda' Jesúsen' ben' bosode'e le'e yag cruz nan' cheyiljwle.

⁶ Nono de nga. Ba bebane' ladjo bene' guat ca', can' gwnacze'. Na' le da, le na' latje nga gan' gosegüe'e cuerp chen'.

⁷ Bedao' le šjaya'ac le šjaydixjue'e bene' ca' zjanaque' Jesúsen' txen ye'gaclene' ba bebane' ladjo bene' guat ca'. Na' ye'gaclene' gwyobech Jesúsen' yežine' Galilean' clél ca' legaque', na' Galilean' na' yesele'ede'ne'. Can' gwna Diosen' zedetixjue'eda' le'e.

⁸ Nach no'ol ca' la' besyeya'actie' cho'a blojen' do chesežebze' perw leca chesyebede', zjaya'acsese' zjasyedixjue'ede' bene' ca' zjanaque' Jesúsen' txen can' goca'.

⁹ Na' šlac zjaya'aque' besyežague' Jesúsen' chanez. Nach bguape' legaque' tiox.

Na' no'ol ca' gosebigue' gan' zoa Jesúsen' bosozoa xibe' lagüen', na' goseyele' ni'e tantw besyebede', na' gosonxene' le'.

¹⁰ Jesúsen' gože' legaque':

—Bitw žeble. Le šjaydixjue'e bene' lježcho ca', cheyala' šjaya'aque' Galilean' cont yesele'ede' neda'.

Bene' gop ca' jasyedixjue'ede' b_xoz ca' can' ba goca'

¹¹ Na' šlac zjaya'ac no'ol ca' ciudan', bal soldadw ca' bene' ca' gosape' gan' bosocuaše' Jesúsen' jaya'aque' ciudan' jasyedixjue'ede' b_xoz gwnabia' ca' doxen can' ba goquen'.

¹² Nach besedobe b_xoz gwnabia' ca' len bene' gole blao ca' chesenabia' nación chechon' na' bosoxi'e nac yesone' ca' nac dan' gose' soldadw ca'

legaue'. Na' bosonežjue' soldadw ca' da' zcha'o mechw.

¹³ Gose'e legaue':

—Še no nabe le'e bin' goquen', na' ye'gaclene' šeže'le šlac chtasle beñe' ca' gosaque' le' txen besye-beje' cuerp chen' lo' blojen' na' besyeyo'en ga yoble.

¹⁴ Na' še gobernadoren' yende' diža' quinga, neto' šjašaljento'ne' cont bi že'e le'e na' cont bi gote' le'e.

¹⁵ Na' soldadw ca' gosezi'e mechon' dan' bosonežjue' legaquen', nach gosone' con can' gose'e legaue'. Na' ža na'aža yogo' can' gosena soldadw ca' ne' chesene' doxen gan' nita' beñe' Israel gualaž chechon'.

*Jesúsen' gože' legaue' yeso'e xtiže'na' yogo' nación
(Mr. 16:14-18; Lc. 24:36-49; Jn. 20:19-23)*

¹⁶ Nach beñe' ca' zjanaque' Jesúsen' txen, beñe' ca' šnej, jaya'aque' Galílean' cont jasyešague' Jesúsen' to lo ya'a gan' gože' legaue' yesyežague'.

¹⁷ Na' cate' besele'ede' Jesúsen' gosonxene'ne'. Perw bia'cze to chope' gosacžejlaže' še le'na'.

¹⁸ Nach gwbiga' Jesúsen' gan' nite'na' na' gože' legaue':

—Ba ben Diosen' lo na' doxen yela' chnabian' dan' de yaban' na' yežlion'.

¹⁹ Da'nan' le šja'ac le šjased le šjalo'e beñe' ca' že' yogo'loł nación cont yesejnilaže' neda'. Na' le gwzoe' nis cont yosolo'e le chesejnilaže' Xacho Diosen', na' chesejnilaže' neda' naca' dogualje Xi'ine', na' lencze Spiritw che'na'.

20 Na' gwsed gwlo'elne' cont yesone' yogo'lo_l
dan' ba bena' mandadw gon_{le}. Neda' zoacza' len
le'e yogo' ža, na' ca'cze ne' soa'len le'e cate'ch te che
yežlion'. Da' na'zen' chzoja' na'a.

**Diža' güen che ancho Jesucristo
New Testament in Zapotec, Zoogocho
(MX:zpq:Zapotec, Zoogocho)**

copyright © 1987 Wycliffe Bible Translators, Inc.

Language: Zapotec, Zoogocho

Translation by: Wycliffe Bible Translators, Inc.

Zapoteco, Zoogocho [zpq], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Zoogocho

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
de7d40fb-3909-53d8-8bea-744cf1ce0e41